

讀春秋古經說





說經春秋

撰康侯

續初成集書叢

(本印)

種一他其及說經春秋

一九三七年十一月初版
一九五九年十月補印

商務印書館出版

上海大众文化印刷廠印刷

春秋古經說序

春秋經一而已。自三傳分而經分。并其卷數亦分。漢志載春秋古經十二篇者。左經也。經十一卷者。公穀經也。說詳四庫提要今以三傳參校之。左傳莊三十年夏次于成。公穀作師次。以上三年公次于滑。八年師次于郎。例之。無直言次者。則有師字是也。僖九年甲子晉侯危諸卒。公作甲戌。以上文戊辰推之。則甲戌是也。然大要古經爲優。而自漢以來。卽有取公穀亂古經者。如昭十一年齊國弱賈達從公作酌之類。宋元諸儒避實蹈虛。尤好舍古經而用二傳。夫古經傳序相授。非一世矣。公卽位爲公。卽立已經後人竄改。古字古言不盡可見。乃并其幸留至今者。亦屏棄弗錄。此毛氏春秋簡書刊誤。段氏春秋左氏古經所由述。與三傳異同有不必辨者。蠅則蠅之。或體逮。則速之。籀文是也。此外則形聲相近。假借通用之字居多。渝輸同訓。黎宋同音。郿微本一地。厲賴實一國。前人論之詳矣。穀梁出較先。其誤尙寡。公羊出最晚。其誤滋甚。口授愈久。則愈離。不期然而然者也。毛氏動輒詆爲有意變易。又豈通論哉。今刺取其義意可尋者。疏通證明之。至說文述春秋用左氏。而衣部引公會齊侯于侈。品部引次于畧北。示部引石尙來歸。輒與古經皆不同。蓋又師談互異。今不復盡據爲定云。

右春秋古經說二卷。國朝番禺侯康君謨撰。按亡友侯君謨道光乙未舉人。湛深經術。兼工文筆。殆吾粵之孔孽軒汪容甫也。考漢志。稱春秋古經十二篇。經十一卷。註曰公羊穀梁三家。則左氏經文不著錄矣。然陸德明經典釋文。稱舊夫子之經與邱明之傳各異。杜氏合而釋之。則左傳當自有經。又徐彥公羊傳疏。稱左氏先著竹帛。故漢儒謂之古學。則所謂古經十二篇。卽左傳之經。經十一卷。公穀二傳之經。刻漢書者誤。連二條爲一耳。是書以左傳經文與二傳校勘。而左氏義長者多排比參訂。勒成二卷。亦毛氏簡書刊誤。段氏春秋古經之類。而間補其疏舛闕略。簡要篤實。殆欲過之。蓋左傳雖晚出。而其文實竹帛相傳。公穀雖先立學官。而其初皆經師口授。草野之傳聞。自不及簡編之記載。或記憶之失真。或方言之遞轉。勢所必然。原無足異。又春秋有魯史舊文。有夫子特筆。左氏身爲魯史。親見聖人。昔元趙汸春秋集傳自序。稱陳傳良誤。以左傳爲魯史舊文。不知策書有體。夫子所據以加筆削者。左氏亦未之見。恐未必然。知左氏所據以作傳者。爲魯史舊文。爲聖人特筆。則凡以虛詞說經。而舍傳以從者。不攻而自破矣。數典不忘其祖。是書尤其第一義也。夫道光庚戌夏五南海伍崇耀謹跋。

春秋古經說卷一

清 番禺侯 康君謨撰

隱元年三月公及邾儀父盟于蔑。

邾公作邾婁後倣此據檀弓亦偁邾婁公羊釋文云邾人語聲後曰婁檀弓釋文云邾人呼邾聲曰婁然則公羊之偁所謂名從主人也左穀正其名公羊從其俗猶越或偁於越義可兩通無闢體要及范氏穀梁注皆爲於越強生義例恐祇是史異詞耳孔疏近之

蔑公穀作昧據左注蔑卽姑蔑不偁姑者惠氏補注云隱公名息姑當時史官爲之諱然則作蔑爲合昧則同音字故文七年晉先蔑奔秦公羊亦作昧又說文目部昧目不明也首部蔑勞目無精也非獨音同義亦本通矣

隱三年夏四月辛卯君氏卒

君公穀作尹云天子之大夫按左氏親見國史不應以男人爲婦人乖繆至是蓋經本作君氏後字脫其半而成尹如戰國策以趙爲肖以齊爲立周禮司几筵其柏席用葦注元謂柏柳字磨滅之餘君之爲尹正所謂磨滅之餘也昭二十年傳棠君尙謂其弟員曰釋文君或作尹亦其例公穀不知爲脫誤見春秋時適有尹氏此人凡兩書于經尹氏立王子朝尹氏以王子朝奔楚金匱祥通鑑前編毛奇齡春秋傳郜坦春秋集古傳又以

爲卽鄭之尹氏。更附會無足道。然則何以稱君氏。曰。春秋書妾媵之卒。僅一見于此。稱子氏則嫌與定十五年姬氏卒同姓氏。固夫人也。故特變文以見其爲君母。趙東山謂妾母本不登于策。此以吾君服其母喪不可不書。曰君氏者爲夫子之特筆是也。顧氏大事表斥爲支離何哉。目知錄引襄二十六年傳君夫人氏爲證。謂當時有此稱去其夫人卽爲君氏。引據最確不必如惠半農春秋說以不稱姜氏絕不爲親難之也。

隱五年春公矢魚于棠

矢公穀作觀。史記魯世家十二諸侯年表。漢五行志下上皆作觀。按臧僖伯有則公不射之語。故葉氏夢得云。古者天子諸侯必親射牲。因而獲禽以共祭。春獻魚之節也。公將盤遊託射牲以祭焉。惠氏補注亦引周禮射人祭祀則贊射牲。司弓矢。共射牲之弓矢。及外傳左史猗相語證之。又淮南時則訓季冬命漁師始漁。天子親往射。則矢魚更有明文矣。淮南以夏令紀事。夏之季冬正周之春。蓋公本意在觀而託名于矢。言矢則觀見。言觀則矢不見。古經爲長。而杜注以矢魚爲陳魚。亦非古經意也。左傳言陳之非卽以矢爲陳。杜元凱泥于釋詁文。因而誤解。

隱五年秋衛師入鄭

鄭公作盛。後同。八年作成。春秋簡書刊誤。譏其宋將作送。衛將作彗。四庫提要云。穆天子傳所載盛姬。卽鄭國之女。攷古圖許或作鄆。魯或作鹵。俱勒鐘鼎。斷非訛寫。古字異文。如斯者衆。未可盡以今文繩之。然則鄭盛古通。無闕義例。至莊八年師及齊師圍鄭。鄭降于齊師。公又作成者。亦同音假借。如管蔡世

家封叔武于成亦以鄭爲成也傳謂諱滅同姓非春秋繁露滅國下云衛人侵成鄭入成及齊師圍成連及之文而

隱九年冬公會齊侯于防

防公羊作邴按春秋時防地有四一魯邑卽此年會齊侯者是也一魯山僖十四年季姬及鄆子遇于防是也一宋地隱十年取防是也一莒地昭五年莒牟夷以車婁及防茲來奔是也魯防邑與齊接壤蓋在北鄙故莊七年夫人姜氏會齊侯于防廿二年及齊高傒盟于防襄十七年齊高厚帥師伐我北鄙圍防而滅紂之亂亦自防奔齊莊廿九年襄十三年又屢城防皆以邊齊故也則公會齊侯必于防無疑若邴者據說文則宋下邑此會正謀伐宋安得會于宋地據公穀則卽鄭之祊桓元年始卒易祊田前雖云我入祊蓋未肯受而有之本杜注仍屬鄭境齊魯又何必去其本國而會之于義古經爲長或公羊意以魯別有地名邴者耶或曰據少牢饋食禮南柄注古文柄爲祊據說文人部

桓二年秋七月杞侯來朝

杞公穀作紀何注謂天子將娶于紀故封之百里按漢書外戚恩澤侯表其餘后父據春秋褒紀之義王莽傳信鄉侯侈上言春秋天子將娶于紀則娶紀子偁侯蓋爲公羊學者相傳有此說然其禮于經典無徵且紀季姜歸京師在九年豈有天子立后謀于七年之前而納于七年之後者是時桓王已立十年又非少不能成禮待其長而後娶可知也胡傳及吳草廬又謂齊欲滅紀朝魯求庇以六年之事

牽合于此。按左氏親見國史，既知六年會成爲諮謀齊難，何獨于此不知也。劉道原又謂春秋雖亂世，至于兵革之事，亦慎用之。杞來朝魯有少不敬，未宜便入其國。按惠半農春秋說云：僖二十七年春杞子來朝，九月入杞。與桓二年秋入杞正同，皆討不共也。討不共者古之制，故凡伯弗賓，杞侯弗敬。一書伐兩書入，皆所以懲不共。春秋書之以爲戒。且滕杞皆前偁侯，後偁子奚獨于杞侯而疑之。程子曰：凡皆當爲紀。杞爵非侯，文誤也。及紀侯大去其國。杞偁侯者之後，杞不復偁侯。惠氏此數語似暗破程說。然則作杞，于義爲長。

桓六年春正月，寔來。

三傳並同，然竊意古經當作實來。詩大雅實墉實鑿，實畝實籍，實當作寔。趙魏之東實寔同聲。疏云：春秋桓六年州公寔來，而左傳作實來，是由聲同故字有變異也。此其證也。錢氏養新錄又以觀禮伯父實來注今文實作寔是實卽寔之古文。春秋公穀爲今文，左氏爲古文，故二傳作寔。左氏作實云云，引據尤確。今左氏亦作寔來，則未知何人據二傳改。錢氏歸咎于杜元凱，恐非何者。元凱雖多信傳不信經，然于經但有疑辭，如隱九年大雨震電文十七年齊侯伐我西鄙之類，皆明言經誤，而亦未嘗擅易。況杜卽以實訓寔，又何必不仍其故字？蓋杜所見本已改作寔。改經必兼改傳，傳當亦本作實。陳樹華謂傳解經不容立異非也。而別本尙有作實流傳至唐初，孔氏猶及見之。錢氏謂爲伏虔本，未知信否？要古經之作實不作寔，則確有可憑矣。

桓六年公會紀侯于成。

成穀作郕。按襄十六年齊侯伐我北鄙圍郕。卽此地。彼經穀作成。而左作郕。與此正相反。然則郕成通用。檀弓成人有其兄死。釋文成本或作郕。亦其例。不必因說文云郕魯孟氏邑。遂謂郕是而成非也。此郕爲魯邑。與衛師入郕之爲國名者。名同而地異。郕國之郕亦可作成。蔡管世家封叔武于成。及公羊莊八年傳是也。公羊他處成邑亦可在郕。則左穀所載是也。

桓十一年公會宋公于夫鍾。

夫鍾公羊作夫童。穀梁麋氏本亦作童。按古鍾鐘通用。夫鍾之鍾蓋古經別本有从童者。後奪其半而成童。如禮記引說命爲兌命之比。水經淇水注。又東南逕千童縣故城。東史記建元以來王子侯者年表曰。故童也。一作千鍾。

桓十四年宋人以齊人、蔡人、衛人、陳人、伐鄭。

公羊衛先于蔡。毛西河春秋簡書刊誤云。此非蔡衛爭長之時。不必有次第可據。按下十六年夏四月。公會宋公衛侯陳侯蔡侯伐鄭。杜注云。蔡常在衛上。今序陳下。蓋後至。按梁正義引班序譜。自隱至莊十四年。四十三歲。征伐會盟。凡十六國。時無霸主。會同不并。無有成序其間。蔡與衛凡七會。六在衛上。唯此一在陳下。故以爲蓋後至也。又襄二十七年正義引班序譜。晉合諸侯二十國。起僖廿八年盡哀十四年。大率皆陳後次。蔡春秋初衛在陳上。莊十六年幽之盟齊。桓進之班在衛上。終于春秋見杜注。蔡後次衛。據此而言。蔡合先衛。若其後至。又當如十六年例。序于諸國後。今乃居衛陳之間。其爲誤倒無疑。當從古經。

又按若援昭公元年會于虢衛齊惡之例則蔡雖不以後至貶而衛自可以先至進衛序蔡上非必無說特以此經左穀皆同又其常例如是故疑公羊誤倒耳

莊元年夏單伯送王姬

送公穀作逆欲明送與逆之是非當先定單伯之爲周爲魯春秋毛氏傳及春秋簡書刊誤力闢單伯非魯大夫致詳明矣而猶有未及辨者今并正之陸氏淳以祭仲比單伯謂諸國大夫王賜之圻內邑爲號令歸國蓋亦知單非魯地而創立此論不知祭仲之祭非祭伯祭公之祭左傳桓十一年注祭鄭地陳留長垣縣東北有祭地而畿內之祭釋例土地名注云闕顧氏春秋大事表則以爲今河南開封府鄭州東北十五里有祭亭其非一地明甚晉之長垣縣則今大名府屬縣故程廷祚春秋地名辨異列之于二地一名類中且云賜圻內邑爲號者以爲實與其地乎則隱桓之間祭伯祭公祭仲並見經傳不容一邑而分二人以爲空假其名乎則三代時無此官制也祭仲旣非畿內邑則謂以畿內之單賜魯大夫者其說孤而無據矣俞氏臯又謂周有單子非單伯按釋例世族譜皆根據世本最可信其序單襄公爲單伯子此當是文十四年之單伯若送王姬之單伯則相去太遠則單子明卽單伯且如俞說將滕侯滕子薛侯薛伯杞侯杞伯杞子俱分爲二國乎是單子單伯之說不足疑也至劉氏斂鄭氏玉等復以下十四年文十四年之單伯左傳有明文者亦斷爲內臣以附會此經不信親見國史之左氏而徒于字句間推求其義亦可謂避實蹈虛矣故單伯決當作王官而逆決當作送

莊七年夏四月辛卯夜恆星不見夜中星隕如雨。

上夜字穀梁作昔毛氏刊誤亦知昔可訓夜而謂不應上夜作昔下夜不作昔按四庫提要云列子傳夜則昏憊而熟寐昔昔夢爲國君又偁夜亦昏憊而寐昔昔夢爲人僕正昔夜二字並用然則偶然異文無關義之長短也 阸公羊作質凡隂字皆同質一字耳見漢書司馬相如傳灑澦賓隊注

又按劉向治穀梁者而本傳載其上封事書引作夜常星不見夜中星隕如雨易恆爲當避文帝謚疑其初本尙不作昔矣

莊九年夏公伐齊納子糾

公穀作納糾按古經似亦但作納糾正義引賈逵云不言公子次正也下齊人取子糾殺之疏引賈逵云偁子者愍之則賈景伯本無子字也正義又引沈云齊人偁子糾故魯史從其所偁而經書子糾文在殺子糾下不在納子糾下則沈文阿本無子字也沈據杜注爲義略則杜元凱本亦無子字也正義又云劉與賈同則劉光伯本亦無子字也公羊釋文云納糾左氏經亦作納子糾亦作猶言或作乃別本偶異則陸德明所見本尙有無子字者也穀梁釋文則但云左氏作子糾不云亦作蓋言之不詳唯唐定本有子字蓋涉下文而誤今不從至前不偁子後偁子公羊謂貴宜爲君比于子般子野之例後儒多從之然鮑叔方請魯討而以宜爲君之辭奉之哉且何不正其名于初納之時而正其名于見殺之時也賈逵云愍之夫糾果不當立雖死于非罪不能憫其枉殺而加以尊偁春秋書法未聞有卹典也唯霞峯華氏春秋疑義

云鮑叔請魯討糾而僕子糾或疑子糾爲名非貴而僕子段氏意同其說似矣而猶未盡合蓋公子糾實單名糾上年傳文可據且春秋時人皆以子取字無取名者襄十五年左傳歷序公子午公子罷則必非字然他處屢以薳子連文然雖不取名而僕謂之間或配子字以成文如楚公子元僕子元鄭世子華僕子華宋公子朝僕子朝齊公孫明僕子昭四年宋公子城僕子城昭二十年其名本皆無子字僕子糾亦猶是也沈文阿所謂從齊人所僕也然則僕子不僕子皆可非義例所繫特歷據古本則左經實作糾不作納子糾耳

莊十六年冬十有二月會齊侯宋公陳侯衛侯鄭伯許男滑伯滕子同盟于幽

公羊會上有公字與僖十九年冬會陳人蔡人楚人鄭人盟于齊公羊作公會僖二十九年會王人晉人宋人齊人陳人秦人盟于翟泉公穀作公會同然彼處或是公羊原文此則俗刻所誤段氏引十九年徐彥疏云十六年冬會齊侯宋公以下同盟于幽經不言公會故知魯侯不至阮宮保陵勘記又引春秋繁露滅國下篇云幽之會莊公不往據此二證公羊原本無公字可知惠氏春秋說謂宜從公羊有公字者非從許男下公穀有曹伯二字按繁露滅國下篇云曹伯之所以戰死于位諸侯莫助憂者幽之會齊桓數合諸侯曹小未嘗來也然則江都所見本尙無曹伯不知何時妄加原加者之意見僖公以來齊桓凡有征伐會盟曹皆與齊宋陳衛鄭許同列今此盟亦適六國皆在而獨無曹故取以攬入許男下耳穀梁誤亦同當以古經爲正

莊二十年冬齊人伐戎

戎穀作我簡書刊誤謂不可攷按此固有可攷也齊魯自盟柯盟幽後卽修和好惟十九年齊宋陳伐我西鄙此必公子結會盟時有開罪三國者本非深仇旣已致討則亦已矣故二十二年遂及齊高傒盟于防公亦如齊納幣觀社和好如初而是時戎患方亟十八年公追戎于濟西二十四年戎侵曹二十六年公伐戎故齊桓亦有此役爲獻戎捷先聲其非伐我審矣又汪氏克寬云經書伐我十有九皆書四鄙惟哀八年吳兵至城下十一年齊師伐我戰于郊兩書伐我此言齊人則將卑師少安能深入乎其言尤得屬辭比事之法當從古經作伐戎無疑經書侵我者五亦皆言鄙

又按春秋繁露奉本篇云當此之時魯無鄙彊諸侯之伐衰者皆言我卽指哀八年吳伐我十一年齊國書帥師伐我二役也其說與汪氏殊然亦可見伐我例合書四鄙不書鄙者必有故今無故而不書鄙則非伐我也

莊三十二年春城小穀

三傳同然據公羊疏云二傳作小字與左氏異則古經實作城穀二傳乃作城小穀高氏闡張氏洽趙氏鵬飛李氏廉諸人未詳古經本文而曉曉致辨齊地之穀不名小穀因從范氏說以小穀別爲魯地力斥左氏爲管仲之非雖以顧亭林之工攷核而其日知錄杜解補正二書亦沿舊解是移公穀之經配左氏之傳固宜不合也李氏廉又謂此時桓未見有功于魯按魯自盟防之後與齊情好日密以小

事大必多得其庇護。特經傳文不具耳。且卽就經傳論。臧孫告糴齊侯獻戎捷。則有恩禮于魯可知。豈必待高子來盟而後爲功哉。今仍定爲城穀。以還古經之舊。以杜訾謾左氏者之口。

此條左氏無可議。杜注則可議。杜注云。小穀齊邑。濟北穀城縣城中有管仲井。釋例土地名云。穀、小穀二名。是其所見本已作小穀。孫志祖疑注中小字亦後人誤加是未攷釋例也。杜不能據善本審正。徐彥時左傳猶有作城穀者。則在晉非無善本可知。

而牽合其說。此則可議者也。但范氏之說亦無據。原范氏意。不過以城上不繫人。小穀上不繫國。必是魯事故。泛云魯地耳。而參稽他書。實未見魯地有名小穀者。後儒推衍范說。亦終鮮佐證。徒取孫氏尊王發微。謂曲阜西北有小穀城一語。果足信乎。故杜范之注。同一無據。而後漢郡國志云。穀城春秋時小穀水經濟水注云。濟水側岸有尹卯壘。南去魚山四十餘里。是穀城縣界。故春秋之小穀也。二書皆用杜義。則吾亦寧從杜。

莊三十二年冬十月己未子般卒。

己未公穀作乙未。以杜氏長麻推之。十月戊午朔。不得有乙未。乙未十一月八日也。此亦如僖二十年五月乙巳西宮災。穀作己巳。以長麻推之。五年癸未朔。不得有己巳。漢五行志上引作己酉亦誤。昭二十五年九月己亥公孫于齊。穀作乙亥。以長麻推之。九月戊子朔。不得有乙亥也。蓋乙巳字形相似而訛。當從古經。襄二十一年公羊疏云。何氏自有長麻。不得以左氏難之。錢大昕養新錄。謂疏家依違其詞。無明文可證。

僖二年秋九月齊侯宋公江人黃人盟于貫。

貫公作貫澤。按公羊九年傳貫澤之會解云：卽上二年秋九月齊侯宋公江人黃人盟于貫是也。而此言于貫澤者，蓋地有二名，然則此經本無澤字。今有之者，不知何人據九年傳增貫，一名貫澤，如榮一名榮澤，澤沙，一名沙澤也。又杜注貫宋地，梁國蒙縣西北有貫城，貫與貫字相似。莊十二年宋萬弑閔公于蒙澤，注蒙澤宋地。梁國有蒙縣，是貫與蒙澤近，蒙以澤名，必其地有大澤，故貫亦得僞貫澤也。春秋繁露

穀之會蓋據九年傳。

僖七年秋七月公會齊侯宋公陳世子款鄭世子華盟于甯母。

甯穀作寧。與宣十一年公孫寧昭二十二年宋向寧廿八年鄭伯寧。滕子寧公羊作甯者正同。按寧甯古通用甚多。史記酷吏傳寧成漢書作甯成。徐廣史記注已史記引過秦論六國之士有寧越漢書作甯越。前漢地理志上谷郡有寧縣廣寧縣後漢郡國志作甯縣廣甯縣皆是也。郡國志山陽郡方輿有泥母亭或曰古甯母泥甯亦聲之轉。

僖十有一年春晉殺其大夫丕鄭父。

三傳同。段氏據徐彥公羊疏云：左氏經無父字，又攷左氏傳言丕鄭者四不言父，則其經之無父字明矣。按徐彥所見左氏恐是後人據傳刪經，未爲善本。古經當實有父字。古人命名多配以父，取字多配以子，皆泛詞也。傳謂之間可從省。如傳叔興父爲叔興，宋子哀爲宋哀之類，而經文據實直書，則不宜

省故箕鄭見于文七年傳而九年經則書箕鄭父。晉甲見于文十二年傳而宣元年經則書晉甲父。此之傳不言父而經言父其例也。

僖二十一年秋宋公、楚子、陳侯、蔡侯、鄭伯、許男、曹伯、會于孟。

孟穀作零或爲字。公作霍。按此展轉訛之跡顯然。穀作零者。零孟音同也。公羊後穀梁而出。又因穀之零而誤霍。則以形近也。蓋穀梁一誤而公羊再誤也。但漢五行志下下引董仲舒劉向說春秋隕石于宋五六鶴退飛過宋都事亦云爲零之會。二人治公穀者疑其初本尙與古經合矣。

僖二十三年秋楚人滅夔以夔子歸。

夔公羊作隗。按周國隗夔爲二國。史伯對鄭桓公曰。西有虞虢晉隗霍楊魏芮。又曰。姓夔越不足命也。蓋一在西一在南。風馬牛不相及。今以隗當夔。不幾疑于西方之國乎。水經江水又東過稀歸縣之南注云。縣故歸鄉。地理志曰。歸子國也。樂緯曰。昔歸典叶聲律。宋忠曰。歸卽夔歸鄉。蓋夔鄉矣。然則以夔爲隗。猶之以夔爲歸。皆聲相近而誤。其本字則當作夔。

文九年冬楚子使叔來聘。

椒穀作萩。或作菽。公羊一本作萩。按萩椒雙聲。左傳昭三年子服椒十三年作子服湫。襄二十六年楚椒舉椒鳴。楚語作湫舉湫鳴。古今人表亦作湫舉。哀元年敗越于夫椒。史記伍子胥傳作夫湫。椒之爲萩。猶椒之爲湫也。又說文無椒。卽荼字是字形尤與萩易混。而萩字亦或作楸。又與椒字從木者易混。

此椒萩菽三字所由別出也。

文十一年夏叔仲彭生會晉郤缺于承匡。

公穀無仲字。左傳釋文云。叔仲彭生本或作叔彭生。仲衍字非也。古經當有仲字。叔仲乃彭生之氏。不宜去其一。凡左傳偁叔仲氏皆二字連文。古經當亦然。且魯固有叔氏。叔肸之後是也。左傳于孟孫氏、季孫氏、臧孫氏。或單偁孟氏、季氏、臧氏。而于叔孫氏無單偁叔氏者。嫌于叔肸之族也。傳文尙謹嚴如此。何況于經。彭生時未有叔氏。然舉全書而論。終嫌無別。然則古經必作叔仲可知。不知何時奪去仲字。而二傳仍之。下十四年古經亦無仲字。則闕文如定六年經。偁仲孫何忌爲仲孫忌也。此三傳竝同之闕文。公羊哀十三年晉魏多師師侵衛則獨公羊之乃從而爲之辭。闕文云譏二名者。釋文不以十四年經爲闕。而以此經爲衍誤。信公穀之過。至漢五行志下。下引作叔彭生者。乃董仲舒劉向之言。二人治公穀固宜如是。若水經陰溝水注引。則有仲字矣。俗刻無此。據武英殿聚珍版原

定六年杜注云。何忌不言何闕文。而下十四年叔彭生注。不云闕文。則杜所見左氏。恐當有仲字。其無仲字者。當是或本。如此年經釋文。亦云本或作叔彭生也。

文十三年邾子蘧蔭卒。

公穀作蘧蔭。段氏謂公穀爲正。蘧蔭竹席也。此以器爲名也。按蘧蔭爲竹席。亦爲惡疾。如詩蘧蔭不鮮是也。而惡疾之蘧蔭。又作蘧蔭。漢書敍傳下。舅氏蘧蔭。幾陷大理是也。左傳雖有名子。不以隱疾之言。

而春秋時以隱疾命名者正多。如宋平公太子名痤。說文。痤。小腫也。一曰族瘡。齊慶繩名夷。說文。夷。頭裹飢夷態也。然則邾子之名或以器或以疾皆不可知。以器則字不能从艸。以疾則从艸从竹皆可。無以定二傳之必是。而左經之必非也。鄭君禮注謂隱疾衣中之疾。疾在外者雖不得言。尚可指摘此則無時可辟。然則非避不祥也。故蓮藻等可取爲名。以非隱疾故。

文十七年夏四月癸亥葬我小君聲姜。

聲公作聖。按史記衛世家。聲公世本作聖公。見索隱。蓋聲聖音之轉也。然必是聲訛聖。非聖諱聲。知者以周書謚法解。偁善賦簡曰。聖敬賓厚禮曰聖。皆非婦人所宜。而婦人謚聲者。則有隱公之母聲子。齊靈公之母聲孟子。公孫敖之妻聲己。謚法不生其國曰聲。聲姜其殆生于外家者與。

春秋古經說卷二

宣八年夫人嬴氏薨。

嬴公穀作熊。按春秋時嬴熊分兩姓。伯益後爲嬴。如秦徐江黃諸國皆是。熊則不知何人後。桓十二年左傳羅人欲伐之注。羅熊姓國正義以爲世本文。今以音近而嬴誤熊。不幾于紊亂世族乎。

宣八年楚人滅舒蓼。

蓼穀作蓼。本又作蓼。按左氏桓十一年傳。將與隨絞州蓼伐楚師。釋文文五年傳。楚公子燮滅蓼。釋文哀十七年傳。是以兗州蓼釋文俱云蓼。本或作蓼。詩漸漸之石箋亦偁舒鳩舒蓼。而釋文云本又作蓼。是蓼蓼通用。或據說文邑部蓼地名从邑蓼聲。謂穀梁爲正。則恐未然。前漢志六安國蓼縣下本注云故國皋陶後爲楚所滅。後漢志廬江郡蓼侯國。此實沿古之舊偁。知本不作蓼。公子燮所滅之蓼與見地觀杜注自明。與舒蓼則似爲一正義說也。春秋大事表從高氏地名攷。謂三蓼當分三國似更確。今姑從正義。且說文不云國名。而但云地名。卽許意亦未必以舒蓼當之。

宣十五年仲孫蔑會齊高固于無婁。

無婁。公羊作牟婁。按郊特牲之母追釋名釋首飾以爲牟追。卽禮記釋文亦云母音牟。列子黃帝篇。列禦寇爲伯昏無人射。釋文無莫侯反。又左氏襄十四年傳執莒公子務妻。務徐音莫侯反。荀子成相篇。

舉車光卽務光是無務古音皆如車。

又按隱四年莒人伐杞取车婁昭五年莒车夷以车婁及防茲來奔是车婁實有其地左疏謂莒取之後常爲莒邑據經文而言也春秋大事表以無婁公作车婁謂卽莒人所取者則是時莒恃晉而不事齊齊比年伐之仲孫高固何由會于其地且釋例土地名于车婁下注云城陽諸縣東北有婁鄉隱四年注于無婁下注云闕則不合爲一地可知但杜以無婁屬杞穀梁注同亦有可疑者此事傳無明文杜亦不能實指無婁所在仲孫高固復非杞大夫杜果何見而云杞邑乎第其分無婁车婁爲二則似得古經之旨以齊莒方惡故也公羊作车非獨以音相近當亦涉隱四年昭五年經文而誤。

成元年秋王師敗績于茅戎

茅公穀作貿漢五行志屢引皆作貿按古音茅如矛小雅露彼菅茅下與猶韻離騷莖蕙化而爲茅上與留韻而檀弓賈貿然來釋文貿一音牟是茅貿可同音故古經作茅二傳作貿也衛康伯傳據釋例土地名河東大陽縣西有茅亭卽茅戎而文三年左傳注茅津亦在河東大陽縣西故括地志謂茅戎以處晉之茅津得名則古經作茅乃其本字也

成二年六月癸酉季孫行父臧孫許叔孫僑如公孫嬰齊帥師會晉郤克衛孫良夫曹公子首及齊侯戰于牽

首公穀作手按首者正字手者假借字古多通用士喪禮左首進簪注古文首爲手大射儀相者皆左手牽

何瑟後首注古文後首爲後手。左氏古文而作首。公穀今文裏二十五年左傳授手于我家語作授首于我漢書古今人表。駁手說文支部作駁首。宣二年左傳趙盾士季見其手釋文手一本作首。莊子達生則捧其首而立。釋文首本作手皆通用之證也。公羊又作午者則更由手而訛。至宣十七年孔疏云沈氏引穀梁傳云曹公子首偃當是誤涉左傳文經義雜記據此謂古本穀梁與左傳同則恐非也。

成十二年夏公會晉侯衛侯于瑣澤。

瑣澤公作沙澤。按定七年齊侯衛侯盟于沙。公亦作沙澤。蓋卽合爲一地。然定七年左傳以沙爲瑣。則此年公以瑣爲沙。非無據。蓋沙本有娑音。闕宮詩傳有沙飾也。釋文沙蘇河反。刻鳳皇于尊。其羽形娑娑然也。正義云傳言沙卽娑之字也。娑瑣音近。故一地二名。或又加澤字者。如榮一名榮澤。貫一名貫澤耳。杜注瑣澤地闢沙陽平元城縣東南有沙亭分作二地似非。襄十一年諸侯伐鄭次于瑣鄭地也昭五年越大夫常壽過帥師會楚子于瑣楚地也。皆不得與此瑣相混。

成十五年癸丑公會晉侯衛侯鄭伯曹伯宋世子成齊國佐邾人同盟于戚。

成公作戌。釋文云本或作成。按此宋平公也。昭元年公羊注云戌惡皆與君同名。戌謂向戌。君卽指平公。然則公羊實作戌。釋文所云或本非公羊原文。乃據古經改也。今刊定知古經爲合。史記十二諸侯年表及宋世家皆作成。不作戌。又春秋時雖或君臣同名。如鄭簡公名嘉。而同時有公子嘉。晉定公名午。而同時有郿鄆午之類。洪稚存更生齋文集有春秋時君臣上下同名不甚避諱論然究屬變禮。向戌號偁名卿。未必犯此不韙。

也。公羊特以成戌形近而訛。如哀十三年許男成卒。公亦作戌。定四年杞伯成卒于會。公作戌。又作戌。

作文二年左傳宋公子成釋文成本或作戌。
莊子大宗師釋文成本或作戌。

襄元年仲孫蔑會齊崔杼。曹人邾人杞人次于鄆。

鄆公作合。穀亦或爲合。段氏改古經爲鄆。謂本作會。會合音義皆通。一寫作鄆。再寫訛鄆。其說甚創。然非也。段謂僖十四年釋文。鄆始見。音似陵反。以後不爲音。惟此字音才陵反。恐本是古外反。淺人改之。按僖十四年以下。鄆之見經傳者皆同。是姪姓之國。故音義不復重出。此則雖同字而實異地。嫌有別音。故復出之。安得因此疑本作古外反也。段又謂杜注。鄆地在陳留襄邑縣東南。據此可知。鄆乃鄆所誤。古者鄭國處于留。鄭伯寄孥與賄于虢。鄆以取其國而遷鄭焉。而野留孟康曰。留鄭邑也。後爲陳所并。故曰陳留。此所次蓋鄭東鄙。錯于宋境者。古爲鄆地。故名之。按僖三十三年杜注云。鄆城故鄆國。在滎陽密縣東北。與此年注鄆在陳留者顯分爲二。何可牽合。孟康漢書注以證杜註作鄆。又況劉昭注司馬彪郡國志。于陳留郡襄邑下明云。襄元年會鄆。杜預曰。縣東南有鄆城。水經淮水注下明云。又東逕鄆城。春秋襄元年經書晉韓厥帥師伐鄭。魯仲孫蔑會齊曹邾杞次于鄆。杜預曰。陳留襄邑縣東南有鄆城。引經引注皆作鄆。不作鄆也。鄭國處于留之說。發墨守所不取。今姑無論此。然則公穀作合者當是由鄆誤會。由會誤合。段氏云云。未免以末爲本矣。

襄五年公會晉侯、宋公衛侯、鄭伯、曹伯、齊世子光、救陳。

公穀曹伯下有莒子邾子滕子薛伯按此涉上文咸之會及後數年伐鄭會祖莒邾滕薛皆從而致誤也必知是二傳誤而非左氏奪文者齊世子光位次在薛伯下十年先至于師始長滕薛十一年始復長莒邾此時尙仍其舊若左經有斷爛當并奪齊世子光不應獨于其中奪去四國故知二傳誤衍毛氏簡書刊誤云前會有吳人鄖人而此亦無之則不必與前會相同是也公穀口授之本多有相涉而誤者如莊十六年同盟于幽有曹伯則誤于侵蔡會首止諸役說見前八年盟于洮有鄭世子華則誤于甯母之盟也襄二十二年會沙隨有滕子二十九年城杞有邾人則誤于圍齊盟澶淵會夷儀諸役也此其致誤之由皆可灼然如晦之見明矣

襄十年夏五月甲午遂滅偪陽

偪陽穀作傅陽公與左氏同而解云左氏經作偪字凡徐彥疏文必公羊異左經者始云左氏作某今經文不異而亦云然恐徐彥所據本非作偪然今不可攷矣偪徐甫目反又彼力反惠氏補注引古今人表福陽子則偪當讀爲福謂徐仙民音是而傅又福之轉故鄭語偁妘姓鄖鄧路偪陽而前漢志楚國後漢志彭城郡俱有傅陽縣隨宜偁之無關體要

襄十年冬盜殺鄭公子駢公子發公孫輒

駢公穀作斐按古人名字必相應如名偃字子游名施字子旗之類義略可尋公子駢字子駢則尤顯然者駢一乘也駢驂旁馬也必得駢而後成駢詩干旄正義引王肅云夏后氏駕兩謂之麗殷益以一

駢謂之驂。周人又益一駢，謂之駟。左傳桓三年正義云：名駢者，以駟馬有駢駢之容。然則名駢字子駟，義始相配。公穀易以聲相近之字，非子駟命名本旨矣。

襄十有一年秋七月己未，同盟于毫城北。

毫公穀作京。徐彥疏云：服氏之經亦作京城北，乃與此傳同之也。按史記集解晉世家：襄十一年左傳正義引服虔九合諸侯註俱作毫。使云涉杜本偶誤不容兩引皆同。又韋昭後于服而先于杜。其注晉語亦作毫。則自東漢三國以來別本多不作京。但今審定似宜從徐彥所見服本。惠徵君補注云：京、鄭地在滎陽。隱元年傳謂之京城毫無攷。春秋大事表則謂毫當在今河南府偃師縣西二十里。蓋偃師爲湯所居之毫，故取以當之。然杜注但言鄭地而不詳所在，果卽偃師之毫，其文易見，何獨闕如，則此非杜氏旨也。徵君謂無攷者，究得闕疑之義。

襄十二年春王三月，莒人伐我東鄙，圍台。

台穀作邰。按杜注云：琅邪費縣南有台亭，而後漢郡國志泰山郡費縣下亦作台亭。蓋皆因舊名爲偁。則此地本名台可知。穀作邰者，台邰古通。詩生民卽有邰家室。白虎通京師引作卽有台家室是也。據釋文：穀梁本又作台，則亦與古經同矣。

襄十四年己未，衛侯出奔齊。

公羊作衛侯衎。毛氏簡書刊誤于二傳抨彈不遺餘力，獨此條謂諸侯出奔例書名，此簡書闕文。公羊

補之爲是。按諸侯出奔有書名者，北燕伯款出奔齊，蔡侯朱出奔楚之類是也。有不書名者，衛侯出奔楚及此是也。其義例皆難以強通。如曰從赴則列國來告亂，安得直偁其君名？禮所云諸侯失地名者，正指書法而言，非指臣子赴告。故論書法則皆宜名，論赴告則皆不宜名。如曰復歸國者不名，則鄭伯突、衛侯朔亦復歸何以名？卽謂突奪正朔得罪天子，特名以惡之矣。而鄭伯未復國，又何以不名？且譚子弦子溫子皆不名，或又謂譚子等國滅而奔，與兄逐而奔者不同。則徐子章禹又何以名？董江都言春秋無達例者，其在斯乎？後儒望文生義，未必盡當。筆削之旨，闕疑可也。故此之不名，未見公羊是而左穀必非。

襄十七年王二月庚午，邾子晉卒。

晉公穀作瞷。按攷工記梓人云：數目願脰注。故書願，或作晉。鄭司農云：晉讀爲鬚頭無髮之鬚。孟子宋牷將之楚。荀子非十二子作宋餅。蜀志簡雍傳注云：本姓耿。幽州人語謂耿爲簡，蓋皆聲之轉也。劉昌宗周

禮音晉苦顏
反又客田反

襄十七年秋，齊侯伐我北鄙，圍桃。

桃公羊作洮。按桃、洮皆魯地。莊二十七年公會杞伯姬于洮。僖二十五年公會衛子莒慶盟于洮。此與年盟于洮之爲曹地者不同，正義誤合爲一。此地之名洮者也是。年圍桃及昭七年傳乃遷于桃，則桃邑也。杜注魯國卞縣東南有桃墟，而于洮則但云魯地。釋例土地名注云：闕，蓋不能實指其所在。然以會杞伯姬會衛子莒。

慶推之必其地與三國相近三國皆在魯西南此云伐我北鄙則非洮明矣公羊徒以聲近而訛不知其誤合二地爲一有斷不可者也穀梁莊二十七年釋文洮本作桃其誤亦猶是也

襄十九年春王正月諸侯盟于祝柯

柯公羊作阿按柯阿原同音通用如水經河水注之柯澤卽左傳襄十四年之阿澤但此地則實作柯不作阿一徵之後漢郡國志云平原郡祝阿春秋時曰祝柯一徵之水經濟水注云春秋襄公十九年諸侯盟于祝柯俗刻訛阿武英殿板不誤左傳所謂督揚者也漢興改之曰阿矣據此知明是公羊漢世始著竹帛習于當時之稱因以阿易柯而不知非聖經本文也哀三年季孫斯叔孫州仇帥師城啓陽公羊作開陽亦因當時避漢景帝諱而改也穀梁仍作啓公羊後出于穀梁此亦一證

襄十九年鄭殺其大夫公子嘉

嘉公作喜按此鄭子孔也說文乞部云孔通也从乞从子乞請子之候烏也乞至而得子嘉美之也故古人名嘉字子孔今以左傳攷之如楚成嘉字子孔宋孔父嘉亦名嘉字孔父杜氏以爲孔父名者非說詳惠定字補注則鄭之子孔其爲名嘉無疑況鄭固別有公子喜子罕是也未聞被殺襄二年左傳載子罕當國八年傳敍鄭六卿則子駟居首而子罕之子子展已爲卿子罕蓋早卒矣公羊未見國史不知孰爲喜孰爲嘉特以字形相似而誤如鄭簡公名嘉見于春秋史記鄭世家亦作嘉而十二諸侯年表則作喜也後漢書獻帝平四年衛尉張喜爲司空注引獻帝春秋喜作嘉亦

此類初又劉植傳植與弟喜從兄歆注引東觀記喜作嘉亦

襄二十五年冬鄭公孫夏帥師伐陳。

夏公羊作囁囁、蠻之異文。二傳作蠻。公羊作囁。定九年鄭伯蠻卒亦同。公孫蠻者，鄭子矯也。公孫夏者，鄭子西也。襄十九年左傳于四月丁未鄭公孫蠻卒赴于晉大夫，則是時子矯之卒久矣。公羊有于人名偶誤一字而卽大事事實者，如以鄭公子嘉爲公子喜，而不知喜固先卒也。見前以衛世叔儀爲世叔齊。襄二十年而不思齊乃儀曾孫城杞時恐尙未生，卽生亦尙幼也。口授本之不足信，類如此。

襄三十年春王正月楚子使薳罷來聘。

罷公作頗。一作跋。按罷古音如婆。凡皮聲之字古皆在第十七歌戈部。羔羊之反下叶紇。牛則有皮下叶多那。從其有皮下叶何可證也。又楚辭修繩墨而不頗。王逸注引易曰無平不頗。而今易作無平不陂。陂卽罷之去聲。跋又破河反古無四聲之分，則罷頗實同音矣。故左作罷公作頗。

襄三十一年十有一月莒人弑其君密州。

公穀同。而左傳作買朱鉏。杜注買朱鉏密州之字大謬。春秋經傳無偁人君字者。段氏經韻樓集謂買密雙聲。朱州疊韻。州爲朱鉏。猶邾爲邾婁。買朱鉏者莒語。經從中國傳從主人。歷引大原、大齒、善、伊、稻、緩、賁、泉、矢、昭諸地名證之。然人名亦有可證者。吳子乘傳偁吳子壽夢。襄十年正義引服虔云壽夢發聲。吳蠻夷言多發聲。數語共成一言。壽夢一言也。經言乘傳言壽夢欲使學者知之也。然則密州其猶

吳子乘與買朱鉏其猶吳子壽夢與或據左傳謂古經本云買朱鉏則其謬更甚于杜昭四年春王正月大雨雹。

雹公穀作雪按徐彥疏云正本皆作雹字左氏經亦作雹字故賈氏云穀梁作大雨雪今此若有作雪字者誤也則惟穀梁作雪公羊仍作雹但漢五行志中下云昭公四年正月大雨雪劉向以爲昭取于吳而爲同姓謂之吳孟子君行于上臣非于下又三家已強皆賤公行慢侮之心生董仲舒以爲季孫宿任政陰氣盛也劉向治穀梁以爲雨雪固宜董治公羊而亦同其說則公羊向有別本作雪不獨陸氏釋文本爲然矣穀梁作雪而范氏云雪或爲雹釋云左氏爲雹故范疑之是范祗據左氏而言非有或本今審定知雹是而雪非何者春秋書大雨雪凡三桓八年冬十月雨雪則周之八月也僖十年冬大雨雪則周之八九十月也皆不宜雪而雪故書以志異隱九年三月大雨雪順天時矣而又與震電兼行故亦異而書之若此年正月大雨雪時令既合又無震電之災何足書乎且申豐之言又豈左氏僞造乎然則穀梁訛雹爲雪正如僖十年公羊訛雪爲雹耳

昭七年叔孫婼如齊澆盟

婼公作舍下同按婼字从女若聲若字有惹音如後世偁蘭若般若故婼字亦有兒遮反一音見漢書趙充國傳將婼月氏兵四千人蘇林注服虔音兒師古從蘇音如此讀則與舍聲相近又徐仙民婼音釋而舍古亦多讀爲釋舍菜舍奠卽釋菜釋奠周禮占夢乃舍萌于四方太史凡射事飾中舍算鄭君皆讀舍爲

釋故古經作婼音釋。公羊作舍也。此說似勝前說錢魯事謂徐仙民多古音惠徵君亦謂晉以來惟徐仙民識古諸儒皆不及簡書刊誤謂因武叔之子名舒舒舍轉音而訛恐非

昭十有五年夏蔡朝吳出奔鄭。

朝公作昭。又無出字。按朝昭音同不必辨。其無出字則大非。春秋書法奔與出奔有別。不言出奔之例。凡三國滅不言出。公羊莊十一年有傳如譚子奔莒弦子奔黃溫子奔衛徐子章禹奔楚是也。此不可例之于大夫者也。天子以天下爲家故自周無出。左氏成二年有傳如王子瑕奔晉尹氏召伯毛伯以王子朝奔楚是也。此又不可例之于列國大夫者也。若列國大夫則自外行者不言出。公段文七年有傳如晉先蔑奔秦公孫敖奔莒歸父奔齊是也。今朝吳于是三者俱不合。則有出字何疑。邵公之注迂曲無當宜從古經。

昭二十一年冬蔡侯朱出奔楚。

朱穀作東云東者東國也。按朱爲蔡平公子東國則平公弟朱叔父也。朱之出奔正爲費無極取貨于東國故朱出而東國立事載左傳甚明。穀梁未見國史因朱字訛作東。又見下二十三年蔡侯東國卒于楚遂誤合爲一人不知東國立後自以他事如楚而卒如許男甯卒于楚之比非昭公薨于乾侯之比也。穀又云何爲謂之東也惡之而貶之也則自來誅絕之法無去人名一字以爲貶者其謬更不待辨矣。至朱未出奔之先左傳載其失位位在卑昭子決其不然而漢五行志下下引董仲舒說則云蔡侯朱驕君臣不說驕與卑正相反當從左氏。

史記十二諸侯年表平公薨靈公孫東國殺平侯子而自立蔡悼侯東國元年奔楚世家但載東國攻奔平侯子不載其出所云殺平侯子者卽謂逐蔡侯朱特誤以逐爲殺朱旣見殺不能再出奔遂以奔楚屬之東國蓋其敍事離合參半大事表據此謂當從穀梁非是史記不如左傳可信也又左傳載沈尹戌之言明云出蔡侯朱

昭二十四年 姹至自晉

公羊作叔孫舍至自晉按宣元年遂以夫人婦姜至自齊公羊傳云遂何以不偁公子一事而再見者卒名也最得經旨今以其說推之如歸父還自晉至笙遂奔齊猶如以夫人婦姜氏至自齊豹及諸侯之大夫盟于宋意如至自晉皆蒙上文故不偁氏卽仲遂卒于垂亦一事再見之例也孔疏謂省文從可知是也牛農春秋說云稱公子于前稱仲遂于後合之則爲公子仲遂猶公子季友公羊以爲貶與元年傳違是知二五而不知一十也左穀俱未憭此後儒更從而爲之辭無足置辨必當以公羊爲正然則此年婼至自晉正蒙上執我行人叔孫婼之文而獨再書族公羊可謂自亂其例矣宜從古經

定四年 晉士鞅衛孔圍帥師伐鮮虞

圉公羊作圉虞公羊或作吳按今人分圉爲獄名圉爲養馬之名古則不然說文卒部圉圉所以拘罰人从口卒一曰圉垂也一曰圉人養馬者口部仍有圉字曰守之也與拘罪人意略同則圉圉通用故禹貢西傾朱圉烏鼠前漢地理志天水郡下後漢郡國志漢陽郡下俱作朱圉淮南人間訓馬圉論

衛逢遇作馬圉。虞或作吳者。則如北吳後世謂之虞。前漢志下詩不吳不敖。史記武帝紀引作不虞不敖。不吳不揚。漢衛方碑引作不虞不揚。聲相近也。釋名釋州國吳成也。

定四年冬十有一月庚午。蔡侯以吳子及楚人戰于柏舉。

柏公穀作伯舉。公羊作莒。按舜典伯與左傳文十八年伯奮。伯虎襄四年伯因。昭二十年逢伯陵。二十八年伯封。列子伯益。尸子伯陽。漢書古今人表皆作柏。穆天子傳河宗之子孫蒯伯絮注古伯字多从木。此伯柏通用之證也。史記蔡澤傳而從唐舉遊索隱引荀卿書作唐莒水經江水又東過邾縣南注北岸烽火洲。卽舉洲也。北對舉口。仲雍作莒字。此莒舉通用之證也。故古經作柏舉。公穀作伯莒。伯舉。

定十二年冬十月癸亥公會齊侯盟于黃。

齊公作晉。按黃者齊地桓十七年公會齊侯杞侯盟于黃。宣八年公子遂如齊至黃乃復是也。隱元公敗宋年師于黃。則爲宋地。與此異。釋例土地名注云。闕或曰東萊黃縣非也。黃在齊衛之間。路史謂登州府黃縣東南有古州府黃縣卽晉之東萊黃縣杜氏已斥其非路史蓋未攷釋例然則此年盟于黃必齊侯無疑。或謂沈姐蓐黃晉主汾而滅之。安知晉不以舊國爲地名。然于經傳無稽也。且上年冬及鄭平魯始叛晉而齊自與衛侯盟于沙。後亦結謀叛晉。故齊魯共爲此盟。安得以爲晉侯哉。其誤蓋同于昭十年經齊欒施作晉欒施矣。

哀四年春王二月庚戌。盜殺蔡侯申。

申字三傳同。左傳正義及釋文俱云。宣十七年蔡侯申卒。是文侯也。昭侯是文侯元孫。不應與高祖同。

名未詳何者誤。段氏因謂史記作昭侯甲，則此申字誤。按文侯之父莊公甲午，則甲亦葬先君名也。雖二名不偏諱，而子孫終未必以此取名。況汲古閣本史記仍作申，不作甲，則二君之名亦疑以傳疑可詳耳。段氏擅改古經非至殺字。公穀作弑。段謂古經亦當作弑，則甚確。僖九年冬晉里克殺其君之說子奚齊公羊作弑段亦從公說

詳經韻樓集中，茲不具列。

二月公作三月以杜氏長庶推之。三月己未朔不得有庚戌日。

哀四年六月辛丑毫社災。

毫公羊作蒲。簡書刊誤云：此勝國之社，以舊都商毫故名焉。得有別出字。按毛說非也。臧玉林經義雜記云：郊特牲薄社北牖注薄社殷之社殷始都薄。釋文薄本又作毫。書序將遷其君于蒲姑。釋文蒲如字徐又扶各反。馬本作薄。史記周本紀作遷其君薄姑。是薄蒲毫三字古通。然則毫社未嘗不可作蒲社。特邵公不悟蒲卽毫，以蒲爲先世之亡國，在魯境。徐彥更申其說。謂蒲者古國之名。天子滅之以封伯禽。此則大謬耳。又攷董仲舒治公羊，而漢志載其遼東高廟災對。凡兩引皆作毫社。春秋繁露王道篇亦兩引皆作毫社。近抱經堂校定本依公羊改爲蒲然以漢志例之則不改亦可則公羊初本實作毫。徐彥疏引賈氏云：公羊曰薄社，則又或作薄。當是由毫轉薄，由薄轉蒲。毫薄音同，蒲薄形聲俱相近也。

哀六年齊陳乞弑其君荼。

荼公作舍。九經古義云：釋文荼音舒。史記律書舍者，日月所舍，舍者，舒氣也。是舍有舒義，故有舒音。按

穀梁釋文荼尙有丈加反一音又漢書江都易王傳使男子荼恬上書蘇林曰荼音食邪反地理志長沙國荼陵師古曰荼音弋奢反又音丈加反皆與舍音相近則荼之轉爲舍恐是因丈加反之音而訛非因舒音而訛也。



讀 春 秋



趙 良 霽 著

讀春秋

本館據涇川叢書
本排印初編各叢
書僅有此本

讀春秋卷上

清 肖巖趙良靄著

百二十國寶書吾不得而見之矣所見者惟夫子之春秋夫子修春秋以明王道固必有所筆削以寓權衡而學者不見魯史舊文究不知何句何字爲所增損孟子曰其文則史是夫子雖有增損因仍者多而欲於千百年之後推求聖心于一二字之間雖朱子不敢據以自信況後人乎顧三傳皆註春秋而左氏每有背于經公穀又往往不同于左漢儒著論互有短長而卒並傳不廢則知聖人之心如天春秋之理如日而坐井亦天容光亦日豈惟三傳唐宋以來諸儒之說經者多矣自非好爲穿鑿而據同然之心以揣當然之理微文大義遞有發明亦如人之遊於光天化日中者各執所見以擬諸形容大小固殊總之不離乎天日矣鄙不敏幼承先訓屢講是經今老矣恐提命多所遺忘卒如盲于目者之幾非天日所能曜也因讀而述之

春王正月隱公

不曰王春正月而曰春王正月先儒於是有夏時冠周月之說然考桓之篇書春無冰冬雨雪以誌災異其非夏時甚明時與月俱從周則天之所爲卽王之所爲何不可以王冠春蓋春秋魯史也諸侯奉王正朔朝廟聽政必行于每月之初事係于月不係于時故先言春而惟以月屬王見周朔之頒行于列國也

元年正月必行卽位之禮。隱不書卽位者。蓋探惠公之邪志。以位爲桓之位而已。特攝焉耳。攝必有歸。攝之久而不歸。則奸臣必有覬覦于其間者。公之弑兆于此矣。

公及邾儀父盟于蔑

及者。內所欲也。邾爲魯之附庸。地近而親。誼聯一體。公初卽位。不布誠信于邾。而與之刑牲歃血。要質鬼神。是上下無同德。而有違心也。傳謂邾能修好息民。而書儀父以貴之過矣。黎氏淳曰。儀父名也。附庸例書名。

鄭伯克段于鄢

克者何。穀梁謂殺之是也。其不言殺而言克。殺易而克難也。言殺則罪專在莊。如天王之殺其弟佞夫矣。言克則莊固有以制段。段亦有以敵莊。勢均力侔。固處于不能兩立之地。而莊不殺段。則段必殺莊。春秋不言出奔可知矣。使果自鄢奔共。則以段之包藏禍心。必不能靖。何不聞其據邑以叛乎。

天王使宰咺來歸惠公仲子之賄

宰咺稱名。以天王下贈諸侯之妾也。妾母之卒。不赴不祔禮也。桓未卽位。而仲子係于惠公。固未成之爲夫人。使魯不以其喪赴告王室。王亦何由知之而贈之。則亂嫡妾之分者。隱公之罪也。於周何與。然冢宰掌建邦之六典。諸侯有壞法亂紀者。而無以正之。亦不得辭其咎矣。

及宋人盟于宿

及者公也。公求成于宋，故與其大夫盟于宿，宿亦預盟也。陳氏傳良曰：三國共爲盟，參盟之端見矣。然則春秋之諱公不書，非諱其屈已以敵微者也。謹參盟之始也。

公會戎于潛

戎之雜居中夏者，種類不一。此其近于魯者，費晉所謂徐戎是也。潛，魯地。戎踰境以修惠公之好，而公往會之，非公有求于戎也。春會而秋後盟，則固辭之而不得矣。然戎非我族類，其心必異。既躬與于會盟，而凡伯下聘，明知爲魯而來，顧敢要于路以伐之？則必有以窺魯之無能爲矣。決内外之防，而招戎狄之禍，實自于潛于唐始。故春秋惡之。

莒人入向

入者，造其國都，毀其宗祏，遷其重器之辭，雖得而弗居，未遽滅之。然觀宣公四年伐莒，取向，則向之夷爲莒邑，於其始入之時而已。知有終并之勢也。莒，小國也。敢干王法爲兵首，直書之而惡已見。其曰人者，春秋詳內略外，自宣以前，內大夫名，外大夫則人之。故下經魯師入，極其惡亦與莒同，而無駁以名見也。

夫人子氏薨

婦人之爵從夫。隱既不自爲君，則不以其妻爲夫人。子氏宜書，卒不書薨矣。或曰：書薨，臣子之辭，然使公不喪以夫人之禮，則國史必不敢書夫人，亦猶公不行卽位之禮，而國史亦不書卽位也。乃書薨而不書葬，是葬以夫人而不葬以小君。公之視其妻，若以爲夫人，若以爲非夫人，則羣臣之視公亦若正其爲君。

若未正其爲君，而非有天澤不易之義也。翬之心從此生矣。使謂夫人從君先卒，則不書葬。彼晉人之如周葬穆后者，何以說焉。

尹氏卒

王臣卒而書於魯之冊者三。尹氏及王子虎、劉卷是也。天子之卿無外交，其喪不宜赴于諸侯。而虎曾泣踐土之盟，卷能合召陵之師。天王念其功而爲之赴，故不舉爵第稱名也。尹氏之卒亦天王爲赴耶？乃不舉其名而舉其族，豈以尹氏太師維周之氏第稱族而天下無不知其人耶？其世爲上卿，權逼天子，亦赫赫矣。春秋既不能知其名，而仍而不削，蓋以著子朝之亂所本也。而傳以爲君氏，隱公之母聲子也。稟爲聲子，公即不敢僭用夫人之禮。史亦當書公母某氏。今第曰君氏，古無此徑省之文矣。

齊侯鄭伯盟于石門

鄭與衛爲仇，而宋與衛爲黨。鄭欲挾齊以敵宋，故於石門尋瀘之盟，以固其交好也。外盟不書，此何以書。蓋春秋之初，莫詐於鄭莊，莫強於齊僖。二國合而干戈無寧日矣。故於其來告而謹誌之。

公及宋公遇于清

簡其禮以相見之謂遇。王法不行，諸侯無統，各相要結以謀其私。與古之從王事而適值于途者異矣。隱之篇書遇者二。宋魯遇清，將以伐鄭。宋衛遇垂，將以結齊，欲祕其情，故託爲不期而遇。如果遇也，則兩君之出各有所之，何以一遇而遂已乎。

宋公陳侯蔡人衛人伐鄭

州吁弑君而欲會諸侯以定其位何不與鄭釋怨而謀必出于伐哉意州吁求和于宋而宋以伐鄭懲恩之也衛桓陳出陳之不爲州吁明甚觀擊鼓之詩曰平陳與宋則知陳蔡亦宋爲合之故經序衛人于下而以宋公主兵蓋宋之師本爲公子馮出非徒爲州吁也穆旣受位于殤亦豈忍使其子無餉口之地今殤以馮在鄭而連兵伐之是忘其父之爲德而欲窮其子之所歸亦不仁甚矣卒之亂不起于馮而起于督則伐鄭之役不足以自救其亡而徒陷于黨惡之罪而已

翬帥師會宋公陳侯蔡人衛人伐鄭

翬有無君之心而後敢以國卿會伐于諸侯以師衆助黨乎亂賊使公能知履霜之警則旣拒宋之乞師而弗許必不徇翬之固請而得行乃執義不堅不能正身以正其下而無駁專兵于前翬遂踵行于後鍾巫之禍亦公之自貽伊戚矣翬去氏猶無駁未賜族也再序四國甚諸侯之助逆而不知返也

考仲子之宮初獻六羽

諸侯無二嫡仲子者妾辭也桓未君而先立廟以祀之非禮也隱但知從父爲孝而不知適以彰父之愆也讓桓爲友而不知適以啓桓之篡也考宮而獻六羽隱固知仲子之不宜祔廟矣固知仲子之宮不可同于羣公之宮矣而卒違禮爲之者春秋於隱公之孝友蓋深憫之

鄭人來輸平

此鄭莊欲間宋于魯而通魯于齊也。齊爲鄭黨而不能踰魯以助鄭侵宋。故莊不惜屈己以求和于魯。魯許鄭成，自不能終與齊絕。故平以春來而艾以夏盟。齊魯之好，莊實結之。蓋其心灼知隱貪于利。僖貪于功。故於魯輸財以釋其舊仇。而爲齊樹黨以成其小霸。迨三國之交既固。而後連兵以大肆其伐宋之謀。不然長葛之圍踰年矣。不思禦敵而求睦鄰。顧爲此不急務之哉。語曰：將欲取之必固與之。莊之梟雄算無遺策矣。不特愚弄宋殤使之幸小勝而忘大禍。卽齊魯亦墮其術中。隱爲所用而不知也。

齊侯使其弟年來聘

鄭伯使宛來歸祊

齊年來聘。所以申艾之盟也。艾盟不書及而書會。志此盟者齊。故急于聘者亦齊。年不稱公子。非貶也。未爲大夫也。不任大夫而任其弟。隱以示我之所親貴。以推心于魯。而使之固結于齊也。蓋僖之圖霸亟矣。

鄭謹龜陰書來歸者。我故田也。祊爲鄭邑。亦曰來歸。蓋輸平之時。已納諸魯。特其意尙俟會魯侵宋而後致之。今見魯之伐邾師爲宋出。則於舊好猶未忘。而於新交必不固。故懼而急以祊來。祊來而盟宿遇清之志渝矣。宛鄭大夫也。接於我。故以名見。

宋公齊侯衛侯盟于瓦屋

瓦屋之盟。傳謂齊人卒平宋衛于鄭者。非也。以齊之強。果欲爲三國釋怨。鄭敢不從。而是盟莊無與焉。則東門之師。長葛之取。積怨如故。烏乎平。蓋其時鄭旣與魯修好。則宋衛之黨已孤。故懼而求盟于齊。而欲

離齊于鄭。犬邱之遇爲此謀也。然鄭之平魯。實啗之以重賂。而宋衛之附齊。徒要之以虛言。齊其肯棄鄭而從宋衛乎。故明年會防。又明年會中邱。而齊遂合魯助鄭以肆毒于宋。蓋僖之勤于會盟。本欲執牛耳。以長諸侯。而瓦屋直以爵序。則其心亦不能無望于宋矣。

公敗宋師于菅辛未取郜辛巳取防

讎宋者鄭也。助鄭者齊也。而伐宋之役。翬旣帥師以先之。公復潛師以敗之。曾不待齊鄭與偕。而浹旬之間。克其二邑。魯之肆虐于宋亦甚矣。傳謂鄭師入郜歸于我。入防歸于我。而據經文。則取邑者非鄭也。魯也。徒以歸祊之故。而魯之君臣。竭心力以致其果毅如此。則利之役人。可嘅也夫。

宋人蔡人衛人伐戴鄭伯伐取之

取師之惡。甚于取邑。莒取牟婁。宋取長葛。經猶惡而書之。況鄭莊之取三師者乎。宋衛入鄭。旣克其國都。而又移師召蔡。以戕其附庸。固爲不義。乃鄭莊以凱旋之師。出其不意。掩獲而盡俘之。亦慘矣。終春秋之篇。惟此及哀之九年。書取鄭師于雍邱。十三年。書取宋師于邑。皆惡其草菅人命。幾與戰國無殊。而鄭莊實爲作俑。孟子所謂善戰服上刑者。莊其當之。

公及齊侯鄭伯入許

鄭助齊以虐鄭。齊助鄭以侵許。二國之相爲黨援。侵陵弱小。其素志也。而入許。顧以公及之者。許豈不共于魯哉。無故入人之國。魯受其惡名。而鄭獲其厚利。公亦何樂爲此。王氏錫爵所謂以許與鄭。償前日郜

防之取者是也。蓋春秋之初，兵爭倣擾，皆鄭爲之。鄭以計餌齊魯，而齊魯以兵助鄭，遂使宋、衛、鄭、許皆被其禍。固不待繻葛之戰，而鄭之有干王法罪不容誅矣。

公薨

薨未有不書地者。路寢正也。雖臺下楚宮非正亦書。以明其得考終命。惟隱公閔公不地，則弑可知矣。孰弑之，閔之薨也。書慶父出奔，則賊在慶父。今於隱薨之下，卽次以桓之卽位。弑公者非桓而誰？此雖族誅公子翬，尚不足爲討賊。況嫁其罪于爲氏乎？故隱之不書地，并不書葬。春秋之例：賊不誅，則不書葬。 討則不誅桓也。

公卽位桓公

繼故不書卽位。穀梁所謂先君不以其道終，則子弟不忍卽位也。桓之卽位，忍于隱矣。孔疏以爲歸罪爲氏，詐言不與賊謀而用常禮。夫歸罪爲氏，是桓固以爲氏實弑公矣。繼弑皆不可以卽位，獨爲氏之弑而可以卽位乎？甚矣。桓之處心積慮以求此位也。雖無羽父之譖，固將以刃加之。

鄭伯以璧假許田

祊近魯，許田近鄭。當使宛歸祊之時，早欲得田以自廣。特迫于宋人之難，而未敢遽言也。今乘桓之篡立，知其有危懼之心，必不惜重利以求列于諸侯。故爲垂之會以要之，其不以祊易，而曰以璧假者，先儒謂諱國惡非也。蓋祊久歸于魯，不得執以爲言。而以寸璧易土田，託辭曰假，實微示其要賂之情，以陰挾其必從之勢。易田而後盟越，鄭遂其欲，而魯亦幸得所援矣。春秋誅亂賊，必先治其黨。聖人之惡鄭莊也，尤

甚于魯桓

宋督弑其君與夷及其大夫孔父。

孔父者宋穆公所召而處之以與夷者也。督黨于馮而欲納之。則必弑與夷。欲弑與夷而先剪其手足。則必殺孔父。禍主于君以及其臣。故公羊以爲累也。顧殤公在位十年矣。督與孔父俱北面事之。書曰其君謂督之君正其罪也。書曰其大夫謂殤之大夫明其忠也。孔父捍君父之難。不與賊同生。而先君以死。魯人高其節。故特著其名。而或以孔父爲字。禮豈有名君而字臣者耶。

公會齊侯陳侯鄭伯于稷以成宋亂

會者外所欲也。齊鄭怨殤。則必與督殤弑莊立修好釋仇。三國遂會于稷。以立華氏。宋人弑君之罪。不復討矣。顧穀梁有云。以者內爲志。蓋桓弑兄篡國。雖嘗與鄭會垂盟。越而猶懼大國之討也。今得列于衆會。則宋之亂成。卽魯之亂以成。故經特書其所以以隱誅桓也。而桓且居然爲無罪之人。遂竊鄭莊假許田之智。挾宋而取郜鼎。同惡相獎。賄賂公行。宋馮魯軌華督之徒。接跡天下。而春秋之大亂。亦由此成。

齊侯衛侯皆命于蒲

齊僖圖霸久矣。前此平宋于稷。晉陳鄭俱從而衛未與。故復與之修好于蒲。命者上之所以令下。非同列約言之稱。僖將踐先君臨長九伯之迹。故托天子之撫諸侯者以命。衛葵邱五命之申。已肇於此。而特恐衛不下己。故以皆爲名。意倨而辭謙也。傳於莊之二十一年有云。皆命于弭。亦鄭號之相。與奉王命者或

謂齊衛互命爲伯。此乃戰國會而相王之事。僭竊不臣甚矣。苟卿子何云。春秋善胥命。

公子翬如齊逆女

逆女使卿禮也。謂譏不親迎者。程子於紀履綸之來逆。已詳辨之。但會贏謀婚。不待媒妁。于謹逆女。直越封疆。以卿逆而復以躬至。齊與魯交失之耳。翬稱公子。桓任之也。翬之爲桓弑隱。其惡較甚于遂之爲宣弑。亦而皆結婚于齊。以謀自安。孰知一失婚禮之正。而文姜之亂。穆姜之淫。遂爲後之所不及防。是以君子遵禮而行。不計禍福。

天王使宰渠伯糾來聘

當隱之時。王臣來歸贈者一來聘者二。而魯朝聘之事無聞焉。今桓立四年。未嘗入見天子。而宰糾來聘。五年。仍叔之子來聘。周亦何樂親魯。蓋王積憤于鄭莊之不臣。欲伐之。冀魯助之。魯東方之望國。使桓能奉王命帥師會伐。則蔡衛陳必以君從。而不徒命其大夫。王靈其克振乎。乃桓方德鄭莊之定其位。雖屢聘告之。如充耳焉。魯之罪誠不可逭。而論者徒以下聘篡弑之賊。故斥畢名以貶其失職。豈經旨哉。

蔡人衛人陳人從王伐鄭

自桓王伐鄭不服。而王命遂不行于天下。君臣之大變也。聖人諱戰與敗。而書三國從王伐鄭。令讀者但見鄭之有罪。而天討加焉耳。亦猶周易坤之上六。天元地黃之義也。撥亂反正。於是乎在。

蔡人殺陳佗

桓莊之時遠矣史有脫誤雖聖人無由正之如桓四年七年之缺秋冬甲戌己丑之兩書日六年實來十
有四年夏五以及莊二十四年郭公皆疑以傳疑蓋其慎也陳佗之弑太子不見于經亦事所可疑者但
據其文則人蔡而名佗嘗與楚人殺陳夏徵舒爲一例是佗負不赦之罪蔡有討賊之義可知也如必於
五年正月甲戌之下記陳佗作亂事則非夫子所猶見史之闕文者矣

子同生

桓三年姜氏至六年子同生齊詩云展我甥兮無可疑者然則同何以志志同所以誅桓也桓自思其始
生之辰曾以太子之禮舉之乎古者立子以嫡無嫡以年其母則俱媵也其年則非長也而顧弑其兄奪
其位由惠未正隱爲君之故故於同生而定之爲冢嗣使慶父等不得效己所爲是其心固自以篡爲病
也杜云十二公惟同爲嫡餘或爲嫡而生于其父未君之日故皆不書然成公非穆姜之子乎穆姜非宣
公篡立之後仲遂爲之請昏于齊者乎而春秋不書子黑肱生又何以說

齊侯衛侯鄭伯來戰于郎

經未有書來戰者書來戰諱伐我也郎近邑也來戰而至于郎公羊所謂近乎閼矣桓負大惡固人人所
得誅而鄭與會盟齊附婚姻衛雖未遇與約桃邱莫不怙其惡矣今徒以爲紀圖存之故而三國連師伐
之是舍其所當伐而伐其所不當伐魯雖敗績何足爲諱然諱敗而不諱戰則亦未之有諱爾已

齊人衛人鄭人盟于惡曹

惡曹之盟先儒皆謂三國之君貶而稱人果此之稱人爲貶則前之稱爵爲褒乎惟方氏苞謂自宣以前會盟侵伐外卿大夫皆稱人者是也三君俱在而使其大夫爲盟是喜于勝魯而君志荒臣志肆矣是年寤生卒明年晉卒又明年祿父卒死期將至烏能有深謀遠慮以防其操柄之失乎溴梁兆于此矣

宋人執鄭祭仲

稱人以執亂辭也執他國之命卿而劫之以逐君宋罪大矣使祭仲臨危授命誠計之上者否則要盟不信從宋以逃死歸而背之可也乃仲歸而立突出忽豈果懼宋之殺其君滅其國而委曲以圖存乎蓋素習于鄭莊之不臣可以取周麥可以中王肩惟所欲爲而莫之忌則視廢置其君如奕者之舉棋耳經不名仲而書行次尊王命所以誅權臣也

突歸于鄭鄭忽出奔衛

突自外歸明本無鄭也忽自內出明本有鄭也突依宋以爭國與赤之依戎糾之依魯等而忽獨繫鄭則無異于曹羈齊小白也其正不正可知矣而或以忽不稱子爲貶顧稱子亦不過嗣爲君耳國不可一日無君既不君突則必君忽雖稱名亦何損

柔會宋公陳侯蔡叔盟于折

宋莊納突執其君臣以要賂祭仲已心衡之仲本爲忽者也突雖嗣君仲實專國遂絕宋而不與交宋人惡其背己而知魯與陳蔡之有積怨于鄭故與三國盟于折以圖之柔大夫也能修宋之好未敢定鄭之

謀故復與公會于夫鍾會于闕皆宋越魯境以要之也夫鄭莊實平宋亂今卒未踰年而奪其嫡立其庶以貪其財己則無禮而欲責人之有禮得乎

及鄭師伐宋丁未戰于宋

武父之盟鄭志也不勝宋之責賂而求親于魯以謀宋也先是公與宋盟于穀邱會于虛于龜所以爲鄭求平于宋者不憚屈己以勤人矣而宋卒辭平則魯愧無以紓鄭之患而勃有以忿宋之貪故會盟以鄭爲主而伐戰以公爲及其不言公者丙戌盟而丁未戰甫踰月耳公可知也魯軌宋馮鄭突篡立之徒同惡相濟而一較計于鎰鉞遂至反覆乎恩怨春秋之邦交莫此爲悖矣故書以交譏之

公會紀侯鄭伯己巳及齊侯宋公衛侯燕人戰齊師宋師衛師燕師敗績

齊與紀爲讎宋與鄭有怨鄭之役衛從齊穀邱之盟燕附宋魯欲平紀于齊平鄭于宋雖屢爲會盟而無以戢其貪利之心故齊宋擾衛燕以來伐而魯會紀鄭以拒之其不言伐而言戰諱伐也戰未有不書地者趙氏鵬飛曰齊人伐衛戰于衛故不地四國伐魯戰于魯故亦不地胡傳以爲戰于紀者非也然則鄭何以地公羊子曰鄭猶可以地則此戰之不可以地者師至于城下矣

鄭伯突出奔蔡鄭世子忽復歸于鄭

突何以稱爵忽何以不稱爵國無二君也突會諸侯臨臣民業經五年不可謂非鄭伯然能竊國之尊而不能奪忽之正故忽雖流離奔竄而必書世子以著其繼世守國之道與前之出而繫鄭互相證明使忽

而稱爵則似入而爭國轉無以正突之爲篡矣其曰復歸順辭也而何出惡歸無惡之有

許叔入于許

許莊公之出奔不見于經歷十有五年而鄭有忽突之爭許叔始得乘勢以歸于國故書曰入以著其克復之難且以甚鄭莊之惡也其不以名見而以行次書者明其與君爲一體兄終弟及與蔡季之歸蔡從同

鄭伯突入于櫟

入者出入惡公羊之義也然宜入而入爲順許叔是也不宜入而入則逆鄭伯是也櫟鄭邑入邑未入國也而突何以稱伯蓋據有強都則其勢已足以制國命而震人心故渠彌弑昭公齊人殺子亹其意未始不在突也雖子儀在位而莊四年與齊陳遇于垂者亦突故經於其始入稱爵以著其終能篡國而爲君者實由於此

衛侯朔出奔齊

衛之奔君如鄭如衍皆不名而朔何以獨名鄭得罪于霸主衍見出于權臣其義猶未絕于衛也朔則讒殺其兄篡奪其位五年之間國人皆痛心疾首而後左公子洩右公子職見黔牟于天子而立爲君則國固爲黔牟之國矣朔不得而爭焉故劉氏敵以爲奔而名者見有君也朔之于衛大義已絕何可援鄭衍以類視之

公會齊侯紀侯盟于黃

齊欲納朔魯欲平紀故爲黃之盟桓自會紀于鄭受紀之朝爲紀納女于王皆所以謀紓齊難而齊乃有郎之戰四國之師其耽耽視紀必欲肆其吞噬者遂至遷怒于魯齊僖圖霸尙不能保小寡而顧婚姻況襄之政令無常知利而不知義者乎卒之遷其邑逼其君齊不能爲魯存紀而魯不敢不從齊納朔則是盟也陽許而陰圖之齊襄欺魯實甚何桓之愚而不悟也

蔡季自陳歸于蔡

經於蔡季不書其出而書其歸則其出也不以罪其歸也不以爭賢可知矣而或以季之賢宜能死國遂以季與獻舞爲二人使果爲二人則季非承國爲君其出入又非有接于魯魯史何重其事而書之况人之賢有潔于出處之間者有明于生死之義者各得其性之所近必欲全而責之非大賢不能而何嫌于蔡季之卽爲獻舞

公會齊侯于灤公與夫人姜氏遂如齊

春與齊盟于黃夏卽及齊戰于奚齊之無信雖愚者亦知之而公復與爲好會姜氏欲之也男女之無相瀆申繻言之矣縱夫人之驕伉旣偕與會灤遂從而如齊豈所謂夫子制義者乎蓋天之奪其魄將假手于齊以討賊矣

春王正月莊公

莊不卽位而猶書正月者正其始也觀此而知定無正月之失其正矣莊有正月而不書卽位者隱其弑也觀此而知桓行卽位之漠無隱矣

夫人孫于齊

此夫人旣隨喪歸而復如齊也不書如而書孫著其與于弑也不書姜氏見若非齊女然以醜其凟倫也哀姜孫邾齊桓殺之喪歸書至此孫而不至何也則莊公以私恩迎之而國人以公義絕之也其後或會或享或如齊如莒屢書而不諱何也譏失賤也知有母而不知有父莊公將何以爲人矣

王使榮叔來錫桓公命

錫桓公命王不稱天顧氏炎武以爲闕文非也毛伯錫文公命稱天王召伯賜成公命稱天子彼皆不闕此獨闕乎顧云此與文公五年王使榮叔歸舍且賄同不知歸舍且賄正以其厚禮妾母譏之也故下文召伯會葬亦不稱天然則平王之賜仲子得稱天王何也彼旣斥其宰之名矣謂或匡弼不以其道及加禮于成風則知嬖寵匹嫡實習爲常不得更貸其咎于使臣矣或曰文成之寵命亦僭賞也何獨於錫桓而譏之譏其甚者莫甚于獎篡弑也

紀季以鄆入于齊

紀侯猶未去國而先以邑附齊不幾疑于季之奔叛乎顧季見齊之遷邾鄆部知其心必欲滅紀俟其旣滅而後下之恐難容也故當紀侯之命以承國而遂入鄆以求爲附庸春秋善其於傾覆之時尙能延宗

社之祀也。故書行次以賢之。賢紀季所以惡齊襄也。

紀侯大去其國

齊方與陳鄭謀紀于垂。未嘗以兵隨之。而紀侯知其欲滅紀也。力既無以敵齊。心又未能下齊。則不如委其土地人民。而飄然遠引以避齊也。春秋憫其無失國之道。而特迫于強大之陵。故不曰出奔。而曰大去。或曰大名也。名紀侯以責其不死社稷。顧社稷既有托矣。季存則祀存。將以一死爲誰殉哉。

齊侯葬紀伯姬

伯姬魯女也。葬臣子之事也。使書葬紀伯姬。則紀人葬之。魯往會之矣。今斥言齊侯。所以罪襄之肆行侵逼。令其殯不及葬。而又欲假以爲名也。

公會齊人宋人陳人蔡人伐衛

此所伐者。黔牟也。伐黔牟。所以納朔也。朔殺兄篡國。義所當誅。而齊襄連諸侯之兵。以納之。其黨惡之罪。豈待貶而人之哉。然或以爲四國皆微者。則大不然。先是溺會齊師。納而弗克。今糾集大衆。期于必成。襄之親歷行間可知矣。而顧人之者何也。襄烏獸行。通文姜以弑桓。魯雖屈于力。弗能報。未嘗不心惡之。故狩獮而書齊人。不欲使公與仇讎會獮也。伐衛而書齊人。不欲使公與仇讎會師也。旣入齊襄。卽不得不人宋陳蔡。此魯史之特筆。以啓後人疑問者也。終諸兒之弑。非與文姜會。未有書齊侯者。與文姜會義。是不得書齊人。是

王人子突救衛

救衛者助黔牟以拒朔也使朔非得罪於天子天子廢之而立黔牟則當時諸侯之助亂以伐正者多矣何未聞王旅之赫然怒乎雖周之弱不敵齊之強未成爲救而春秋必以救書之者所以尊天子之威命而託子突以正五國逆王之誅也子突名也方氏苞曰王朝之大夫例稱名

衛侯朔入于衛

不曰歸而曰入逆詞也王人救衛而朔入焉雖不書王師敗績而敗績可知矣不書黔牟出奔而出奔可知矣朔藉五國之力以抗王命其罪豈不子繡葛哉顧猶不黜其爵何也繫國爲正繫爵不掩其爲非正也故朔之入衛與突之入櫟同文

齊人來歸衛俘

公穀以衛俘爲衛寶賂也賂一入而不惜黨惡之名不避抗王之罪胡傳以爲有欲貨之心而後動于惡是也顧其事齊人主之四國從之耳以寶入齊宜也而齊乃來歸于魯豈果從文姜之請欲以親魯歸寶乃所以歸惡也歸之者詐受之者愚矣

公及齊大夫盟于旣

書齊大夫而不目其人非其貴者也諸兒弑齊無君謀國者懼魯之乘亂以復其仇而見糾之在魯魯實安之故以迎糾爲名而與公盟于旣使魯貪納君之利而不興報怨之師耳不然立君大事國高二守何

在而聽諸不知名氏之大夫乎顧齊則詐矣而盟書公及內志也公不志于報父之讎而志于定讎人之國則其罪不可逭矣

齊小白入于齊

小白與糾皆齊僖之庶孽其當立與否非如忽與突羈與赤之灼然易明但立嗣以嫡非嫡以長禮也使小白爲弟則殺兄而奪其國其惡與衛朔等春秋豈肯與之乃小白繫齊亦如鄭忽曹羈之以國氏則其當立之義固齊之臣民所共戴非若伐齊納糾特出于魯人之私也其曰入者亦以糾之爭國難之耳豈與突之入牒亦之入曹朔之入衛同爲逆辭者故三傳皆謂糾兄桓弟程子特易其說而斷之以聖經正不必以薄昭之言爲據

及齊師戰于乾時我師敗績

此乾時之師卽伐齊納糾之師不言公可知也顧小白旣入齊有君矣我師不可已乎而公決求一逞者蓋憤慨之盟受欺于前故乾時之戰致死于後使公能移此師于不共戴天之仇雖致敗衄亦何所慙今乃以納仇而敗也固不能諱其耻也已

齊人取子糾殺之

桓旣得國糾一亡公子耳有何能爲然小白忌魯鮑叔薦仲非置糾于死地則魯不靖而仲不來故始詐而迎之終忍而殺之此卽霸者功利之見不自惜其不仁者也經書曰取病魯尤罪齊也而或以糾之稱

子爲齊人正其君臣之義亦烏知子糾非名如陳子禽之或稱陳亢或稱陳子亢耶如例之以旣葬稱子則小白罪不勝誅矣

公敗齊師于長勺

敵加于己不得已而後應於魯何責焉顧將衆師衆曰師齊而稱師用大衆矣而魯能勝之及齊宋修怨連師至郎又能敗之于乘邱則是魯之兵力非不足以摧敵也乃自納糾以前宋聞師加于齊而乘長勺之勝侵宋以啓其釁屢敗其師則公之忘讎而讚武固有責之不勝責者矣

以蔡侯獻舞歸

此著楚之強憑陵中國之始也先儒以爲書敗而名其君者責其服爲臣虜絕之也蔡小而逼于楚力不足抗強鄰從而服之寧得已乎楚人滅夔以夔子歸不名固無罪矣晉師滅潞以潞子嬰兒歸名之果何罪乎卽據左氏所云罪在鄆舒晉誠不利其土地人民則殺鄆舒而立潞子如楚莊之殺陳夏徵舒可也何遽滅之故凡滅國而執其君皆罪在滅之者而深憫夫所滅者以著世變也如責蔡季以不死社稷之罪則夔子亦未死矣況蔡季旣執蔡人立其子肸國有君矣社稷固未亡也方氏苞曰諸侯卒必名奔執而不返則與卒等故名之其不名者不知其名也如有則其義皆可通矣如譚子奔莒弦子奔黃溫子奔衛皆不知其名者

宋萬出奔陳

春秋書宋萬事與左傳詳略懸殊或謂宋魯方惡赴告不通則當乘邱鄆交兵之後宋有大水魯使弔之

而書諸策。豈有討賊立君國之大事而不以告哉。如竟不告。則萬之弑君殺大夫亦宜不見于經矣。故例以衛州吁之事。則宜書曰宋人殺萬。宋人立御說葬宋閔公。而顧不書。書出奔似乎緩討逸賊者。而左氏皆醢之說。恐有不然。先儒謂書奔陳。以責陳人之黨賊受賂。烏有欲責隣封之小懲。而忽歿臣子之大義哉。

齊侯宋人陳人蔡人邾人會于北杏

北杏之會。傳謂以平宋亂果爾。則在會者當爲御說。何以不書爵而書人乎。胡傳謂桓非受命之伯。諸侯推戴以爲盟主。故貶而稱人。然其時魯衛大國地與齊鄰。鄭爲懿親。素與齊黨。今皆不與于會。而自宋以外。惟陳蔡邾三小國焉。何足爲主天下會盟之政。意者桓假平宋之名。以圖霸事。而信義未孚。故四國君不親行。而臣往聽命。劉氏敵所謂皆大夫者近是。

齊人滅遂

滅譚書師將卑師衆也。滅遂書人將卑師少也。以遂弱于譚。其國易舉也。北杏之會。豈惟遂人不與。而齊桓欲以威響諸侯。故以罪加小國。金氏履詳曰。遂在濟北。必爲魯之附庸。則滅遂所以逼魯也。于是魯人懼而有柯之盟。

齊人陳人曹人伐宋

北杏所以平宋。不踰年而宋遽背之。非情也。伐之者蓋責宋公之不親行而遣大夫耳。陳蔡邾亦大夫。何

以得免于伐。會本爲宋舉也。且圖諸侯必先大國。陳蔡邾非所急也。

宋人齊人邾人伐鄭

甚矣。桓之急于得宋也。前年會陳曹以伐之。以北杏之不親。至懼其有離心也。及兩會于鄄。宋已固交于齊。齊愈推誠于宋。遂以師從宋伐鄭。鄭叛宋也。又從宋伐鄭。鄭侵宋也。其序齊于宋下者。春秋之例。會則以主盟者爲先。伐則以主兵者爲先。鄭兩役宋主兵也。而胡傳以爲齊未成霸。彼二十六年伐徐。仍序齊于宋下。豈猶未成乎霸也哉。

會齊侯宋公陳侯衛侯鄭伯許男滑伯滕子同盟于幽

盟而曰同懼。其有不同之情。而要以必同之義。蓋齊桓始霸之辭也。柯之盟。嘗書公矣。而于幽諱公何也。柯特盟也。不過通二國之好。幽齊盟也。直欲收諸夏之心。天王在上。而列侯不朝。覲于京師。不會同于方岳。聯結八國。推戴一人。越禮犯分。莫此爲甚。故無霸而天下之戎兵不戢。聖人憂之。有霸而天子之威權以亡。聖人尤憂之。特諱公以著世變。卽胡氏北杏傳中。所謂誅始亂正王法也。而於此傳。則云桓公仗義。魯首叛盟。故諱不稱公。顧魯之叛盟。在納鄭詹踰年以後事也。春秋豈能逆探其事。而先於幽之盟。貶之齊人執鄭詹。

冬十二月。盟幽。春執鄭詹。是執之于會所也。傳謂責其不朝。豈有會猶未歸。而遽責之以朝哉。蓋桓見荆楚方強。伐鄭及櫟而還。疑鄭之有二心于楚也。故拘其執政大臣。以爲質而要之。以固事齊。是桓之不以

德懷而以威攝也。故稱人以執惡之也。詹苟知義。如叔孫舍子服湫之于晉。待禮而歸可也。

齊人宋人伐我西鄙

不書戰而書伐。以三國來伐。未戰而魯服也。蓋魯之事齊也。緩北杏固未與矣。既盟于柯而猶不親乎。郵之會。甫同于幽而遽私受乎詹之逃。反覆無信。齊宋惡之。于是有西鄙之師。說者徒以遂事招寇。歸咎于公子結。夫結以媵婦私出。而擅與大國抗盟。誠爲不恭。然齊宋旣與之盟矣。豈其不預拒于先。而反追怒于後哉。

及齊高傒盟于防

盟書及內所欲也。不書公。不與公之請婚于齊也。納幣逆女。皆斥公。而獨於盟防諱之者。不諱則外大夫之來聘。而公出國都以盟之者有矣。烏知高傒之以議婚特來也。不書齊使於齊。無責焉耳。

夫人姜氏入

公於盟防之後。嘗三如齊。說者以爲朝也。而假納幣觀社逆女之名。以諱其事。顧春秋小國之朝大國。實禮之常。滕薛曹邾之於魯是也。僖公於齊亦嘗五年一朝。經皆書如而不諱。何諱乎莊公。且莊而朝齊。其可耻。孰與結婚于齊。蓋姜氏齊襄之女也。襄于九世之讐。猶必報之。況其爲先君之讐乎。經不曰夫人至。而曰姜氏入。謂其義不可入也。穀梁所謂宗廟不受也。丹桓宮檻刻桓宮桷。將以爲夫人飾。而不知適足傷桓之心矣。

曹羈出奔陳亦歸于曹

羈不書子氏以國不嫌沒其爵也忽之出奔繫鄭歸則書世子則羈之繫曹卽爲世子可知矣但鄭先書歸見黨賊者之有力也曹先書出見扶正者之無人也要之羈與忽之當有國則一也而論者每以不書爵爲貶則通一經之奔君未有不繫以爵者聖人誤皆予之耶

公會齊侯宋公陳侯鄭伯同盟于幽

前之盟幽諱公而此不諱者一諱焉而其義已著也魯爲秉國之邦宋爲先代之裔陳鄭皆當荆楚之衝齊必得宋魯而後可以服中夏必得陳鄭而後可以禦荆蠻故自北杏以來先服宋次服魯次服鄭叛則以兵威之歸則以恩結之歷十數年而諸侯皆有畏服之誠無疑貳之志矣其曰同者喜其同也天下同此尊周攘夷之心而霸業以盛

公子友如陳葬原仲

左氏以原仲爲季友之舊則如陳私行也禮云大夫私行出疆必請請命而行雖私無貶顧必誌之于策者爲異日友之奔陳誌也自于餘邱之伐慶父以庶兄而專國兵二十餘年矣其必爲害于宗社公與友所心憂故女叔來聘使友報之越竟會葬任友行之蓋欲通友于與國一旦禍起得借以息肩而徐圖反正也然其不託于齊何也齊魯舊好桓方主盟其不與慶父以長魯亂也可知

衛人及齊人戰衛人敗績

衛朔反國實抗王師及王有子頽之難。朔又與燕伐周立頽。王之積怒于衛實甚矣。使桓果有尊周之心。則必恭奉王命。親歷戎行。而顧自居城濮。遣將薄伐。使懿公尋前幽之盟。求成于齊。則師不戰而退矣。故春秋書衛及齊。以見衛不量力。自取敗衄。而非桓之欲伸天討也。傳曰。取賂而還。殆不誣矣。

齊侯來獻戎捷

此齊桓欲親魯而謙以下之也。先儒謂齊伐山戎。以其所得。躬來誇示。而春秋特書來獻以抑之。恐未必然。使齊果欲誇其功以震魯。魯惡其誇而故抑之。使與下之奉上等。是益爲誇詞以爭勝。非所以爲榮也。惟其自以來獻爲文。故聖人因而書之。以見霸主之本虛衷以孚衆志。固與楚宜申之來獻捷。以魯不會孟而脅之以威者。其用意大相懸也。張氏溥曰。遇魯濟則親至魯。遇梁邱則序先宋。齊能執謙。宜其定伯得之矣。

公子牙卒

成季之誅牙也。爲大義滅親也。春秋曷爲諱而卒之。成季諱之也。牙。慶父之黨也。其欲弑莊公以致國于慶父。固積慮耳。使明徵其辭。如周公之誅管蔡。則慶父久專國兵。勢必激而成變。故猷之而微其跡。第以卒告于臣民。立其後嗣。而慶父猶晏然不知牙之以罪誅矣。故莊公得正終。子般得繼立。皆成季之密于機事。而無害其成者也。春秋善乎其諱之也。非僅善其不與國人慮兄弟也。

公子慶父如齊

慶父如齊告立閔公也。慶父之欲篡國久矣。恐國人之不與也。故且立君以伺其便。懼大國之見討也。故又如齊以探其情。而說者以通其使。許其歸。罪齊桓之縱賊。則大不然。如齊之役。與般卒同月。魯旣歸獄于圉人。肇則齊桓。烏知弑般之爲慶父。而不通其使。許其歸乎。但自通其使。許其歸。而慶父遂若內有哀姜之助。外有方伯之援。魯真已之魯矣。春秋書之以見閔公之弑。已兆于此也。

公及齊侯盟于落姑閔公

落姑之盟。請復季友也。時閔公甫九齡耳。慶父專國。威震羣僚。誰能爲公畫此計者。陳氏謂國人爲之。吳氏謂魯之世臣爲之。卓氏謂季子在陳。介陳人以爲之。而不知公自爲之也。公雖幼。見慶父哀姜之所爲。心必惡之。而力不克制之。因思季友之賢。能除逆黨。則必能輔公家。故請于齊而復之。以從國民之望。而奪亂賊之權。慶父力利公之幼弱。不謂其能辨賢奸。將爲己害。故季子歸甫踰年。遂肆然動于惡。而使卜鯉賊之于武闈。後漢質帝年亦九齡。知李固之忠貞。惡梁冀之跋扈。而冀遂進煮餅以酖之。其事正與閔公相類。嗚呼。閔公有志于治。而親賢是求。能愛其傳。而奪田不禁。其天性有過人者。而卒以此亡其身。閔之所以爲閔也。

齊仲孫來

季子秋歸。而仲孫以冬來。閔公秋薨。而高子以冬來。齊桓之務寧魯難至矣。使當日季子不歸。則慶父之篡必成。齊使不來。則季子之功不立。而說者謂桓公有取魯之心。是泥于傳而不揣情事者也。齊之南伐。

以魯爲主，仲父之謀夙定。烏有欲成尊攘之業，而敢覬覦王室之懿親哉？觀哀姜之孫邾而不孫齊，則弑君之賊桓公決欲討之，慶父所以懼而奔也。慶父奔而季子以僖公入矣。至季子仲孫高子三大夫，字而不名，則朱子所謂魯史喜而書之，聖人直書史家之辭是已。

齊師宋師曹師次于泓北救邢僖公

狄未至邢，而陳師鬲北以先待之。安見次之爲緩？其謂之緩者，見傳有邢人潰出奔師之言故也。然傳不載邢與狄戰，則邢懼而自潰，非敗而後奔也。去其國都而欲托于險阻，擇夷儀而居之，諸侯因而城之，始終一救患分災之心，何得謂救邢譏其緩？城邢美其功哉？其再敍三師者，以救在春，城在夏，事旣踰時，而未嘗別役諸侯之師也。則其事有制而不擾矣。

城楚邱

楚邱衛邑而城之，直等于是魯邑者，齊桓分任其功于會檉之諸侯，而令魯總其成也。公穀以爲不言城衛，不與齊桓專封。夫所爲封國者，本無其國而今建之，本無其爵而今命之，則邾犁來之國號小邾，而爵稱子是也。若衛則康叔之國，周先王之所封。懿公甫滅于狄，戴公旋立于曹，至文公徙居楚邱，建城市而營宮室，劉氏敞據定之方中之詩，謂先徒都而後築城，非齊桓城而遷之也。其不言衛而言楚邱者，不言楚邱，則疑于城衛之故都，其實城楚邱與城邢等耳。觀閔公之篇，書狄入衛而不書滅衛，則衛固依然存也。何俟齊桓封之？

公會齊侯宋公陳侯衛侯鄭伯許男曹伯侵蔡蔡潰遂伐楚次于陘

自莊公十六年以後楚之伐鄭屢矣齊桓合諸侯以謀之大如宋魯遠如江黃數爲會盟以固己之交披楚之黨然後乘侵蔡之師聲其罪而討之書曰遂伐楚非弟繼事之辭亦謂同幽會檉盟貢會陽穀積二十餘年之經營而今乃得遂其事也陘者楚地定公四年諸侯侵楚會于召陵論者以召陵爲楚之要地而陘又在召陵之南師次于此非緩以待之也蓋將蒐乘簡卒申令而行曖曖乎有深入之勢矣故楚懼而遣使如師以請盟其書屈完來盟而不言使之來者外楚而不欲進其君子同盟也其書盟于召陵而不言與之盟者尊桓而不欲使大夫得與抗也雖不必戰勝攻取而桓之屈服乎荆蠻者其功已存于天下矣邾氏敬以爲齊能討楚當首問其稱王問其伐鄭問其虜蔡侯之罪如是則楚無以爲辭勢必決于一戰戰而勝幸也萬一不勝則彼將肆其吞噬之心以侵害中國而震驚京師王室之禍由此熾矣故第責之以包茅不貢使之引辭服罪則君臣大義昭然常存楚雖倔強亦自知其僭王猾夏之不見容于天下也自召陵以後終齊桓之世楚雖滅弦伐黃祇自暴其近隣而未嘗加兵于鄭則亦懾于伯主之義也夫○易曰高宗伐鬼方三年克之以楚之強而深其阻裒其旅雖武丁奮撻伐之威尙必歷久而後成功況桓文乎城濮之戰得臣恃勇直前自離巢窟而所從者惟西廣東宮與若敖之六卒故晉文得而勝之今則楚師不出憑險爲安蓄全力以待齊而欲懸軍深入歷方城漢水而戰郢郊此取敗之道也說者以召陵爲伯主苟且之事夫以苟且責其平日之所爲不足服楚則可耳至于召陵受盟正以不戰而屈人

者雖聖人亦不沒其一匡之功矣。

諸侯盟于首止

會盟同地而不同時故覆舉首止世子與會而不與盟故再言諸侯前之會特尊世子以明示諸侯也此之盟復要諸侯以同戴世子也。

盟于洮

首止之會不盟王世子葵邱之會不盟宰周公于洮則與王人同盟書之將以示貶乎非也王室有難勅使求援以結盟列國事之變而義之權也顧惠王崩在冬洮盟在春其時固無叔帶爭立之難故劉氏敵以爲洮之會本非謀王室也意者鄭始聽從楚之言逃首止之盟及經新城之圍楚師不競寧母之役子華不姦遂自悔厥禍求成于齊齊上請于天王爲此會也故書曰鄭伯乞盟然自鄭復從齊而惠王益知諸侯同心太子之羽翼旣成廢立之邪謀永息矣則卽以此盟爲寧周難可也故王人不嫌與盟也。

禘于太廟用致夫人

一夫人也三傳異說自劉向目爲成風後儒多因之顧古無以妾體君之義亦無以子立母之文僖雖欲尊所生豈敢因禘告廟自誣其祖乎宣之敬嬴襄之定姒昭之齊歸其葬皆稱夫人其葬皆稱小君而未嘗入廟致之使謂春秋略其踵事者獨譏其作始者則宜詳其氏姓直書之曰用致夫人成風而嫡妾之亂不益昭然足爲後世戒乎何爲書夫人不書氏姓將以示譏轉令讀者不知所譏之爲誰氏也惟左氏

以夫人爲哀姜者得之。蓋自夫人之喪至自齊已削其姓以貶之矣。徒稱夫人即可知爲哀姜文相承也。哀姜薨已七年。何以今始致之。蓋其淫而與弑國人欲絕之于祖廟也。而其葬而成禮。僖公已尊之爲夫人也。或曰哀姜入廟。則宜書祔。顧旣葬卒哭。而以班祔事之常也。哀姜不宜入廟而入廟。則人子之心。歸審而制之者也。故曰致也。

公會宰周公齊侯宋子衛侯鄭伯許男曹伯于葵塈

襄王甫立。而冢宰出會諸侯。則猶惕于叔帶之難。而倚伯主以固其位也。第惠王之喪在去年冬。葵塈之會在此年夏。正當七月而葬之期。故汪氏克寬疑其會葬旣畢。而修禮以申王禁也。然魯方在會。而王葬不書于冊。則伯者之功過亦不相掩矣。

晉里克殺其君之子奚齊

其君之子云者私也。對世子而言也。君私其孽子。而殺世子。是不啻以孽子手殺之也。國人所同讐也。故不書弑而書殺。惡其君之愛之。適所以多其子之罪。而使人殺之也。譏在君也。

晉里克弑其君卓

書曰其君里克之君也。其爲里克之君奈何。奚齊者獻公所辱。荀息以傅之者也。卓非其所傅也。使克于奚齊見殺之後。盟國人而召重耳。則荀息將殉奚齊。而卓必不立矣。卓不立而亦可免于死矣。故凡卓之得立者。苟息爲之。而實克之縱之也。傳曰里克殺公子卓于朝。旣躬入其人之朝。而又忍而殺之。故春秋

特書弑以正卓之爲君罪在克也

諸侯城緣陵

城邢序三國之師齊自主之也城楚邱略諸侯而不書使魯主之也城緣陵書諸侯而不序任諸侯之各自爲役也修安攘之業而無總一之令故穀梁以爲諸侯城散辭也自是以後次于匡以救徐而徐終爲楚所敗會于淮以謀鄫而鄫不果城而還諸侯懷貳舉無成功何其始勤而終怠也蓋自九年會葵垣十年公如齊十五年公如齊五年一朝魯蓋以事天子者事之而齊直安受其禮而不辭久矣桓志之荒矣

宋公曹伯衛人邾人伐齊

齊桓始合諸侯與宋魯爲尤睦今柩方在殯而宋遽伐之豈仗義執言之師乎雖奉齊桓之遺命納公子昭而心則實幸其喪乘其亂矜其威力欲與齊代興耳故春秋略其納昭書其伐喪翫之戰不以齊主兵而以宋及之皆惡宋也夫古者立子以嫡無嫡以長公子昭非正也使無虧既立宋襄因而撫之以修桓公之好諸侯其誰不樂從顧計不出此而謀動其國家變亂其少長以此圖霸不亦難乎觀魯與狄之救齊聖人皆善而書之狄尙可善而宋之不善爲已甚矣

宋人執滕子嬰齊

名滕子非貶也其義與楚執蔡侯獻舞同宋襄求伯不以德禮懷諸侯而侮弱爲強直書其事其惡自見不得貶也啖氏助曰春秋於執諸侯皆稱人亂辭也

會陳人蔡人楚人鄭人盟于齊

齊之盟楚所以愚弄諸夏以竊霸者也。陳蔡逼近于楚，惟其所役。桓公既沒，鄭伯新朝，楚見其隙之可乘，故託言不忘桓德，而介陳蔡以通于齊。孝公旣爲甘言所餌，而又見宋裏肆虐，雖有納己之德，實懷奪霸之心。故欲結楚以擯宋，而魯適以救齊怨宋，遂合而爲此盟。顧楚大夫在焉，序先陳蔡何也？蓋欲矯宋之虐小，而故下之以誘來者也。夷之參盟于夏大夫之抗盟于諸侯，皆始此矣。春秋懼之，沒不書公方氏所謂特文以見義也。

宋公楚子陳侯蔡侯鄭伯許男曹伯會于孟執宋公以伐宋

曹南之盟從宋者曹邾，齊之盟從楚者五國。宋自知其力之不足以致諸侯也，而介齊以求成于楚，使宋楚之從者交相見也。故鹿上之盟惟有三國，蓋共謀爲孟之會耳。楚方欲陵駕中國，旣與齊魯同盟，所懼與爭衡者惟宋。今幸宋求諸侯與爲好會，故僞許之以誘致其君，使之以乘車往，而自伏兵車以執之，甚矣宋之愚，而楚之詐也。當是時，魯方有事于邾，而齊第坐觀其成敗，而莫之援。中國無霸之禍亟矣。故春秋於會孟執宋，盟薄釋宋，不爲宋隱，閔宋之自取也。不授楚權，抑楚之暴橫也。而齊魯之附楚以外宋，亦不能逃其罪矣。

宋公及楚人戰于泓，宋師敗績

方氏以楚稱人，非君也。恐有不然，春秋外楚，自椒聘以前，未有以爵舉者。屈完來盟，沒不書。使宜申獻捷。

使亦書人惟孟之會稱楚子者蓋著夷狄爭霸之始自宋召之故書爵以抗宋罪宋也及盟薄則沒楚而戰泓復稱人經之常例耳至宋襄飾小名以取大禍則習見夫齊桓之假仁義以服人而不量己之力不逮齊也其不書公敗績者先儒謂爲宋諱辱然戰泓以後七月而卒則衆敗身傷其事亦不能諱矣

衛侯燬滅邢

衛侯燬之名也三傳皆以滅同姓故然晉滅虞虢齊滅紀楚滅夔皆不名何獨於燬而名之按邢衛皆滅于狄齊桓城而復之桓方在殯衛乃與宋伐其喪而殺其子衛之於齊甚矣邢以救齊之故與衛爲讎而衛遂用二禮之謀斬其血食是衛之不仁其心已死故書燬以從諸侯死則名之例甚衛也而邢之無罪可知矣而齊桓與滅繼絕之德益以著矣

楚人陳侯蔡侯鄭伯許男圍宋

楚君臣概稱人常也陳蔡鄭許雖屬役于楚經書戰伐會盟未有以大夫先列侯者垂臨之會不先士穀新城之盟不先趙盾豈於圍宋之役獨先得臣方氏謂主兵而先猶可言也列會而先不可言也主兵而冠履倒置豈可言哉宋先代之後也於周爲客而楚虐之執之于孟敗之于泓今又以背楚卽晉之故而帥四國以圍其都是其心直欲盡驅中原之諸侯以從楚而後已直書其事而楚頑猾夏之惡已彰固不待以人爲貶也

公會諸侯盟于宋

此圍宋之諸侯也。楚子在焉。不目楚子者。書法與盟薄同。不予楚以主盟之權也。于宋。宋與盟也。宋迫于兵而受盟。情有可原。魯以伐齊取穀之師。德楚爲深。不召而往會之。且爲宋求服于楚。以釋其圍。是楚之臣屬諸侯。魯實佐之。不待戍衛以備晉。而公之罪已不可逭矣。

晉侯齊師宋師秦師及楚人戰于城濮。楚師敗績。

城濮衛地也。致楚師于衛地而與之戰。則楚之勢孤。以視召陵之深入楚境而攻之者。其難易何啻倍蓰。方晉之欲救宋也。惟恐我師既出。楚遂解圍而歸。則欲一大創之實難。故始而侵曹。伐衛。以致其救衛之師。旣而執曹畀宋。以激其護曹之心。及兩師旣陳。而又許曹衛以攜之。拘宛春以怒之。退三舍以驕之。遂以一戰而取威定霸。雖陰謀祕計。不及齊桓之正。而其爲功于天下。則過齊遠甚。蓋自齊桓旣歿。宋霸不競。陳蔡鄭許之臣服于楚。不足言矣。而魯且屢盟衛。與爲婚。惟宋不屈。圍之踰年。非晉文起而討之。則楚之猖狂不道。禍且延及王室矣。故雖侵曹伐衛爲報怨。執曹畀宋。非伯討。春秋曲諒其爲服楚之計。而亟書晉侯以予之。逮乎城濮之戰。三國稱師。晉獨書爵。則聖人之心可見矣。先儒拘于書及之例。謂經于晉。無美辭。不知以晉及楚。亦以別異主客耳。豈必以此判其事之美惡哉。

衛侯出奔楚

鄭突衛。朔出奔。則名衛侯。鄭獨不名者。突奔而忽立。朔奔而黔车立。方氏所謂國有二君。不名無以別者是也。鄭之奔也。晉人立叔武矣。而武則以國爲君之國。特與元咺守之。俟其反也。故鄭之不名者。所以表

叔武之心以甚衛侯殺之之慘也。自踐土受盟以後，武不見經而續書元咺奔晉，執衛侯比事以觀，則傳所謂疑其篡已而殺之者信矣。既已殺之，是叔武不自爲君而鄭成之爲二君也。故於其復歸而名之。

公朝于王所

自入春秋以後，僅于成公十三年書如京師。獨晉文創霸之初，盟于踐土，會于溫，一歲之間，兩率諸侯以朝于王，豈非十二公僅見之盛事哉？書曰：「公朝朝之。」異于如也。著晉侯尊王之功也。書曰：「王所所之。」異于京師也。亦不掩晉侯召王之罪矣。

會王人晉人宋人齊人陳人蔡人秦人盟于翟泉

盟者告神以約信之辭也。不敢以不信加于尊者。故諸侯尙不與王人盟。況大夫乎？而翟泉又在王城之側。諸侯之上逼天子大夫之交政中國，皆自此始。沒公不書，所以貶晉文者深矣。

取濟西田

濟西魯田也。宣元年齊取之，非齊地，故言取也。十年齊歸之，本魯地，故言歸也。與鄭讓龜陰之言歸一也。今晉執曹伯而反諸侯之侵地，則濟田宜歸于魯，乃不言歸而言取。若非所有者，然則曹人力屈于晉，而非心好于魯也。與成二年取汶陽田同。但曹弱于齊，故汶陽仍以歸齊，而濟西遂爲魯地矣。

夏四月四卜郊不從乃免牲猶三望

啓蟄而郊於周正宜用三月，四月非其時矣。庸愈于九月用郊也。卜不過三四卜非其禮矣。庸愈于五十卜。

不從也免牲則不郊固知上帝弗享矣望郊之細也不郊而望不亦可已而不已乎故書猶以譏之魯之有郊福也記云成王賜之以報周公之勳然呂覽言魯使宰讓如周請郊福禮王使史角諭止之而惠公怒執王使則是僭端起自惠也但其時或以平王不許未敢肆行故歷隱桓莊閔之篇無見焉及僖公從齊伐楚誇大其功僭用王祀其在詩曰皇皇后帝謂郊也周公皇祖謂福也自是相習爲常經不勝記惟於其失而又失者記之則自僖始豈得謂賜自成王受自伯禽也哉

衛遷于帝邱

衛遭狄難齊城楚邱以遷之今三十年矣而避狄于帝邱則以自遷爲文晉霸方盛而狄之爲患于中國如此豈非文以出奔之事德狄而怨衛歟及明年衛乘狄亂而侵之盟之亦所以自古其圉不得已之計也而論者以盟狄爲衛罪不亦苛乎

公子遂如京師遂如晉

魯不朝王而僅使公子遂報宰周公之聘非禮甚矣魯雖望國惟強是從齊強則朝齊楚強則朝楚今將聘晉而恐晉文之責其無禮于周也故不得不先如京師而後如晉書曰遂者繼事之辭亦專主之辭也魯事盟主過于事周脫非晉文之率諸侯以勤王得毋如隱桓之時王臣屢聘而不一答乎

晉人及姜戎敗秦師于殽

秦既背晉盟而遣鄭戍於鄭厚矣復欲潛師以取其國其意豈僅在鄭亦將乘霸主之喪而爭主諸侯之

盟也。使其果得鄭以窺中原，則馳騁殼函，蹂躪畿甸，周鼎入秦，恐不待孝公以後。惟晉襄墨衰發命，違興姜戎，犄之角之，使之匹馬隻輪不返，始得摧其雄心，不敢越晉而謀東夏。家氏鉉翁謂城濮之戰，功在天下，殼之戰，功在其國，豈篤論哉。

晉人敗狄于箕

先孺謂殼與箕之役，人晉以貶其忘親而卽戎，非也。殼之謀原軫發之，箕之功郤缺成之。大夫主兵，自成公以前，皆書曰人，非有所褒貶也。狄之爲害，非僅在晉。齊桓卽世，狄侵衛伐鄭，而孝公不能禦，故齊霸遂衰。晉文末年，狄圍衛侵齊，而襄公能敗之，故晉霸弗替。繼先人之業，而彌中夏之患，此二役也。使桓公見之，應歎生子當如晉襄矣。

公如齊

周公下聘，而公不朝王，歸父一來，而公遂如齊，此何禮也？據傳公之朝齊，文仲勸之，此臧氏之不足與謀國難，免竊位之譏也夫。

天王使叔服來會葬

天王使毛伯來錫公命文公

叔服會葬，天王欲親魯以懷諸侯也。魯之無禮于周甚矣，而獨善事強大，朝齊聘晉，勤無虛歲。凡桓文仗義之舉，僖皆從之，踐土河陽，遂迫于晉文，兩脩朝禮，王於其卒，特加厚焉，獎其善而宥其愆，欲使天下之相勸于尊周也。又春秋侯國，世子既不誓于天子，嗣位亦不請于京師，下不以禮來，而上遂不以禮往，是

使上下否隔不通而廢立皆得以自擅矣。今不俟文之喪畢而先命之，固寵其父以及其子，亦所以正天子之操柄也。故春秋於會葬錫命書之無貶詞，不貶周而所貶固有在矣。

楚世子商臣弑其君頽

書世子弑其君，春秋之治楚也。所爲用夏變夷也。頽嘗弑其兄而奪之位，事不見經外之也。故其先國以號舉入蔡曰荆，伐鄭曰荆，卽來聘亦曰荆。自頽之漸大，與宋爭霸，與魯同盟，曖駁乎與中國之諸侯等。中國則不可以夷狄之治治也。故爲正其尊親之名，而誅其亂賊之罪。楚幸矣。聖人治之，卽聖人不絕之矣。不然，以楚之僭王，必以其嫡子誓于天子，而目之以世子也，何爲。

及晉處父盟

及不稱公，諱辱也。處父繫國，誌此盟之在國都也。誌處父之受君命也。禮身之幹也。晉以非禮加于諸侯，而使其臣得抗鄰君，不將誨之與已抗乎？書曰及晉處父盟，惡晉襄之自決其禮防也。而魯文不免自立，雖諱之而亦欲蓋彌彰矣。

公孫敖會宋公陳侯鄭伯晉士穀盟于垂隴

晉襄紹霸，躬墨衰而敗秦狄，可謂振作有爲。自伐衛疆戚之後，志驕氣怠，直以國事委其大夫，故垂隴之盟，書士穀伐楚，救江之師。書陽處父自入春秋外大夫而出主名于征伐會盟間者，實始于此。彼徒偷一時之安，而不知大夫強，諸侯脅，遂以兆六卿專晉之禍。春秋于此有履霜之懼焉。

逆婦姜于齊

出姜之歸寧也。書夫人姜氏如齊。夫人姜氏至自齊。正其爲小君也。而其始歸于魯。何書之略也。夫逆則稱女。至則稱婦。稱夫人。禮所固然。第曰逆婦姜于齊。惡文公也。以公之不告月。不視朔。不憫雨。作主不時。壞廟不修。雖天祖之質臨。而敢于慢之。其亦何所不慢。故逆不以卿。至不於廟。簡于禮。以卑其主。而不知敬。嬴仲遂之竊睨其旁也。由不敬其始。遂無以善其終。記云。以舊禮爲無所用而去之者。必有亂患。此之謂矣。

楚人滅江

初商臣弑逆之日。正晉襄尊攘之資。使當彭衙既勝。而移伐秦潰沈之師。聲其罪以致討。則楚必有情屈勢阻。負罪不敢抗者。而何暇圖江。惟伐秦不足中其忌。潰沈不足披其心。楚知晉之無能爲也。於是肆其吞噬之謀。而始而圍之。繼而滅之。小國之無所依庇也。哀哉。春秋書處父救江于其前。書晉侯伐秦于其後。是江之未滅。而處父以孤軍促之。江之旣滅。而晉侯以修怨忘之。所由與桓文之分災救患者。異矣。

公會諸侯晉大夫盟于扈

扈之會。不序諸侯。不名晉大夫。左氏謂責公之後至者。非也。先儒謂以君幼而恕盾之主盟者。尤非也。國無長君。而大夫遂假一時之權。則季子可以盟落姑。仲孫可以盟長樗。亦何必以閔襄親之。使當靈時。而有桓文。必將會而不盟。而責趙盾以舍嫡嗣而外求君之罪。則不臣之心。或可稍戢。乃據左傳考在會之

諸侯齊有狄患宋有內亂魯文習安于昏惰陳鄭心懾于楚氛皆自救之不遑者而盾遂以大夫抗衡于壇坫故略之曰諸侯著之曰大夫蓋總觀天下之大勢祿去政遠自此始也胡傳所謂趙盾內專廢置外強爲此盟故不名以見其強者是也至謂公之不及于會則十五年盟于扈十七年會于扈皆不序諸侯又豈以公故乎

公子遂會晉趙盾盟于衡雍

公既與晉盟于扈矣踰年而遂復爲衡雍之會不亦瀆乎晉靈幼弱權在趙盾遂欲外結強援內專國政托爲尋扈之盟以行而文公闔弱直縱之也觀公之時征伐會盟諸卿迭出而遂爲尤專故殺適立庶遂之禍發于近而三家亦踵而分魯矣

楚子使椒來聘

楚之爲夷諸夏所擯所謂政教不及其人者也自成穆以來旣爲正其肆逆之罪即不得不錄其慕義之心其來聘也君臣並見于經與中國等蓋聖人不忍沒人之善如此然亦隱痛文襄之霸業旣衰遂使楚與中國等也則世變存其間矣

秦人來歸僖公成風之襚

成風之薨葬書夫人矣此曰僖公成風穀梁以爲秦人弗夫人也使秦人果弗夫人奚爲加禮于人之妻乎秦人旣來歸襚奚肯致慢于人之母乎且成風繫僖與仲子之係惠正自有殊君無二嫡而母以子貴

則係惠者未成之爲夫人也。係信者已成之爲夫人也。使循仲子之例。則宜書曰莊公成風矣。或曰追贈信公。兼及成風耳。果爾。則以母居子下。非所安也。

楚子蔡侯次于厥貉

狼淵之師。晉救不力。楚遂平鄭及陳。至此益知北方之可圖。而偕蔡侯次于厥貉。將以伐宋。其趨趣不逮前者。未嘗不惕于文襄之餘威也。而趙盾鼠拱蠅縮。方待踰年而爲承筐之會。不思已之無以庇諸侯。而責諸侯之從楚。又何足以固同盟而威強敵乎。故厥貉書楚子。非以褒楚。特以著晉之不競。而楚益強也。

公會宋公陳侯衛侯鄭伯許男曹伯晉趙盾癸酉同盟于新城

新城之盟。宋陳鄭之從楚者皆在焉。亦晉霸復興之機也。當楚子田于孟。諸分宋鄭爲左右孟。而以公侯受役于司馬。靡人且耻而逃之。況宋鄭乎。特患晉之無志于諸侯也。及彭生爲承筐之會。魯文有杏棐之會。諸侯之惡楚者。將惟晉是依。於是翕然相從。先會後盟。而載書要言曰。同誓不貳也。使晉於此乘諸侯之同志。誅猾夏之狡謀。安知桓文不可以再見。故春秋序諸侯而名趙盾。與扈之盟異者。蓋幸列國之散而復合。而以攘楚望盾之乘時也。

齊人執子叔姬

三傳皆以叔姬爲舍母。而或以叔姬爲舍妻。以叔姬稱子。定爲文公之女。其年與齊昭不相稱也。然考隱及莊僖之篇。伯姬叔姬季姬皆不稱子。豈無一爲時君之女乎。況莊公之會伯姬于洮。僖公之歸季姬于

鄧先儒皆議其愛女之過。安在君女之必以子稱。或以爲叔姬之舍母。則當書執其君之母。吾以爲叔姬果舍妻。則當書執其君夫人。其不稱母與夫人。而第曰子者。自魯錄之。若曰是固吾魯之子也。親之而憫之也。其執書齊人何也。今之黨商人者齊人。後之弑商人者亦齊人。齊人固多詐矣。亦以見弑君之賊之還弑于其黨商人導之也。

諸侯盟于扈

盟扈將以討齊。會扈將以討宋。皆取賂而還。經書諸侯而沒晉。責靈之不足主盟也。或曰是役也。晉靈不出。顧靈在位九年矣。計其年當得十一二。非不能行會禮者。觀其後屢欲殺盾。則盾之廢立專政。靈實積怒于心。豈肯使之屢合諸侯而不自出。則傳謂晉侯親之者。應不誣也。或又謂扈之會盟。以趙盾實序諸侯之上。不可以訓。故書之從略。然終春秋之篇。未有以大夫先諸侯者。趙氏鵬飛謂新城之盟。盾實主之。聖人排盾于諸侯之下。亦如垂隴之盟。排士穀于下者。使盟扈赴台之書。果先趙盾。春秋何難排而下之。而必隱諱不言。轉無以顯著君臣之分耶。觀鄭穆以晉不足與。受盟于楚。及靈弑成立。而鄭卽背楚而從晉。則弑君之賊惡固有所歸。而靈亦不得辭其咎矣。

子卒

弑而書卒。臣子所不忍言。諱之也。然于子卒之下。書夫人姜氏歸于齊。與齊人弑舍而歸叔姬。其事正同。則其故可知矣。獨以叔仲彭生之節。而不得與孔父仇牧並書。何也。諱子惡。卽不能不諱彭生也。然會承

管則書彭生。帥師伐邾則書彭生。而自子卒以後。寂無聞焉。亦足令學者疑而思之矣。

季孫行父如齊宣公

宣公之篡。仲遂成之。仲遂之謀。行父成之。當子惡既卒。夫人大歸。行父如齊。必以賂動齊侯。而告以國人之欲立宣。及宣既篡立。喪昏復爲如齊納賂。以請平州之會。而定其位。始終曲全。而篡君之德已深矣。而奸臣之竊柄固矣。宿與意如之專國。行父啓之也。夫殺嫡立庶。以失大援。行父實心知其罪。使能爭之于仲遂。兆謀之始。而不待歸父謀去三家之時。則魯以行父爲社稷臣。吾亦信之。

宋華元帥師及鄭公子歸生帥師戰于大棘。宋師敗績。獲華元。

鄭自會扈以還。叛晉從楚。侵陳及宋。晉兩伐之。而不足以創鄭也。至此遂受命于楚。興大衆以伐宋。既敗其師。又獲其帥。而不畏晉救之至者。蓋隱知其君臣之有隙。非靈殺盾。則盾弑靈。固無暇謀及諸侯也。春秋書此。所以惡晉之失德。而列國遂相尋于報復之師焉。又帥師書華元歸生者。方氏謂自文以後。霸國之卿以名見。與列國會伐。仍稱人。自宣以後。卿將以名見。而大夫將則稱人者是也。亦足見諸侯之皆厭其政。而權歸國卿矣。

楚子伐鄭四年

是年伐鄭書子。胡傳謂歸生弑君。諸侯未能討。而楚師至也。及九年伐鄭書子。胡傳謂著其凌暴中華。以重兵臨鄭也。是同一子。而前用爲予。後用爲奪。何義例之矛盾乎。不知子者。楚之本爵。自公子嬰齊以前。

凡稱子者君自將也稱人者大夫將也無所爲予奪也如以稱子爲予則伐陸渾之戎楚且觀兵以撼周鼎也其何以予之

齊高固來逆子叔姬

宣公在位甫三年而叔姬已可以適人則楊氏士助以爲公之同母姊妹者同母不可知而姊妹自可信亦足見稱子之不必爲時君女也顧叔姬旣爲公之姊妹而連婚於齊之大夫固自逆之公自主之則魯宣之以不義屈于人齊惠之以非禮縱其下其惡皆不可掩矣

公會晉侯宋公衛侯鄭伯曹伯于黑壤

黑壤之會晉人止公而不與盟或曰諸侯本不盟也然當是時晉成繼立五年始會諸侯以外楚宜無不盟者使宣公非有執止之辱奚爲冬會春至不月而時耶況至自會而遂卽是齊喪未終而公自朝齊及晉侯會屬盟清邱公皆不與憤晉愈深事齊彌謹而公篡之藉齊成謀情益顯矣惜乎晉成承弑君之後而不能討賊亦非無瑕可以戮人者而魯遂得終逃其罪也

陳殺其大夫洩治

春秋書國殺大夫皆以著其專殺之罪而大夫之功罪未嘗不卽事可徵其無可徵者必無功亦無罪者也而有功與罪者則事繫于此而每錯見其義于前後如陳殺洩治經雖不明著其諫然讀陳風株林之詩則靈之淫于夏氏明甚而洩治死于其朝則其不與孔寧儀行父從君宣淫亦明甚洩治旣死踰年而

有徵舒之禍。公弑而二子奔。則復治之以孤忠。見殺。雖微三傳。亦可按其時事而知之矣。

楚子陳侯鄭伯盟于辰陵。辰陵之盟。楚先陳鄭。說者謂予楚以霸非也。二國近楚。屈于力而受盟。亦如宋襄之盟曹南。曹邾獨從。未足爲霸。但楚方銳圖中原。而晉顧求成衆狄。故辰陵書楚子。所以對攢函之書。晉侯一競于所必爭。一務其所不急也。胡傳謂予楚之能謀討賊。使辰陵果爲討陳而盟。則義聲先有以動人。而傳載子良之言。不應云晉楚不務德而兵爭。與其來者可也。

冬十月。楚人殺陳夏徵舒。丁亥。楚子入陳。

傳先書入。而經先書殺者。胡傳謂與楚子之能討賊。故先之也。然經誌其時。誌其月。又詳其日。依次直書。豈任意爲倒置。蓋楚師旣出。先告陳人。以討少西之意。而陳果翕然同欲靜俟行誅。故大衆臨城。元惡授首。書曰。楚人臣也。義在殺。不在人也。使楚于此。瀕徵舒之宮。定陳午之位。斂兵而退。無造國都。則可謂霸者之師矣。乃假其事以爲功。而貪其國以爲利。書曰。楚子君也。義在入。不在子也。殺其所當殺。而入其所不當入。楚之功罪判矣。聖人之予奪明矣。若夫孔寧儀行父。陳之罪人也。討其亂。而縱其致亂之臣。義師之謂何。蓋楚子自度其力不足以有陳。故納二子以制其國。使無背楚而已矣。

晉荀林父帥師及楚子戰于邲。晉師敗績。

不善救鄭。鄭已服也。無及于鄭。而勦民。林父亦旣知之。使其整軍而還。以俟後釁。則餘威猶存。楚人非無

懼也。自邲戰一敗，楚遂滅蕭圍宋。而晉乃急急焉爲清邱之盟，則楚氣張而晉氣益餒矣。

宋人及楚人平

楚討陳而得陳，圍鄭而得鄭。今又伐宋，圍宋，歷年加兵，必欲服之而後已。蓋宋天下之樞也。晉得宋則可服陳鄭以逼楚，楚得宋則可通齊魯以逼晉。清邱之盟曰：恤病討貳。宋之伐陳爲討貳也。而晉曾無恤病之心。使楚人得志于宋，晉之自棄其與國亦甚矣。況宋以弊憊之餘抗楚不屈，雖至易子析骸，猶不肯爲城下之盟。其義勇大可鼓也。使晉景以伐鄭，示整之師，移而救宋，親涖戎行，與爲掎角，縱不能一戰勝楚，而楚亦必畏而避之。乃惑于鞭長不及馬腹之言，寢兵不出，而宋遂不得已而與楚平。故凡平不書，而此獨書者，陳氏傅良以爲天下將有南北之勢也。晉執其咎矣。

仲孫蔑會齊高固于無婁

自齊元旣卒，公不如齊者四年矣。齊以援立之功，不能無望于魯。故使歸父會齊侯于穀，復使蔑會高固于無婁。蓋欲探齊人之意，能庇我則終事之，否則改而事晉。斷道之盟，決於此矣。春秋蓋示後世以躬負大惡者，無以自存，而惟以諂事強大爲急也。若大夫與大夫會，則自衡雍承筐已先之，不待貶矣。

公會晉侯衛侯曹伯邾人同盟于斷道

此晉侯之欲合齊魯以復振其霸業也。蓋自宋楚旣平，魯卿薦賄，使楚介宋魯以通齊，則天下將盡歸楚，而凌暴中原之禍不僅魯衛曹邾當之矣。故晉侯急欲得齊，而使郤克徵會，使齊頃親涖壇坫，而不僅使

其大夫則踐土之好復通將與之戮力同心惟楚是攘必不以口血未乾而背盟與師爲臣報怨也說者徒見鞍之戰皆在會諸國之卿遂謂同謀伐齊釋其忿怨然是年卷楚之盟與明年陽穀之師景皆親之而戰鞍則僅屬之郤克是爲笑雪耻乃國卿之擅兵非晉景之夙志也穀梁以爲同外楚者得之

公弟叔肸卒

書曰公弟明非大夫也非大夫則不卒而叔肸獨卒與其不義宣公之所爲也公爲不義國人皆知之而三桓滅氏諸臣儼然立其朝食其祿其有殺身而不願與同朝者彭生也織屨而不屑與共祿者叔肸也彭生宜卒而不卒所以愧大夫而卒者之莫非同惡也叔肸不宜卒而卒之所以愧卒而大夫者之誰爲能賢也春秋之旨微而顯矣

邾人戕鄆子于鄆

于鄆國都也造其國都殺其君雖用大師猶恐不克今不曰師而曰人則微者也戕者殘其支體之謂陰伺其隙卒起而亟刃之盜之爲也然使書曰盜戕鄆子則守禦不嚴將歸罪于鄆之臣子而邾之陰賊險狠凌虐弱小者轉得逃其誅矣

歸父還自晉至笙遂奔齊

宣公之肉未寒而用事之臣遽黜行父之死其君也甚矣哉蓋歸父會齊會楚伐莒伐邾公之任爲腹心過于行父今又使之如晉行父疑其不利于己也而遂暴揚先君之惡追仇旣往之愆逐東門而專國柄

孔子所謂鄙夫患失無所不至者此矣。左氏惑于行父之飾小節而竊美名。遂以謀去三家。蔽罪歸父。無論其事之有無。卽有之而不臣如行父。亦豈非王法所當誅者哉。

讀春秋卷下

臧孫許及晉侯盟于赤棘成公

歸父始而如晉。既而奔齊。齊魯之隙已成。而仲遂之好未泯。行父當國。恐其出齊師以問逐東門之罪。故不得不求庇于晉。而爲赤棘之盟。顧行父不自如晉何也。東門之逐行父啓之。許則成之。許黨行父而爲之用。則是盟也。特爲行父結援于霸主外。以備齊。實內以脅魯。而晉侯則惟恐魯之卽于齊楚也。固不措降尊以就卑。不暇慮大夫之抗矣。

公會楚公子嬰齊于蜀

昔楚子在宋。歸父薦貽謀國。固不臧矣。但其時魯方親齊。齊已通楚。固不得不謀所以事之。今旣受盟于晉。與晉伐齊。則謹守封圉以待晉援可也。乃楚師甫臨。魯君遽出而降尊以盟楚。及列國之大夫。季孫之辱其君爲何如也。且晉楚亦非有政令嚴明者耳。使陽穡之役。楚必欲究伐齊之人。盟蜀之後。晉復來討。從楚之罪。則季孫果得以君爲孤注。而已能倖免乎。徒見其於君爲不忠。於己爲可恥耳。故春秋會楚必諱。公盟外大夫必諱公。而于蜀獨不諱者。蓋咎不在公也。

新宮災三日哭

天火曰災。人火曰火。災新宮。天所以誅宣也。而在臣子之心。則不能不自引罪。哭之三日。固宜。胡傳從劉

氏之說以宣主未入哭爲非禮。劉云：丹檻刻榜皆稱桓宮，此不舉謚主未遷也。顧公薨二十有八月，遷主已爲緩矣。今以易檻改塗之後，天又燬之，則入廟將在何時？誅宣亦所以警成也。安得而不哭之？

公會晉侯齊侯宋公衛侯鄭伯曹伯邾子杞伯同盟于蟲牢

鄭自邲戰之後，一意從楚。晉雖屢伐之而不能服也。今幸其訟許不勝，遣使請成，霸勢之振實係于此。故爲合諸侯以申其誓而固其交。自後馬陵之會，蒲之盟，鄭皆與焉。楚懼失鄭而屢威之以兵，甚且求之以賂，則知晉楚之強弱。實視鄭之向背，蟲牢會盟，晉景固善乘其機矣。至于九國之不奔喪，則據事直書，不待貶而惡自見者也。

公會晉侯齊侯宋公衛侯曹伯莒子邾子杞伯救鄭八月戊辰同盟于馬陵

前此楚師伐鄭，晉以樂書救之，遇于繞角而楚師還，茲之救鄭亦遺樂書足矣。而景必躬親之者，非忧于楚氛之益熾也，蓋欲爲馬陵之盟於宋釋辭會之隙，於莒結久叛之心耳。顧其先會而後盟何也？楚師在汜，鄭方修其戰備，不暇尋盟，故率八國之師以救之，懼失鄭也。蓋與齊桓之移師救許，同一分災急病之義矣。使景常存此心，以睦鄰攘楚，文襄之業不其興矣乎？故春秋特書救鄭以善之。

吳入州來

楚方爭鄭，而吳已以兵入其與國競前功而忘後患。入州來，卽入郢之漸矣。吳爲僭王之國，春秋惡之。實與楚同，而晉顧欲通吳以罷楚，屢以好會招之，不知吳控州來，則南以病楚，而北且以窺魯。封豕長蛇，荐

食上國亦兆于此吾不意晉之君臣竟無一能如季孫之知懼也黃池爭先所謂自貽伊戚者矣。

公會晉侯齊侯宋公衛侯鄭伯曹伯莒子杞伯同盟于蒲

此晉景疑諸侯之貳而爲會以尋盟也。汝陽魯之故地也。而晉奪之。孫林父衛之叛臣也。而晉納之。鄭本寡弱。力屈于吳。而晉不恤之。而合三國以伐之。措置乖方。景亦自知不德。縱諸侯畏晉之強。莫敢依違。而先待之以虞詐。要之以神明。已則疑人。而謂人能無疑乎。惜乎蟲牢馬陵。晉霸稍有起色。自盟蒲而終無以駕楚也已。

晉人執鄭伯

傳謂楚以重賂求鄭。蓋欲間鄭于晉也。使鄭伯果通于楚。則必不敢朝晉。春尋盟而秋來朝。其不叛晉。卽楚之心亦明矣。而晉顧執其君。殺其行人。旣以樂書伐之。又使衛人侵之。是爲楚驅鄭也。及鄭人立君。而晉乃合五國之師伐而求成。鄭雖暫屈。而卒爲楚侵宋。爲楚戰鄢陵。終厲公之世。三假王命以伐之。而終不服。則鄭之積怨毒于晉也甚矣哉。

公會晉侯衛侯于瑣澤

傳以瑣澤爲華元合晉楚之成。而經惟會魯衛。不列楚鄭。故劉氏斂以左氏爲未足信也。考傳所謂盟于宋西門者。惟晉士燮、楚公子罷、許偃、三大夫而已。非惟其君不與。他國更無與焉者。及鄭伯如晉聽成。亦晉與鄭爲成。未嘗合魯衛與同盟也。此與瑣澤之會。本爲兩事。傳誤合而一之耳。然則經紀瑣澤而略宋。

盟何也。厲公嗣爲霸主，修好魯衛禮也。若與楚爲盟，則裂中外之防，諸侯何歸焉？況其後楚子伐鄭子反，曰：敵利則進，何盟之爲？則是盟特華元之邪謀，固無足道者。

公如京師

文之倡霸也，勝楚而兩朝王襄之繼霸也，伐衛而躬朝王。厲欲振文襄之緒，而知惟尊王可以服人，故於伐秦之役，率諸侯以修朝禮，而公先如京師焉。其先如者，特以不敢慢霸主之令，豈所謂六年一朝者哉？使當日非會晉伐秦，道過王畿，吾知諸侯皆絕跡于周之廷矣。春秋猶幸，厲公假此義也。書如京師，書自京師會伐，若稟令于天子者，然存君臣之倫也。觀此而知過北門而超乘，臨周疆而觀兵者，其罪不勝誅矣。

叔孫僑如會晉士燮齊高無咎宋華元衛孫林父鄭公子鮒邾人會吳于鍾離

鍾離楚邑，而吳能據之，以會列國之大夫，則楚之避吳可知矣。列國懼楚，欲假吳以爲援，不得不趨而承之，故始會大夫會也。繼又會與吳會也。公穀以殊會爲外吳，不知吳楚之惡一也。經不外楚，何獨外吳蓋自彼來會，則列序而不殊于感是也。自我往會，則殊會而勿并鍾離，祖向是也。趙氏鵬飛，所謂事殊而文異也。獨是晉以霸主之威，不能致吳于蒲，而委其大夫以往從吳，則吳愈強而大夫之勢亦熾矣。衆會而皆以名見，遂始此矣。

晉侯及楚子鄭伯戰于鄢陵，楚子鄭師敗績

鄭陵之師爲鄭之侵宋動也。師甫及鄭，楚遂親率大衆而來。其氣甚銳，固有剪滅此而朝食者。使當日從范文子之僞逃而不使之國，蹙王傷則楚鄭之師必及于宋。納其叛臣以據宋，而爭中原。不惟魯衛交病，問鼎之禍復橫矣。左氏徒見厲之不得其死，遂以外寧內憂之言爲先見。豈知厲之弑由諸臣之爭權妬寵，互相讒害以延及君耳？而以克敵爲天益其疾以召難也，則過矣。

曹伯歸自京師

初，晉侯執曹伯歸于京師。曹伯有可執之罪，而晉侯無擅治其罪之嫌。終春秋之執諸侯大夫，無善于此者。及其釋之，徒以反子臧而不以賂與晉文之以十穀釋衛鄭者異矣。書曰：歸自京師，不名曹伯，不舉其國。若無罪而歸者然。蓋天王念曹伯之列于會盟，義不復討。從其請而赦之，以掩晉侯先會後執之誤。天王亦無譏也。

晉人執季孫行父舍之于苦邱

僑如之譖，固出于私。而其言曰：魯之有季孟，猶晉之有欒范。則兩國之政令萃于私門，衆人皆知之，獨成與厲不知也。若邱之執赦而與盟，則行父之素托于強援，欒范之隱庇其黨，與情狀昭然。而魯猶以行父爲忠，晉人亦思欒書如召伯。此季所以專魯而書且甚而弑厲也。

晉弑其君州蒲

三郤之誅，欒書譖之。晉童之死，欒書刃之。州蒲之弑，欒書使之。春秋皆稱國而無主名，蓋晉人久爲所愚。

而不欲以書之惡赴諸侯也。然自郤克以後，書秉國政十餘年矣。國之弑君，非書而誰。說者以稱國爲君無道，顧厲卽無道，豈甚于靈。而盾獨不免，則盾之惡與所以自飾其惡者，奸不及書。故盾猶有後，而晉遂再傳而亡矣。

仲孫蔑會晉欒黶宋華元衛甯殖曹人莒人邾人滕人薛人圍宋彭城襄公

楚鄭之以師納魚石也，豈惟亂宋，將以塞夷庚之道，伺諸侯之釁，中夏所同懼也。晉悼以畏簡書之義，冬會虛打，春圍彭城，取五叛臣歸置匏邱，而後得以彭城歸宋。顧其始圍之時，而卽繫之宋者，先儒謂仲尼親筆也。以楚不得取之宋，魚石不得受之楚也。不知虛打之會，宋公與諸侯列序彭城之圍，華元與諸大夫列序，而未嘗有救宋之明文，不繫之宋，則未知衆所圍者果爲何國之地矣。安在舊史之第書圍彭城哉。曹邾滕薛稱人，小國之大夫也。觀此益知之。

仲孫蔑會晉荀罊齊崔杼宋華元衛孫林父曹人邾人滕人薛人小邾人于戚遂城虎牢

虎牢不係之鄭，何也？非鄭之所有也。鄭之有虎牢，平王嘗賜之矣。其後失之，惠王又與之矣。謂非鄭有何也？蓋鄭人惟楚是從，南向必出虎牢。楚人藉鄭爲援，東侵必踰虎牢。據其險阻以肆其暴橫，虎牢幾爲楚城。畫其舊封，虎牢始爲鄭之虎牢，而非楚之虎牢矣。初不係鄭，而後係鄭，一字之增損，而天下之大勢昭然在目矣。

同盟于雞澤

雞澤之盟。單子與焉。杜氏以爲王使出盟以安王室。故無譏也。顧卽有王命。寧不可如宰周公之與會。而不與盟乎。當靈王卽位之初。非有襄王叔帶之難。亦不得以王人盟。洮爲比。夫晉悼之姿。不下齊桓。顧其敢與單子要言者。則翟泉作之于前。柯陵繼之于後。悼惟守其遺法。而其臣亦無能告以尊王之大義者。則韓厥荀罊之有愧于管氏也。

叔孫豹及諸侯之大夫及陳袁僑盟

不曰大夫。而曰諸侯之大夫。臣統于君之辭也。陳自辰陵之盟。久于從楚。今袁僑如會。是欲棄異而卽同矣。不與之盟。則無以固其心。躬與之盟。則無以正其分。故悼公不以諸侯及之。而以大夫及之。正不欲使列國之大夫得抗諸侯也。論者徒見溴梁以後。大夫益張。遂以此盟爲操柄之所由失。豈篤論哉。

公會晉侯宋公陳侯衛侯鄭伯曹伯莒子邾子滕子薛伯齊世子光吳人鄆人于戚

春秋狄吳常以號舉。其稱人者。由與鄆並列。公羊所謂吳鄆人則不辭者是也。而或以其與晉爲會。猶徐與齊同役。故人之彼十年會。亦晉悼也。而吳復以號舉。將何說焉。若先儒諸侯往會。則貶而稱國。來會諸侯。則進而稱人。恐亦非春秋之旨。

莒人滅鄆

鄆之屬魯也。公請之。晉侯許之。而邾與莒伐之。自滅。紂有狐駘之敗。豹復與巫如晉。欲憑霸主之令以戢

強暴之心而莒之忿怒未釋也故魯不利于屬鄧而使鄧聽命于會使莒而畏晉則不敢滅鄧使晉而存鄧則必將討莒顧乃舍莒而責魯何也蓋自元年會鄧齊將叛晉而莒方事齊晉欲固齊之交遂曲怨莒之罪書曰莒人滅鄧責晉之無以正諸侯也

鄭人侵蔡

于鄒之會陳侯逃歸而晉不問蓋自量其力之不足以撫陳也何有于蔡而鄭人無故侵之既非受命于晉徒以結怨于楚是子駟之心欲致楚師以脅其君于必從也不知鄭隸王畿陳近荆楚棄陳猶可失鄭必爭駢徒欲專一國之謀而適以召三駕之禍其悖寔甚觀此則知鄭僖之卒公穀所謂臣欲從楚遂弑其君者未可議其說之誣也

季孫宿會晉侯鄭伯齊人宋人衛人邾人于邢邱

此左氏所謂齊高厚宋向戌衛甯殖也而經皆人之說者以爲貶而方氏斷爲非卿不顯與傳背歟然考十四年會吳之役名晉士匄鄭公孫壘而於齊宋衛人之伐秦之役名晉荀偃衛北宮括鄭公孫壘而於齊宋人之何予奪之不一例乎況同此北宮括也于向稱人會代稱名前後頓殊經無微旨或惰或攝亦左氏從爲之辭耳又考二十六年澶淵之役名鄭良霄而人晉趙武宋向戌左氏謂趙武不書尊公也良霄獨不宜尊公乎向戌不書後也後亦惰之爲病良霄豈能攝而無失者乎此劉氏敵所謂皆未足信也然則邢邱之會謂貶大夫使不得抗晉者非也夫合諸侯以命朝聘之數晉侯臨之大夫聽之上令而下

其有何不自爲政委于其臣之患且卽譏晉之失柄而名列國之大夫亦豈不足以示譏則舍稱人非卿之說而於義俱有所未安也卽據經而背傳可也

會子蕭魚

啖氏助謂戲毫二盟止言十二國蓋鄭未服而諸侯自同盟也然以蕭魚之會觀之鄭伯亦不列序不得謂鄭弗與也則前此戲毫受盟可知但盟而復叛故書曰同今蕭魚不書同并不書盟則晉鄭之相與誠矣蓋自偏陽滅而晉能通吳人之道子駟死而鄭得用子展之謀楚方懼吳之乘其後而不敢爭鄭矣鄭乃幸晉之可以依而因以絕楚矣不戰而屈人之師不約而堅人之信先儒所謂伐楚盟召陵伐鄭會蕭魚皆序續之文也

衛侯出奔齊

諸侯出奔則名所以明有二君而衛衎不名者不與剽之爲君也衎爲無道失國固宜而剽藉強臣之力肆篡奪之惡使春秋從而名衎則是天位可竊而亂賊皆得逞志于其君人道不幾絕乎其以自奔爲文而不書孫甯逐之者亦此義也

季孫宿會晉士匄宋華閱衛孫林父鄭公孫臺莒人邾人于戚

林父負逐君之大惡而衆會大夫能不懼晉人之討乎蓋其世專國政素結強援晉之諸卿皆私之矣既聞師曠之言直斥衎之不德又有荀偃之對以定剽之爲君知逆謀之有助而討執之不加則合列國之

大夫以會于其私邑必由林父請之也夫悼本賢侯而自蕭魚以後會向伐秦委諸臣下既持其利器以假人且惑于邪言而黨惡天下尙知有君臣之大分乎其亦死期將至而神智先亡也歟

公會晉侯宋公衛侯鄭伯曹伯莒子邾子薛伯杞伯小邾子于溴梁戊寅大夫盟

晉平卽位踰月速葬改服而烝汲汲以合諸侯不可謂無志者惜其不能杜漸防微而遂使諸侯失政大夫不臣也溴梁之會齊有異志使大夫盟高厚蓋欲法雞澤之盟袁僑悼不屈己僑不抗尊也不知雞澤之役悼旣與王臣列侯盟矣使當日僑不如會豈容大夫復盟今高厚旣逃大夫不得及以盟則惟晉平與在會之諸侯盟焉可也卽不盟而畢會而散焉亦可也顧旣懲不協之情爲同討之誓而令不自己出不與諸侯要言而惟大夫是任其與雞澤所稱諸侯之大夫者名實不大相差謬耶平之昏庸不足嗣乃父之業徵于此矣

公會晉侯宋公衛侯鄭伯曹伯莒子邾子滕子薛伯杞伯小邾子同圍齊

邾莒之侵魯助齊也齊之屢伐魯嘗晉也齊自柯陵以後衆會齊盟君不自出而或遣世子或使大夫其不下晉而欲與之爭霸晉非不知之也特以攘楚服鄭晉方勤于三駕未暇及齊今承悼公之威正欲討高厚之叛而齊復以凌暴宗國啓釁諸侯此圍齊之師所由聚也顧圍晉而同非徒以齊環之惡衆所同仇亦以邾莒滕薛素屬于齊恐其陽從晉令陰黨齊謀故尋溴梁之盟同討不庭之言以沮其攜貳之志晉於此有懼心焉觀于圍齊之諸侯未退而鄭子孔已召楚師侵及純門則當日之欲伺其隙而起者衆

矣

衛孫林父帥師伐齊

林父怨衍之在齊而必欲窮其所往也則假伐暴之辭以請于晉而挾霸主之令以威于齊傳曰晉樂飭帥師從孫文子伐齊從之者飭則主之者林父矣重邱人詢之爲厲允矣

晉士匄帥師侵齊至穀聞齊侯卒乃還

齊桓在殯而宋襄伐之衛速鄭費未葬而楚人伐之列國行師之不仁甚矣獨士匄明于古不伐喪之禮于向之會能數吳之不德以退吳人其於仇讐之楚且然況于齊乎侵齊至穀聞喪乃還朱子謂春秋分明與之者是也觀于祝柯之盟齊不行成至士匄不伐其喪而齊光乃出會于澶淵則秉禮之師所以感入子之心而生其仁孝者豈微哉何忍如穀梁之刻而論之

蔡公子屢出奔楚

陳黃爲二慶所譖而奔楚以自理宜也若公子變欲以蔡之晉而蔡人殺之則變實蒙叛楚之聲其弟屢亦無由以自解非若黃之見懇僅有虛辭無實跡者而奔楚不適投于阱乎然以陳蔡之密邇仇讐等子縣鄙不出奔則禍恐難免于己而奔中夏則禍且將及于國家固不如投楚以自歸于司敗尚幸楚之原其誠而不以兄弟罪相及也論者每責屢而原變然變之謀國固非不正而不量力度勢適足自戕其身而累及其弟矣

邾庶其以漆閭邱來奔。何以名小國之大夫。不名其人。無以知爲誰之邑也。邑君之邑。據邑以奔叛也。何以不諱魯之納叛。諱魯納叛。無以著季氏之惡也。昔宣公嗣位。莒僕以寶玉來。而行父逐之。所以昭君之過以竊名也。今襄公如晉。邾庶其以漆閭邱來。而宿受之所以彰己之權。以專利也。竊名者。卽竊民之由。專利者。乃專國之實。父子濟惡。行父以陰。宿以顯耳。傳載臧紇之言。蓋明以宿爲盜魁矣。

晉欒盈復入于晉。入于曲沃。

欒盈不得曲沃之甲。則無以難晉。其入也。特先歸于私邑。聚其死黨。而後侵絳以攻公。勢所必然。故公羊以爲由乎。曲沃而入也。顧經先書入晉者。以其志在入晉。而欲與國爲仇也。後書入曲沃者。以其衆旣退奔。而藉曲沃爲固也。使先書曲沃而後書入晉。則固得其帥衆入攻之次第。而於未入之先。欲覆國以作亂。旣敗之餘。猶欲退守而進戰者。其惡不可見矣。觀晉人之圍盈。歷夏及冬。而後能克之。則曲沃久非晉之曲沃。故于晉書復入。而於曲沃第云入也。

齊侯伐衛。遂伐晉。

齊欲伐晉以救盈。而先伐衛者。蓋欲托衛爲名。使晉不設備。而移師以乘之也。故曰遂也。顧不令之臣。天下同惡。伐盟主。而黨逆臣。不幾自導其臣以逆乎。崔杼伺其後矣。

叔孫豹帥師救晉。次于雍榆。

晉豹帥師將尊師衆也。晉雖值曲沃之難，猶能出邯鄲之師，使豹與趙勝相爲犄角，同心死敵，即不勝齊，而救盟主之大義，亦足昭于天下矣。顧乃怠棄君命，觀望不前，以視僖公之救齊而不書，次者相去遠矣。

諸侯同盟于重邱

前年夷儀之會，會而不盟。而此書同盟者，以崔杼請成而盟諸侯，以定齊景之位也。蓋自朝歌之役，齊與楚通，使必擯而不與。恐齊之從楚，遂固而晉之服齊爲難。故因其弑君以說，而遂釋怨修好以同外楚。晉計固然，然自有此盟，而大國之討，皆得以君償亂賊之誅，皆得以賂免。天下尚何賴有盟主焉？悼公之業，掃地矣。

衛侯入于夷儀

鄭伯突之入樸也，名衛侯之入夷儀也。不名衎，所以誅剽也。衛侯在外十餘年矣，何以能入？考傳則晉平使魏舒逆之，又使衛與之夷儀也。甚矣晉平之悖也。將以衎宜爲君耶？則合諸侯以納之，使剽退而爲臣可也。以衎不宜爲君耶？則聽其息肩于齊，終爲寓公可也。顧乃逆之至衛，分之以邑，封域之內，遂有兩君。其附衍者將請殺剽，而附剽者必不安衎。孫甯之禍，非平爲之乎？夫平之納衎正也，惜其納之而未思所以定之也。終於重邱同盟之後，書衛侯入夷儀，於衎無譏，而於平則不能無咎矣。

衛甯喜弑其君剽

剽之得國篡也，篡而殺之，宜不得爲弑君者。然剽由孫甯以立，而殖與喜世臣事之，則剽之不順，固不足

爲國人之君而不得謂非甯氏之君也。書曰其君喜之罪不可逃矣。及衛衎殺喜而不以有罪之辭書之何也。喜納衎者也。與衎爲一體。衎之不得殺喜。猶喜之不得弑剽也。經於衛之君臣權衡審矣。

叔孫豹會晉趙武楚屈建蔡公孫歸生衛石惡陳孔奂鄭良霄許人曹人于宋

此南北分霸之始。事成于向戌。而戌不列會。說者謂宋公涖之也。使果宋公涖之。則必如十六年伐許之役。先書叔老會鄭伯。而後序列國大夫。豈肯沒宋公而使大夫自主會盟乎。其不列向戌者。旣會于宋。盟于宋。則戌自無不與之理。亦猶僖公十九年盟于齊。不列齊人。而齊人自在。二十七年盟于宋。不列宋公。而宋公自在也。獨是桓文之霸功在攘楚。今向戌借弭兵之名。而驅列國之諸侯。以交見于楚廷。不亦僨乎。自是而會中滅賴。以篡弑之楚靈。居然爲諸夏之盟主。而莫敢遠焉者。先儒多以首禍罪宋。然非晉平之昏庸。趙武之偷惰。亦何至爲宋人所愚。傳載晉楚爭盟。書先晉而實先楚。則楚之挾其詐力。以玩弄乎晉也。亦有以窺其深矣。

豹及諸侯之大夫盟于宋

會無諸侯。而曰諸侯之大夫者。明乎大夫之必有所統也。難澤書諸侯之大夫。君臣之統明。而大夫不敢擅也。溴梁之弟書大夫。君臣之統散。而諸侯猶自存也。此則諸侯不如會。而大夫相與盟。幾乎無統矣。無統而稱其統。以臨之。亦易嫌于無陽之義耳。盟再書宋。同地而異時也。豹不書族一事。而卒名也。以是爲褒貶。則舛矣。

公在楚

昭公孫而在外故於歲首書在乾侯以存公至于襄之在楚不過與往年冬如晉春至自晉等耳而經獨書所在者蓋以諸夏之君旅見于楚而爲楚所制使之久羈而不得歸所以著宋之盟之爲禍于諸侯罪晉平也且三始之正嘉禮所重公既在楚則朝正視朔宿必越而代之矣荀躤謂意如曰君怒未息子姑歸祭則季氏之入廟主鬯衆習爲常當自此年之正月始也故春秋特誅其無君之心而謹誌之

仲孫翬會晉荀盈齊高止宋華定衛世叔儀鄭公孫段曹人莒人滕人薛人小邾人城杞

昔齊桓嘗城緣陵以遷杞而諸侯勞而不怨者以其時淮夷方病杞也今杞何病而晉合十國之大夫以城之役之不以其義動之又不以其時是徒恤其親之私而不念其鄰之困此諸侯所以懷貳而伯業由是驗也使杞之力果不足以自存則保小弱恤災患固晉平之職也豈得以其爲夏肄而棄之

吳子使札來聘

吳不舉號而稱子史進之也蓋吳之益大能埒楚秦故於其來聘而書之亦與楚子使叔秦伯使術等彼術得稱君子足矣逆如越叔賢如季札一例書名則第記三國之通使于魯而於承使之人固無論其美惡也胡傳謂札不書公子以其讓國生亂而貶之顧札讓在魯昭之時於此日來聘何與且卽讓國論之札非不知有父兄之命也顧夷昧死僚何敢以庶長而卽之僚旣立光何忍以人臣而刺之其貪戾不仁札知之深矣使因其僞讓而受之札卽不及身以亂能保其後之終無殺奪乎固不如退老延陵以自附

于叔齊之義此正札之賢春秋所貴而何貶焉胡傳又謂叔孫之不書族皆史所略而惟札爲貶是貶讓而獎爭也況史於三人本無異文夫子仍而不革又何從曲探其心而生異議哉

鄭人殺良霄

良霄之入鄭與樂毅之入晉其惡一也顧盈不書自齊而霄書自許者何也盈入而齊師起則齊人助之可知但盈有曲沃之甲不專恃齊而霄荒淫嗜酒孤特無從彼見許鄭接壤世爲仇讐正可借力以伐其國雖許本寡弱不敢助亂而其出奔許入自許霄固有成謀矣故經以討賊之辭書之然不曰鄭殺而曰鄭人殺則政刑不出自君而士匄公孫黑之惡亦具見矣

晉人齊人宋人衛人鄭人曹人滕人薛人杞人小邾人會于澶淵宋災故

會未有書故者而澶淵之爲宋災不書其故則恐讀者之疑于討蔡也蔡般弑君賊未討而書葬晉實成之蓋自厥貉以來蔡久從楚楚師不動晉未敢問其罪也是當時楚昭旣卒國權在圍圍方欲行大事不令其君得握兵柄而召諸侯使晉平能乘其機合十二國之大夫連師討蔡則義聲所布亦足奪楚圍之心而振晉悼之業顧乃深居簡出置若罔聞遂使圍於篡弑之後得借討賊之名以滅其國而戕其君楚之虐晉之偷也書曰宋災故而諸大夫之務于細而忘其大罪狀昭然豈待稱人以貶之哉方氏曰爲宋故會者非廟胡傳以稱人爲貶誤矣

子野卒

子般之弑慶父欲自篡也。子赤之弑仲遂佐宣篡也。當襄公時宿之勢未可自篡而昭公之立穆叔決其爲季氏憂則固非宿之所佐以篡者而謂子野爲宿所弑似非情理之宜然子卒而不地書法與般亦同而傳又云次于季氏而卒則不能不生後儒之疑矣。

叔孫豹會晉趙武楚公子圍齊國弱宋向戌衛齊惡陳公子招蔡公孫歸生鄭罕虎許人曹人于虢

昭公

虢之會楚又先晉晉之恥也傳載趙武之言將信爲本乃強爲之辭以諱其恥春秋豈果貴武之信而書先晉乎其先晉于楚者魯史舊文而夫子因之則所以嚴華夷之等耳說者謂蜀之盟申之會皆直書楚人爲主何獨於此易之不知齊桓而後所藉以攘楚而尊周者惟晉耳蜀與申晉皆不在固不嫌以楚爲先晉在而先楚焉則天下不知有晉又安知有周故宋虢二會之先晉者魯史以爲貴信仲尼以爲卑夷所爲文則史而義則竊取者於此見之。

取鄆

取鄆而不書伐莒何也以鄆木爲魯之附庸取其舊壤非如伐宋取防伐邾取繹而春秋必書之者惡季氏也自文十二年行父帥師城鄆襄十二年宿復帥師入鄆則以鄆之近于費季氏欲據其土以自封殖爲日久矣既因叔仲之誨而城費卽乘莒人之亂而取鄆其張私家而弱公室罪不容誅矣觀昭公孫齊而藉齊侯之力始得取鄆而居之則季氏之市恩于鄆而使之爲己堅守也其術蓋深

莒去疾自齊入于莒。莒展輿出奔吳。

去疾繫莒錄其終也。展輿繫莒錄其始也。莒爲展輿之莒。去疾焉得爭之。然藉齊爲援。則得國不難。自始入時。莒卽爲其莒矣。展輿逼于強齊。自內出奔。雖終身不復。而承國爲正。不得謂莒非其莒也。然君弑而賊不討。遂使去疾得所藉口。以肆其攘奪之心。經並以名繫國。蓋兩罪之。

公如晉至河乃復季孫宿如晉

此昭公喪服既終。而如晉以朝盟主。豈特弔少姜哉。先儒以輕舉召悔責之過矣。使晉以少姜之非嫡辭。而魯以文襄之舊制對。何至却公不納。其却公不納者。必晉之強臣。素黨季氏。謂與其君見不如與其臣見。斯交魯愈固。而事晉愈恭也。故特却公納宿。而宿卽藉此以脅制其君。專擅其政。蓋晉人下比之私。卽季氏逐君之漸矣。

楚子蔡侯陳侯鄭伯許男徐子滕子頓子胡子小邾子宋世子佐淮夷會于申

申之會。楚遂專主諸侯也。考傳所載。鄭以往朝而止。許以從田而留。宋公不行。世子後至。魯衛曹邾皆託辭不會。則楚雖以詐力取諸侯。而篡弑之惡。固天下所痛憤。使晉平因諸侯之心。會師以問其罪。未始非霸業再振之一機也。惜乎其君少安。大夫多求。不在諸侯。遂使楚靈得逞其狂悖也。胡傳以淮夷不殊會。爲春秋狄在會之諸侯。無論淮夷來會事與鍾離往會不同。而苟可執淮夷以例諸侯。則罪有所歸。彼晉平將遂得辭其咎乎哉。

執齊慶封殺之

經於襄之二十八年書慶封來奔譏魯之納亂也今以楚伐吳執慶封而殺之則知自魯奔吳其心固謂魯不足以拒齊而惟吳爲能庇已所以避禍謀亦深矣孰知得罪於齊假手於楚天於黨惡助逆之人不使漏網如此雖楚虔以亂治亂未得附討賊之義而苟削而不書則讀者第知慶封之奔魯而未見其聚族而殲也豈足以懲淫人

取鄆

元年取鄆今取鄆皆取諸莒也傳云莒亂著邱公不撫鄆鄆叛而來則非魯之取之也而經書曰取蓋以鄆素屬魯方藉魯以圖存而遽貪其利不爲之反地置君豈先公保寡小之義乎魯之惡與莒等矣卽此而知莒之滅鄆謂爲立異姓以瀆祭祀者其鑿實甚

舍中軍

魯本二軍皆屬於公三家各有其食采之私乘而已季氏明知國大賦重霸政難堪亦何利有三軍特其心欲奪公家之稅以入私門而不能一朝遽攫之故假大國三軍之名以改舊制定國政而姑以中軍歸公其作之也蓋預爲舍之地也叔孫知其隱而要之以盟詛臨之以神民故能久而不變要其耽耽虎視未嘗一刻忘也今叔孫卒于冬中軍舍于春四分公室而擇其二旣不使公得撫其民亦不使孟叔得敵于己然後逞其悖亂惟所欲爲而莫之禁陽州之遜其禍已成于此然卒不能爲齊之陳氏何也則其專

務封殖。蔑視同僚。宿與意如久爲怨府。家臣之効尤者。伺其後矣。

公如楚

五年公如晉。以始之不納而再朝也。七年公如楚。以靈之既立而始朝也。蓋從宋號之盟。一時兩霸。既如晉。即不得不如楚。禍由平也。弟以公辭。申不會與吳爲婚。楚人怨之。將有加罪于魯者。而季氏素結晉援。敢于如晉。不敢于如楚。故聘使叔弓。相使孟孫。而宿托爲守國。避禍深居。徒令公于三年之間。南北奔馳。皆歷三時。而後得反國。君道長而大夫不出門。惜楚人無能以此詰之。

陳侯之弟招殺陳世子偃師

世子君之貳也。以君之弟而殺之。殺之者罪在招。而任招以殺之者罪在陳侯。骨肉而忍戕虐。宗社遂致淪亡。春秋書之所以誌陳滅之由也。顧晉獻殺申生。宋平殺痤。而國幸存。何也。彼二君者。惡皆自己。權不歸人。而陳哀本無殺子之心。且致殞身之禍。則固無能自立者。況陳逼于楚虔之貪虐。日睨于旁。今幸其變生倫紀。而以討賊爲名。陳欲不亡。得乎。

楚人執陳行人干徵師殺之

行人何罪。執而殺之。書曰。楚人惡之也。蓋楚實貪陳而利其亂。故誣徵師爲招之黨。而加之以顯戮。所以讐陳以先聲也。自是而留出奔。招且殺過。皆迫于楚之詐威。而無能効死以守國矣。

陳公子留出奔鄭

徵師赴楚告有立君而出奔不稱陳留稱公子何也蓋招殺偃師以立留在陳侯未卒之先弟立爲世子未爲君也及溺既卒留將嗣位而猶俟楚命其告辭亦應稱世子留耳而春秋不與招之立之則曰此亦陳之諸公子云

陳人殺其大夫公子過

此公子招殺之以求解免于楚也經不曰招而曰陳人著過之本爲招黨而殺嫡立庶宜爲國人所討也顧不去其大夫何也稱其官蓋較之稱爲弟者其罪稍減焉耳所以甚招之惡也

楚師滅陳執陳公子招放之于越殺陳孔免

先書滅而後書執書殺是其意主于滅陳也主于滅陳則以重兵臨之必欲克其國都夷于屬縣而後已故不曰楚人而曰楚師也殺偃師者招也孔免之罪不著于經傳卽謂黨招亦有輕重今於重者則僅放之於輕者則竟殺之卽其用刑之頗愈顯其貪利之隱蓋楚虔方幸招之造亂得藉口爲兵端則陽怒招而陰德之遂以招之罪盡委諸免經於孔免去其大夫而於招稱爲公子所以探楚虔之志以誅之也

葬陳哀公

陳已滅矣誰爲葬哀公者傳云袁克葬之顧克與嬖耳何能葬君據傳棄疾帥師奉孫吳以滅陳旣以吳誘陳而取其國卽使吳備葬以收其心經書葬陳哀公以吳主之也觀蔡般之殺于申楚豈不爲殮而葬之然必遲之三年蔡廬歸國後書葬則袁克之請私未足書也其爲楚虔之命吳必矣

陳災

陳既降爲楚縣而書陳災者杜註災繫于所災故以所在爲名孔疏謂傳無存陳之義故杜以公穀爲非然傳述禪竈之言逐楚建陳則固以楚之縣陳其事爲不順于天也書陳以存亡國春秋亦非無意于此矣

楚子虔誘蔡侯般殺之于申

蔡般弑父自立與楚虔弑君其惡一也般固宜討而虔非討般之人況虔合諸侯于申會列國伐吳般皆與焉名列于會雖負大恩例置不誅故般不疑楚召之而來饗之而醉虔乃乘其不意而執殺之是以甘言重幣驅而納諸陷阱之中倘稍有人心豈忍出此故春秋不曰討而曰誘也考諸侯不生名般殺于申固宜名之而斥般必兼斥虔者皆待以死而名之例也若曰如楚虔者豈宜一日在人世乎其心之亡久矣

季孫意如會晉韓起齊國弱宋華亥衛北宮佗鄭罕虎曹人杞人于厥慤

甚矣晉之不競也宋號之會名曰弭兵而楚之肆暴愈甚陳既速亡晉不及救今楚頓兵于蔡自夏歷秋三月矣蔡人效死以俟諸侯之援使晉合八國之大夫奮厲直前以責楚虔背棄齊盟凌虐弱小之罪則蔡有堅守于中而列國合擊其外楚雖恃其詐力未必不屈于諸大夫之義勇震駭而逃顧乃觀望徘徊遣使請楚則楚心知晉之不能而滅蔡之謀愈肆然而無忌矣故澶淵之會譏蔡之宜討而不討厥慤之

會議蔡之宜救而不救皆惡晉也。

楚子滅蔡執蔡世子有以歸用之

楚旣誘殺蔡般圍之八月而後克之則楚固志存于滅蔡而蔡之不屈于楚亦可見矣使蔡有不念戴天之痛而存偷生之心則執而臣服于楚未必不與陳吳同列何至用之岡山吾於楚之酷而徵有之孝也案國君之禮旣葬稱子未葬稱子某般之喪未歸而有獨稱世子則以能世其祖父之業而國存與存國亡與亡雖虐用其身於心固無悔也吾於有之孝而愈惡楚之酷矣

公如晉至河乃復

公如晉朝嗣君也晉以取鄭之役却公不納夫取鄭者季孫也晉之黨季孫者必爲之歸咎于公恐公見晉侯自伸其辭故於其至河而先拒之穀梁所謂季孫氏不使遂乎晉者是也顧平邱之會晉何以執意如則公不自伸而從公如晉之公子慤代訴之也慤本與南蒯謀去季氏固有志于扶公室者及還自晉畏意如而出奔公之勢愈孤矣

叔弓帥師圍費

費季邑也而叔弓帥師圍之若強敵然則季自南遺城費叔仲助役所以私營其狡兔之窟者亦已固矣孰知魯以費賜季友而季氏藉以凌其君季以費厚南遺而南氏卽藉以謀其主季肆逆于前南效尤于後而且遺之以口實曰吾尊公室故春秋不書蒯之爲叛第書費之見圍所以治季氏也

楚公子比自晉歸于楚弑其君虔于乾谿

公子比歸而楚虔縊則比不歸而棄疾雖有弑君之心固不敢躬爲戎首矣方虔弑鄭敖比爲右尹懼禍出奔其惡虔而欲殺之固其宿志今有四族之徒起于中陳蔡之仇乘于外正可因其潰叛之勢以舒其忿疾之心故一聞觀從之召倉卒以來而棄疾遂因之以殺太子吹散其師虔聞比歸疑獲晉助而不得不自縊于申亥氏矣是棄疾得濟其謀實由比爲禍首予之惡名其能辭乎或曰書歸而不書入明比之非弑然經旣書弑矣安見歸之愈于入哉

楚公子棄疾殺公子比

棄疾殺比意謂討賊而經以兩下相殺之辭書之何也蓋楚虔無道比與棄疾皆欲弑之觀從之召比未必非棄疾之謀但專罪棄疾則比之自外而歸驟居其位者其意欲何爲乎故弑君必書比也顧比雖有罪而或書楚人殺比則棄疾之召比盟鄧乘亂入楚始以君國之利誘之繼假討賊之名誅之者其惡不幾隱乎故殺比必目棄疾也其不稱比爲君而稱公子者比未成乎爲君春秋固甚惡棄疾之詐而亦不欲加之以惡名矣

公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平邱八月甲戌同盟
于平邱

既死。衆會平邱。欲何爲乎。使昭能用示威之師。以問棄疾之罪。未始不可以服楚而收諸侯。顧未聞有討賊之令。而徒上盟王人。輕棄宗國。措置乖方。人心能無貳乎。書曰同盟不同者多矣。再書平邱。非第踰月之故。亦見晉之會其地。盟其地。而不敢進逼乎楚云。

公不與盟晉人執季孫意如以歸

沙隨執行父而不見公。平邱執意如而不盟公。皆以人之訴其臣而辱其君。是君爲臣受罰。不亦慎乎。以季孫之竊國分民。誠宜見討于盟主。而經書晉人以譏其非霸討。則執之不當其罪。尚不足服意如而不盟。又何足以耻公哉。故經不爲魯諱者。所以著晉政之頗無以治季。而魯卿之弱公強私。亦習實爲常。而無所懲矣。

蔡侯廬歸于蔡陳吳歸于陳

歸者易辭也。陳蔡夷爲楚縣。其存亡之權。實操自楚。歸亦何易。而春秋以國繫爵。以爵繫名。若二君之自歸。而於楚無與焉。則聖人存先王之封國。而所以擅絕強楚者。亦深矣。

公如晉至河乃復

季氏之惡公。心銜之久矣。今幸爲晉所執。正可假手除奸。而公顧朝晉以請之者。蓋知晉人之庇季氏。必將復歸。恐君臣之猜跡以露。則悖亂之陰謀益深。其禍將不有可言者。故寧忍其詢而屈已。以如晉也。乃荀吳輩。猶恐公之得見晉侯。或訴其專制魯國之罪。討而戮之。故托辭以卻公于河。公旣卻而意如隨以

至矣。

莒殺其公子意恢

不曰大夫而曰公子。公子而爲大夫也。以其親名之也。殺其君之親臣。則君自不安于其位。郊公所以奔齊也。及其後庚輿來奔。而齊爲納郊公。則郊公固非國人所弗順者。而庚輿與其黨誣而逐之耳。第去疾屬郊公于意恢。知意恢之賢。而不能彌庚輿之亂。則稱國以殺去疾。執其咎矣。

公如晉

此公爲晉釋季氏。而躬朝以謝罪也。晉人承季氏之意。止公而困辱之。歷冬及夏。涉三時而後返。而晉昭莫之間也。蓋強臣之私相結納。以欺凌其君。而惟所欲爲。其罪可勝誅乎。子服回曰。晉之公室。將卑君幼弱。六卿強而奢傲。蓋陰以刺意如也。

齊侯伐徐

徐、楚之與國也。而齊伐之。非敢與楚爲難。蓋知楚承大亂之後。乘疾新立。方南憂吳。未暇爭徐。故遂興師及遠。以竊爲蒲隧之盟。此亦如齊光之伐晉。臧孫所謂抑君似鼠者也。豈足以有爲哉。使齊景果能有爲。則乘晉霸旣衰之時。修桓公之德禮。明管子之政刑。而後糾合諸侯。以明禁而伸威。以齊之強。寧不可與晉代興乎。不此之謀。而汲汲于伐徐。盟莒也。何爲。

許世子止弑其君買

趙盾弑君許止弑父歐陽氏皆據經以滅傳謂實弑其君父者非也盾有弑之心無弑之跡者也止有弑之跡無弑之心者也誅盾之心則後世有假手于人以肆其逆者無可逃也誅止之跡則後世有細微不謹以危其親者大可懼也究之心甚于跡故晉靈不書葬而許悼書葬春秋所以立萬世臣子之防者法嚴而情恕矣

曹公孫會自鄭出奔宋

奔未有言所自者此曰自鄭出奔故穀梁以爲專乎鄭也果專乎鄭則雖無叛君之跡已有據邑之私矣會子臧之後也當子臧返國盡致其邑與卿而不出則鄭之爲采與否正未可知傳無明文而杜註第云曹邑趙氏鵬飛以爲曹境上邑會旣得罪于君則出國都而居邊境以待環玦之賜決去留耳何專之有春秋錄之所以示臣人去國之禮以正當時之據邑以要君者

盜殺衛侯之兄摯

不得其人而名之故曰盜傳云齊豹殺摯則得其人矣不應泛書爲盜卽謂微賤之名不登于史冊則書尉止爲盜宜矣豹卿也說者謂奪之司寇則非卿顧奪之者摯非衛侯褫其職也安可謂非卿考傳所載豹所欲殺者摯耳而衛侯何爲而出奔齊氏何爲而射公使非華寅南楚靈幾不免則是豹直欲弑君也而當亂作之時姦宄竊發適會不知誰何之人賊摯于蓋獲之門外而傳遂并屬之齊氏耳由是推之尉止所欲殺者駢也子國子耳非與止有宿怨者何爲連而及之當其時公子嘉實與三卿爭政西宮之難

知而不言安知非嘉之詭謀陰使其人殺之而蔽獄于尉止乎更推之蔡侯申始而背楚既而誑吳及吳師襲之而後流離播遷死于道路殺申者恐并非蔡人也衆見翶之率先從君遂謂逐而射之而凡爲公孫者或奔或殺則終疑于罪之無所歸矣然則尉止也齊豹也公孫翶也皆非眞盜安得不泛書之爲盜乎惟陽虎陪臣名氏不宜見經而竊寶玉大弓又非弑君殺大夫之例窮于辭而書之曰盜以著國之失其政刑焉耳

蔡侯朱出奔楚

蔡侯朱之出奔東國逐之也東國以貨餌費無極讒而出之則楚於朱既殺其祖又奪其嫡固世仇也而朱乃奔楚安知棄疾不復信無極之讒而殺之乎顧寧歸死于楚而不敢遠適他國則蔡之受制于楚如拘囚矣

公如晉至河乃復

晉頃嗣位五年而公不朝士鞅來聘蓋徵之也公是以如晉而晉復托鮮虞以辭公則士鞅怒其卑已而將洩其忿于叔孫矣甚矣季氏之惡旣脅制其君又欲困辱諸臣使上下皆懾于己之威權而後肆行其異志也

劉子單子以王猛居于皇

喪未踰年而稱王繁猛者春秋之特筆也蓋自王子並爭干戈相向輔猛者惟有劉單而子朝之黨甚衆

良由嫡庶未明。羣臣皆惑于景王之寵命。未知宜立者之果何在也。朝居成周。實據勝勢。猛之微弱。力不能爭。使劉單避臣人以君之嫌。則將任朝以殺猛矣。誰與之居于皇。入于王城。及猛卒而勾嗣卒能出死。方以定多難。寧王室哉。昔惠王寵帶齊桓。會諸侯以定世子。襄出居鄭。晉文辭秦師以納天王。今頃爲方伯。而圍郊之師。黃父之會。皆以大夫主之。而不親行。以此見當時之不明于大義。而劉單之忠貞爲不可及也。觀春秋之書。王猛卽知聖心之與劉單。豈得執以之爲言。而以劉單之以猛等諸尹召之以朝哉。

吳敗頓胡沈蔡陳許之師于雞父。胡子髡沈子逞滅獲陳夏齧。

此聖人之惡楚。而憫六國之君與大夫也。頓胡沈蔡陳許。非敢構怨于吳。而素受制于楚。楚糾之以救州。來能不從乎。帥死師燔。楚已無鬪心矣。率六國而去之可也。顧猶強之使戰。是滅胡沈之君獲陳大夫者。吳之詐。而驅之以畀吳者。楚之殘也。經不書楚而書雞父。雞父楚地也。則知楚實爲戎首矣。小國之逼近于大國也。哀哉。而先儒多責六國之從楚過矣。

天王居于狄泉。尹氏立王子朝。

猛卒而勾立。經不書立勾者。勾不待劉單立之也。尹氏奉朝以據成周。歷有二年。固自以爲王矣。茲見猛不永年。勾復出避。以爲天實助朝。故遂明正其位。以聳動天下之人心。聖人黜其挾私以亂國也。若曰居狄泉者。則天王也。尹氏之立朝何爲。

公如晉至河有疾乃復

晉以意如之惡叔孫執而困之者踰年公如晉以請之而懼復爲所止也故托疾而返然則公未至晉晉何以釋叔孫蓋實不能加以顯戮則拘之無益雖明知公非真疾固不如因其辭而歸之矣

公孫于齊次于陽州

內諱奔書孫不曰季氏逐君而以自孫爲文咎在公也然考公所爲非有不道于其民者第祿去政遠自行父始專國柄加以宿與意如之奸雄已成田氏篡齊三卿分晉之勢自非有不世之英略固難挽已去之威權矣昔襄公在楚季氏取卞公懼而不敢歸非榮成伯爲賦式微襄早客死于外豈待昭乎論者每咎公以不用子家之言然子家始告之以止繼勸之以歸亦祇爲隱忍偷生之計何嘗有所挫損于季氏哉觀公之告子家曰季氏無道吾欲弑之臣而言弑意如之罪上通于天矣

齊侯唁公于野井

公不之晉而之齊固有鑑于晉之黨季然晉爲方伯列國有以臣逐君者責有所歸公誠求援于晉晉卽惡公豈肯坐失其霸權乎迨齊不能援而後告晉則晉有所藉口以辭之矣公見齊景之伐除伐莒若強大可託庇者不知其庸懦無能正與公等使能爲公討季氏何不能爲齊先討陳氏乎野井之遇亦以公之次陽州以待命不得已而脩弔唁之虛文耳其於同惡相恤之簡書豈誠有所畏也哉

齊侯取鄆

取鄆而齊舉爵非褒也言景親之耳闡成則謾諸公矣蓋齊不得鄆則公無所歸倘如齊而責千社之言

將何以謝之。故一舉鄆而景遂無餘事焉。雖以齊之兵力取成非難而君不親行則士無鬪志。景之以師從公而坐聽其成敗其無納公之意明矣。

公會齊侯莒子邾子杞伯盟于鄣陵

齊往年爲蒲隧之盟。今又爲鄣陵之盟。皆有志于爭霸也。以晉頃之偷懦少安。尹氏之亂周久而未定。季孫之亂魯置若罔聞。嫡庶之混淆。冠履之倒置。事莫有急于此者。使齊景仲大義于天下。整飭兵戎。號召與國。定天王于成周。納昭公于宗魯。列尹氏季孫之罪狀。執而戮之。繼桓之業在于是矣。乃寧周既無遠略。而帥敵賦以從魯。區區攻一成而不能舉。則合三小國以要盟。復何益哉。況既盟以後。并未聞有匹馬隻輪及于魯郊。則景之慕虛名而無成事也。公失所主矣。

天王入于成周

天王居于狄泉。越四年而後入于成周。固由晉人納之。而當晉未克翬之先。敬王子朝之師造勝迭負。使非單劉同心戮力。則成周之不并于朝者幾希。今經以自入爲文。見東都本天王之土。雖劉單不得居其成功。況晉人之緩于勤王者哉。其不曰京師而曰成周者。京師統名成周。據所都言之。無他義也。

尹氏召伯毛伯以王子朝奔楚

據傳晉師克翬。召伯盈逐王子朝。則其黨先自攜矣。朝安得不奔哉。而書奔必書以之者。所謂春秋誅亂賊。而尤嚴亂賊之黨是也。乃召伯毛伯以行次書。而尹氏以族舉。則知其世執周政。而逢景王之邪心。以

助亂者尤衆也。故前之立朝惟書晉氏，而此之挾朝以奔楚者亦必以首惡歸之。

晉士鞅宋樂祈犁衛北宮喜曹人邾人滕人會于扈

扈之會，諸國同役而不同心。蓋其時主戍周者晉也，主納公者宋衛也。公之出奔求援于齊，并不告難于晉。晉方怒公之尊齊而卑己也，亦何樂乎納之。獨宋衛之君屢困于叛臣，故心惡季氏所爲，而欲援公于危亡之際。若王室蠹蠹，則固謾爲大國之憂矣。觀城周之役，宋不受功，則晉之威令不行，而天下將不復宗之也。預於此會徵之。

公如晉次于乾侯

公自失國居鄆之後，會齊者一如齊者再。必待齊之卑公而後如晉，亦已晚矣。次者止而不進之意。晉頃戶位權在六卿，彼方與季氏同惡相濟，而肯使公得見頃乎？亦聽其寄食于乾侯已耳。

鄆潰

鄆之隸于季氏固矣，非借齊之兵威，公詎得取？特齊以鄆居公，而鄆人懼其得罪于季氏也。又見公之如晉，踰三時而不返，恐季氏來討而無以禦之，故潰而歸于齊耳。觀定公六年斯與何忌帥師圍鄆，十年齊來歸鄆，則鄆非叛公，實叛季氏也。論者歸咎于公，以爲虐用其民，民實不堪，則公之往來居鄆于今四年矣。何待在乾侯而後潰也哉。

季孫意如會晉荀躤于適歷

季氏負出君之大罪而敢如適歷以會荀蹠者蓋知霸政之在家晉雖欲爲公討季而荀范固足以制之也旣會而敢從荀蹠以如乾侯者蓋知子家之不用公雖欲從季歸魯而羣小必有以泥之也此皆季氏之奸不待鞅之保其無咎而爲意料所能及者使當日召而不至至矣而不逆公歸則必有以觸晉侯之怒而非誅則逐將在一言矣自有此會而練冠麻衣之狀請囚歸死之言若不勝其卑屈者晉侯不聽置其術中而遂使荀蹠以弔唁之虛禮謝公于乾侯也

公薨于乾侯

昭公淹恤在外居鄆者四年在乾侯者三年栖栖齊晉之間不得一蒙其援而卒以羈死春秋出奔之君未有如公之窮者亦可哀矣然自公伐季而季出公則釁端既成猜阻日甚使公果得返國則君臣必不能容而或爲意如所弑轉不如薨于乾侯者之尙無及出于背也公謂荀蹠曰將使歸而葬除宗祧則不能見夫人其亦慮及於此歟

元年春王定公

定之卽位在六月則是年春夏尙屬昭之末年耳自昭在乾侯每歲必書正月公存而存之也昭旣薨而定未立則正月將繫之誰乎聖人削而不書所以著定之非嗣位于昭也公衍公爲俱存而使國家之承正朔者虛無人焉季氏之罪可勝誅耶

晉人執宋仲幾于京師

歸于京師順也執于京師逆也會城成周而不受功仲幾誠有罪矣然不屬王吏而自執之是其心尙未知有天王況其君乎晉之替也固宜

六月癸亥公之喪至自乾侯戊辰公卽位

據傳喪及壞墮公子朱先入則立君固有成議矣乃喪之至魯在六月癸亥越五日戊辰而後卽位何其緩也蓋既立其所不當立者以市已之有德于公又緩其所不當緩者以要公之無遠于已皆季氏專國之謀也惜乎公之貪懦既不能如子臧之守節并不能如叔孫昭子之不勞徒使廢立大事一聽操縱于季孫於六月而書卽位者譏公之以位爲餌也

立煬宮

武公至成十世而宿立其宮煬公至昭二十世而意如立其宮謂也以季氏世專國政甚至出君而以爲祖實祐之彼將以其祖爲何等鬼乎亦越王制誣神靈實甚矣或曰煬公考公之弟以弟繼兄故立其宮以爲定之繼昭說也然以意如之威福自擅昭可由我逐卽定可由我立亦何懼于魯人之清議哉

雉門及兩觀災

天子五門諸侯三門雉門非僭而雉門之設兩觀則僭也爾雅觀謂之闕郭璞曰宮門雙闕蓋天子兩觀外闕諸侯臺門諸侯固不得有闕也子家子譏魯之僭禮亦言兩觀而不言雉門然則經書及者亦謂災雖起自雉門而天所惡而火之者尤在兩觀不然觀爲門之飾言門而觀在其中矣何必及之

新作雉門及兩觀

春秋書新作者二僖之南門及此雉門兩觀是也。天子諸侯嚮明而治則魯之三門皆可爲南。概言南門則僭天子之觀闕可知矣。其曰新作蓋前此所未有。而僖實創始之。自僖以來制度已定。理應無可增加。而亦曰新作者。則以災禍所延。一土一木皆化爲煨燼。而舊貫直無可仍耳。此亦見天之示變以警魯者爲深。而定之頑尤甚于僖之僭也。

公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召陵侵楚

晉自重邱以後深居簡出。雖以納敬王城成周之事。關王室。皆以大夫主之。而君不親行。操柄之失。有由來矣。晉定初立。非無志于諸侯也。乃欲爲魯討季。而士鞅阻之。爲蔡伐楚。而荀寅阻之。二子之讒貨無厭。豈有異于囊瓦之餓豺狼哉。故傳以召陵之會爲劉子合諸侯。言晉之不能也。然旣有天子之老元戎。乘以先啓行。而十八國中如陳蔡之世與楚仇。頓胡之不堪楚役。皆欲致死力于行間者。使晉定明聲其罪。仗義而前。則諸國爭奮安在召陵之師。不與齊桓比烈乎。乃諸臣若恐定之復收其威權。而不利于私家也。多方間阻。卒使其君有志而不得伸。經書曰侵。蓋憫晉之果不復振。而荀寅士吉射之叛。其端亦於此徵之。

公及諸侯盟于皋鼬

臯鼬之盟卽召陵之諸侯公固在其中矣而復書公者則以平邱之會昭不與盟故其後爲季所逐諸侯遂無執同盟之誼以納之者今公嗣位之初朝晉而不獲見與晉之拒昭略同故懼而汲汲爲此盟也殆亦隱憲苟范之黨意如恐復蹈昭之覆轍也夫

蔡侯以吳子及楚人戰于柏舉楚師敗績楚囊瓦出奔鄭

蔡以弱小之邦逼近強楚而借吳之力以敗其師不徒取快于目前而忘異日之禍乎顧柏舉之戰春秋予之誠以楚之于蔡旣誘殺般又虐用有出侯朱拘東國蔡昭怨毒盈心生不如死況蔡卽無此戰亦終亡于楚耳固不如戰而勝之猶得一報其祖父累世之仇此亦足教天下後世之爲人孫子者故特書曰蔡侯以之也吳稱子閭廬君也楚稱人囊瓦大夫也以吳之君而奔楚之大夫所謂有志者事竟成也晉之君臣聞之其亦不能無愧也已

吳入郢

入郢獨書吳則蔡不與俱入而吳之君臣乘勝以貪其利耳吳以號舉經之常也復從常稱則知柏舉之書爵特著蔡侯之能用其君而非有所進之也郢者國都以楚之強大一戰而克其國都則列國諸侯之畏吳將甚于畏楚矣

公侵鄭

鄭人敢伐周之六邑而魯奉霸令以討之固爲勤王之師矣然魯之政令久在三桓公無旅一之衆何能

伐人特以陽虎之奸欲奪私家之兵權以歸諸公而後借公之威令以逞其志故遂以公主兵而使季孟從之季孟知其欲啓釁于鄰封假手以圖己也故不敢聲鄭人之罪而第潛師掠境取匡以還書曰公侵鄭蓋著三春之受制于家臣而聽其挾公以謀亂也

齊侯鄭伯盟于鹹

鄭乘楚師之敗而滅許因魯翶之亂而伐周獻之所爲直與莊等春秋之始終皆鄭之罪也齊景果欲圖霸宜先伐鄭以寧王室之禍難保小弱之危亡則天下諸侯不召而自至矣顧乃挾叛晉之私而結鄭人之援與之特盟于鹹欲何爲乎自有此盟中國遂無殷會聖人謹而誌之亦猶詩錄下泉傷天下無霸之害也夫

齊國夏帥師我西鄙

齊旣與鄭盟于鹹又與衛盟于沙而魯未肯背晉卽齊也于是乎有西鄙之師顧不能綏之以德而欲脅之以威齊景之求諸侯也僥幸矣

公侵齊

公於三月之間兩出侵齊杜註報前年西鄙之伐也夫誠欲報齊一侵亦已足矣何爲師甫入而復出哉當是時陽虎爲政欲去三桓傾覆宗社故迫公出侵外以挑釁于齊內以亟役于魯使強鄰外攻民心內潰而後得肆其奸謀蓋不惟欲殺季氏而殃及乎難及君身矣觀其請師于齊曰三加必取之此其志昭

然可見故春秋兩書侵齊爲公危之也。

從祀先公

三傳皆謂順昭閔僖而胡傳則取馮氏之說。謂昭公始從祀于太廟也。顧昭雖爲季氏所惡而乾侯歸葬。經旣書君書謚與羣公同。則旣葬而虞卒哭班祔事固有以日舉者豈不連而及之哉。國之大事在祀定旣承統于昭其禮尚在月祭之例使入廟而先君之主不列昭穆羣臣縱不敢言定獨不愧于心乎。況意如死已四年定又何所懼而祀典久不舉行此必不然之事也。顧道南之墓何以必待孔子仕魯而後合之考左氏傳意如將溝公氏以諫而止則昭墓固與羣公離而未絕衆人不知其非惟孔子必求其正否則榮駕鵠宜復言之矣。豈若主不從祔其失禮爲顯而易見者乎。況從馮氏之說經宜書曰從祀昭公今概稱先公而不舉謚則自太祖以下莫不序而祭之禮所謂三年一祔也而不書大事于太廟者蓋略之以發疑使後人推循而知爲陽虎之贊神以祈佑也。

盜竊寶玉大弓

據傳陽虎謀去三桓將享季氏于蒲圃而殺之。刲公與武叔以伐孟氏既敗而後竊寶玉大弓以出。經不書叛而第謂之盜說者以經不爲大夫討賊也。顧大夫君之大夫叛大夫非卽叛君乎。魯之三桓竊國分民使其家臣得藉口于張公之說以陰售其謀亂之禮正其叛以誅之而三家之罪豈不益以著明乃卒不目其人者先儒所謂陽虎南蒯侯犯之叛以賤不書其說不可易也。顧寶玉大弓國之宗器虎得竊之。

則叛不待言而大夫之不能詰盜其罪亦難逭矣

及齊平

有以平齊爲魯叛晉者非也。魯自僖文以來屢世事晉。前年國夏伐我。晉人救之。師至于瓦而公出會。有何嫌隙而叛之哉。或謂陽虎在齊將謀害魯。顧虎之奸回不軌。齊人豈不聞之。而肯勤師以助亂乎。蓋其時孔子爲魯司空。與聞國政。將率天下以戢其干戈。而懷以德禮。使日與齊尋侵伐之怨。則魯且不可爲。又何以靖列國。卓氏爾康以平齊事晉爲聖人救時第一務者得之。

公會齊侯于夾谷

夾谷之會。齊欲結魯以攘晉。顧坦懷相與會而不盟。與于鹹于沙之盟。鄭衛異者。則聖人盛德之感信于明神矣。左氏見汶陽之田久入于齊。季孟帥師圍鄆。尙不能取。今不煩一兵。不費一矢。而齊自來歸意。其必有以要之者。故設爲載書之辭。茲無還之對耳。使當日果有其事。經何以不書盟乎。左氏又有萊兵劫盟之言。說者因謂是會也。三桓畏齊。故不自出。而以公主之。孔子相之。不知齊魯新平。釋怨脩好。景旣自來。何得以大夫往會。且以知禮之聖。而攝上卿以襄會議。用得其人。孟子所謂於季桓子見行可之仕。正兆于此。何至視爲危途。而使聖人佐公以試之。

及鄭平

此平侵鄭取匡之怨也。左氏以爲叛晉。不知晉弱之不振。春秋所傷。孔子用魯講信脩睦。平齊及鄭。蓋將

率列國以從晉使霸統有所歸耳周之東遷晉鄭是依從晉乃所以尊周何忍叛之且晉卽當頃定之衰諸侯解體而子朝之爭儋翩之亂齊置不問而晉寧之使從齊而背晉天下豈復知有共主哉然則茲之平也亦欲外靖干戈內脩政治以徐展其東周之志云爾

公園成

墮郿之師州仇主之墮費之師斯與何忌主之圍成而以公主兵何也圍成而出于公成之所以終不墮也郿有侯犯之叛費有南蒯不狃之叛兩家親受其害而公歛陽嘗脫季孟于齊師敗陽貨于棘下是成不惟孟氏之保障亦季叔之所相倚爲固者夏墮郿費冬及于成三家始知孔子之意惟欲張公弱私故遂聽處父之謀而留成以爲狡兔之窟也使季孫終信孔子則率師從公期于必克舉成易耳今任公自圍而三家袖手旁觀季孫之心蠹矣故因齊人之饋女樂而導公宣淫以行孔子

秋晉趙鞅入于晉陽以叛冬晉荀寅士吉射入于朝歌以叛

趙鞅據晉陽以避荀范寅吉射據朝歌以抗晉君寅吉射之惡不待言矣而鞅亦以叛書何也使鞅當二子舉兵之時自歸司敗待命于君則可謂不叛矣乃明知趙午荀范有姻姪之親而專殺之以啓釁復陰恃晉國載書有始禍之死而姑後焉以避誅是寅吉射之伐鞅其惡顯著于迹而鞅之陷寅吉射其惡早包藏于心也並書爲叛均之無君焉耳矣

晉趙鞅歸于晉

趙鞅既負大逆而晉侯乃許之歸是爲君而獎臣之叛也亂其可弭乎自三臣始禍知蹠請皆逐之言非不衷迨范中行既伏其罪獨聽韓魏之請盟趙鞅于公宮是使趙與韓魏傾心相結以同仇知氏而其後三家果滅知伯而分晉君召之也故書歸者罪定非恕鞅也抑自晉昭失權六卿爭政賄賂公行而范鞅荀寅爲尤貪卒以先敗多藏厚亡天道之不爽如此

衛世子蒯曠出奔宋

蒯曠之殺母出于南子之口成于戲陽速之言其事之有無誠未可知但據經書世子則蒯曠之罪當有可原者矣而論者以楚商臣蔡般之弑君皆稱世子用以定殺母之爰書不知弑君之惡與出奔殊弑君書世子蓋謂有君之尊兼父之親而忍爲悖逆罪專在子也出奔書世子蓋謂子固不孝父亦非慈而輕棄國本罪不專在子也經有辭同而旨異者當觀其事何如耳然則蒯曠之出奔誠爲不善事其父母而南子之恣淫衛靈之信讒亦甚矣哉

姒氏卒

杜註以姒氏爲定公夫人果爲夫人三家雖橫不應不成其喪穀梁以爲妾辭者是也然魯自成風以來妻母皆僭用夫人之禮獨姒氏卒不書夫人葬不書小君說者以爲哀未卽位也然在喪稱子孝子不忍之心則然而國內臣民固已尊之爲君矣母以子貴三家豈不可遵用僖宣舊典而顧不赴不祔不成喪者則假正名之義以肆其脅君之私也卑其母必棄其子哀公之孫邾如越其機自此萌矣

齊侯衛侯伐晉 袁公

平有變盈之難而齊莊伐之定有范中行之難而齊景伐之皆由晉政不綱內無以制其臣斯外有以招乎寇晉之不足以主盟已可知矣然齊不能修政明刑與晉代霸而合從黨惡棄君助臣是自誨其臣以叛也崔杼之弑莊景親見之而復蹈其故轍倒行逆施遂至陳乞弑荼陳常弑壬景雖幸以身免而國且變爲田氏老將至而耄及不反爲晉定所笑乎彼衛靈內有父子之亂而尙從齊以伐晉又不足責矣

季孫斯叔孫州仇仲孫何忌帥師伐邾取漷東田及沂西田癸巳叔孫州仇仲孫何忌及邾子盟于

句繹

戰寧而四卿並將齊強也邾子寡弱何足禦魯而三家各出其師以伐之者蓋欲借邾以耀武而譽其君因挾勢以取田而收其利雖會朝奔喪邾之事魯爲勤定之撫邾亦厚而三家正衡其知有公不知有臣也故乘定之旣薨哀之初立而大肆其毒以舒宿忿顧三卿伐而二卿盟何也州仇何忌猶自知其貪暴而懼邾人之怨于齊晉也季則肆然無忌若無庸盟以要之矣

晉趙鞅帥師納衛世子蒯聩于戚

蒯聩在外四年矣使衛靈明正其罪而黜之則蒯聩不得稱世子稱世子宜有衛也乃納以趙鞅之師弗克歸衛而僅入戚則輒之據國固矣父子之間孰無天性旣不能迎之于其先復不能遜之于其後故書納者所以著輒之不仁也而胡傳以爲國人所不受國豈有無父之人而獨使其君爲鮮民以衛恤哉

蔡遷于州來

吳與楚爲仇。楚旣使蔡疆于江汝。而蔡請遷于吳。當爲楚所不許。故久而居其故土。吳人知其情。以師遷之。而蔡乃得徙于州來。其有阻遷之計者。如公子駟公孫獵。則殺之放之。蓋蔡逼于兩大之間。不爲吳遷。必爲楚遷。豈能中立其國。而經以自遷爲文者。猶幸吳之不夷蔡于縣也。然蔡自昭侯以後。不復見經。則其受制于吳。亦猶昔之受制于楚矣。

齊國夏衛石曼姑帥師圍戚

曼姑圍戚。而以國夏首兵。蓋禍端起自齊也。齊見鐵上之師。救鞅于車敗。鄭于下者。皆蒯瞷爲之不去。蒯瞷則衛之從齊不固。而齊之圖晉爲難。故令衛輒伐戚。而命將出師以佐之。方輒之據國稱兵。未嘗不懼討于方伯。今得齊之黨惡。遂擗然以子圍父。以臣圍君。而戚幾不免矣。噫。齊欲輸粟于晉之叛臣。而忍助攻于衛之逆子。天理人倫。澌滅已盡。昔夫子因其問政而告之曰。君君臣臣父父子子。何其徒以聖言爲穢也。

桓宮僖宮災

桓僖親盡而廟不毀。僭也。天故災之以警魯人。夫當毀而不毀。固爲有干于禮。不當立而立。將愈見惡于天。經書桓僖之災。隱以著武宮煬宮之立于季氏者。尤爲不經。宜鑑于此而毀之。以承天道。

晉人執戎嬖子赤歸之于楚

戎蠻爲楚所凌急而投晉固意晉可拒楚而托庇焉使晉以范中行之難辭蠻弗納已不足以帖人心矣顧乃助楚爲虐執赤歸之其視棄疾之誘殺蠻子不仁爲更甚也楚受天王之叛臣如子朝尹召之徒不執而歸之于周其橫可憎而晉以中夏之盟主甘爲楚役不惟不仁其無恥更可笑故經書晉人以惡之

齊國夏及高張來奔

使國高可以托孤則當景公廢長立少之時早能犯顏進諫乃不問義之是非輕受顧命其必無成事可知矣顧來奔而以國及高者何也伐我以國夏圍戚以國夏秉國之權既重則奉荼之責愈深而陳乞之忌而圖之者亦彌甚今不能防其亂于未作之先而遽委其君于一戰之後國夏奔而高張已無能爲矣陳乞得以肆志矣故書曰及明罪之尤在夏也

齊陽生入于齊齊陳乞弑其君荼

景公葬已踰年則荼之君齊久矣陽生在魯婚于季氏實懷且安本無爭國之志使陳乞不召則陽生不入陽生不入則荼不弑國不二君二則多難此事勢所必然不待陽生之告乞早熟籌之是乞心主于弑而特假手陽生以加之及也夫主少國危則奸雄得志乞何利于殺孺子而立長君亦其時承爭霸之餘烈非驟起所能攘故先假廢立之事以張大其威權而徐觀其後釁經書陳乞弑君所以著田氏篡齊之本也其以陽生繫齊者以文無所承故

公會吳于鄆

吳自柏舉以後，遷蔡伐陳，其勢益張。魯人畏之，將以事齊晉者，改而事吳。前年會于鄧，則招之入魯矣。吳舊與昭爲婚，而昭爲季所逐，三桓懼其往而見執，故托爲守國不行，而使公供其役。則會吳者亦公迫于強臣之令，非得已也。觀太宰之言曰：國君道長，而大夫不出門，則三桓之無禮，雖吳人亦深惡之矣。

公伐邾八月己酉入邾以邾子益來

魯自哀公嗣位，五伐邾矣。前此或一卿出，或二卿出，或三卿並出，皆自帥其師。而此獨以公主兵者，蓋季孫之志，將以一舉滅其國，虜其君，盡取其土地，而自知爲無名之師，或爲大國所不容，故陰收其利于己，而顯推其惡于公也。春秋之例，諸侯有奔執而不返者，則名之。今邾子於七年來八年歸，非與蔡侯獻舞、徐子章羽等而顧名之者。蓋季孫已獻于毫社，囚諸負瑕，非齊鮑牧之來討，邾子必死于魯而不歸矣。故經直以亡國之辭書之，著季氏之僭也。

宋公入曹以曹伯陽歸

曹與宋鄰，宋貪其土地久矣。哀三年樂髡伐之，六年向巢伐之，傳皆不著其師與之由，則曹之無罪明甚。今於七年秋而圍之，八年春而入之，遂俘其君以歸。宋之虐曹，何異魯之虐邾？乃救邾者有齊與吳，而救曹者惟鄭。曹其能復乎？諸侯無霸，而使小國心惕于震鄰之禍，以私相救援，而卒無益于事，可哀也已。

吳伐我

吳伐我傳謂邾故不知吳既敗楚遷蔡伐陳南方諸侯無與抗者將欲通東北之道主魯服齊以爭霸稱而鄧衍之盟特假爲行師之名耳魯人疑其果爲邾來也故歸其咎于季孫而孟叔不與協心齊力先禦諸竟及吳師次于泗上逼近國都而欲攻王者僅有微虎之徒七百人使吳欲取魯如摧枯朽耳顧反與行成結盟而退而載書亦不以邾爲言則吳第欲脅魯以修好而使之爲東道主也其意可知然以魯爲吳貳而遂至有城下之盟則季孫之棄國也亦甚矣

歸邾子益于邾

使齊不取讐聞則益不歸使魯不歸益則讐聞不返魯取邾旣負不義之名而失二邑又有蹙國之耻以利害之勢較之不得不歸益以釋齊怨而弭兵端豈魯之自能悔過乎胡傳以爲歸益于邾之能掩其前惡也烏乎掩

齊侯陽生卒

鄭髡頑楚麇之弑舊史承赴而書卒蓋其事起于倉卒闇昧之間雖國人傳之仲尼不得據所聞以革之也陽生之卒傳謂齊人弑之赴于師蓋歸罪于君假國討以說于吳而解其兵當吳之伐齊公實會焉赴告之冊魯所共聞則定爲齊人弑其君矣仲尼考其事察其情而正舊史之譌改書曰卒蓋弑君之大惡聖人不敢輕以加人故髡頑楚麇之實弑而書卒寧仍之陽生之實卒而書弑則易之由此以推而凡春秋之爲臣子被惡名者豈可幸哉

公會吳伐齊甲戌齊國書帥師及吳戰于艾陵齊師敗績獲齊國書

國書之伐我師至城下其釁端實起于魯之會吳伐齊顧不自反而復會吳以伐之魯祇知己之羸弱不足敵齊故假吳以快其報復之私而不知吳自入郢以來方欲荐食上國正假魯以逞其志也夫越國以行師自古爲難故吳爲蔡用而後能敗楚于柏舉吳爲魯用而後能敗齊于災陵敗楚而功固可喜敗齊而禍甚可憂也自是而會橐皋藩衛侯爭長黃池吳之盛威于中國者魯實導之經以國書主是戰者以內及外也外吳而所以貶魯者深矣

用田賦

魯取民之法諸家異說其數之多寡已不可知但各就其文義考之古者公田藉而不稅今曰稅畝是既統計其畝而均分之復遍履其畝而橫歛之十而取二矣古者四邱爲甸出長轂一乘甲士三人今作邱甲使邱出一甲是甸有甲士四人合步卒爲百人矣古者田出租以足食里出賦以足兵故曰賦里以入而量其有無今用田賦是託軍旅以爲名而於耕物之家復責市廛之布也變法厚征至此爲已極故書用以譏之

公會晉侯及吳子于黃池

孟之會楚宋爭霸而穎始稱子黃池之會吳晉爭霸而夫差始稱子皆舊史之文也顧孟不書及而此書及者楚穎用詐以霸推宋夫差用強以霸自居春秋欲正中國之名而不沒兩霸之實故先晉以及吳也

顧兩霸在會而從之者惟有一魯。晉之久衰固不足言。而吳多行無禮。外不能服諸侯之心。內不能弭於越之禍。傳云七月辛丑盟。而經不書。蓋譏其皆不足以主盟也。而中夏之霸統自此絕矣。

西狩獲麟

聖人道既不行。而作春秋以治萬世之天下。雖不感麟。亦豈容已。既作矣。麟雖不至。其書自足以明王道。而立人紀。功垂無窮。然麟實爲王者之瑞。今出非其時。遊非其地。而爲虞人所獲。固與鳳不至圖不出同。足發已矣之歎者也。春秋於是乎輟筆。

韓昌黎詩云：春秋三傳束高閣。獨抱遺經究終始。是時啖助趙匡陸質之徒始出。而退之大儒。言早如此。則固知三傳之不足以釋經矣。自是而至於宋。又不惟其經之釋。而多比附時事以釋經。此則疑於宋之經。而非周魯之經。故今之論者復不以爲然也。蓋不知經無以得其意。不知傳無以得其事。不得其意。而事之舛者不知也。不得其事。而意之奧者亦不知也。此吾叔春秋論之所爲作。未嘗捨經而泥傳。亦未嘗離傳以釋經。幸生明備之後。得以考訂折衷。而要其參互錯綜所獨得於心者。爲不少也。叔弱冠舉於鄉。公車九上而後捷於禮闈。一典試于廣東。卽移疾歸。鍵戶著書。不與世務。方將取諸經羣史而論定之。而此一書其始事也。故特先梓之以問世云。嘉慶十四年五月端陽節

後一日姪紹祖跋。

